

WANTOK

NIUSPEPA BILONG OL PAPUA NIUGINI STRET

Ernst & Young audited/
circulation 15,177

32 pes

Namba 1014

Wik i stat long Fonde, Disemba 2, 1993.

40 toea

Mani bilong 1993 Egrikalsa Dvelopmen Progreman pinis

DISPELA K2.18 milien em ol i givim long wok bilong Egrikalsa Dvelopmen Progreman, vot namba 247-3101-1104-144 i pinis.

Dispela vot i bilong baim ol projek bilong ol memba na givim helpim mani i go long ol manmeri na ol oganaisesen husat i no kirap long wokim winmani.

Na long 1994 baset, nesanel gavman i no bin brukim hap mani i go long dispela vot.

Long ripot *Wantok Niuspepa* i kisim, em i soim wanpela lista i gat 47 nem. Na ol i givim namba long ol dispela nem stat long 90 i go irap long 136.

Dispela lista i soim nem bilong ol lain husat i kisim mani, hamas ol i kisim, namba bilong sek, ol arapela toktok na de em ol i bin kisim mani long en.

Bungim olgeta wantaim, dispela 47 nem i kamapim K88,653. Dispela mani i bin go long ol wan wan manmeri, ol bisnis grup na 13 nesanel memba bilong Palamen.

Namel long ol memba em 10-pela minista; husat em Andrew Baing (Edukesen) - K20,000; Parry Zeipi (Envairomen na Konsevesen) - K16,755; John Nilkare (Provinsal Afeas na Viles Sevises) - K20,000; Albert Karo (Woks) - K25,000; John Kaputin (Foren Afeas) - K20,000; Albert Kipalan (Publik Sevis) - tupela sek mani inap long K70,000; Iaro Lasaro (Fiseris na Marin Risoses) - K20,000; Roy Yaki (Lida bilong Gavman Bisnis na Trenspot) - K20,000; Roy Evara (Agrikalsa na Laipstok) - K20,000.

i go moa long pes 3



Em nau...Nupela Marit...Kila Kollas (Iephan) wantaim man bilong em Ian Karara (klostu long Kila) i bin marit long las wik Sande, Novemba 28, long Botenikel Gaden long Yunivesiti Bilong Papua Niugini long Pot Mosbi. Ol lain wantok, pren na familli bilong tupela tu i bin go na bung long lukim tupela i wokim promis long stap wantaim olsem man na meri. Long raithan em plawa meri na bes man bilong tupela. Foto: Miri Aiori.

Ripot: C.I.S YUSIM KRANGI MANI

GODFRIED NIAKA i raitim

... tok save pepa stap nau wantaim minista bilong ol

WANPELA tok save pepa em i toktok long sampela opisa long Dipatmen bilong Koreksenal Institusen (CIS) long yusim krangi publik mani i stap nau wantaim minista bilong CIS, John Kamb.

Sampela opisa husat i wok long seksen bilong lukautim mani long hetkwata long Dipatmen bilong CIS long Mosbi i raitim dispela tok save. Na ol i givim i go long Mista Kamb.

Long dispela tok save pepa, ol i tokim minista olsem sampela opisa insait long hetkwata bilong CIS Dipatmen long Mosbi i no yusim publik mani long stretpela rot.

Ol i tok rot ol dispela opisa i wok long yusim mani na tu i bin yusim mani i no bihainim stretpela rot wantaim olkain ol bilong yusim mani.

Dispela ol opisa husat i yusim haitnem olsem ol "Enti Korapsen Opisa" i tokim Mista Kamb olsem ol i no save Komisina bilong CIS, Sam Nuakona i save o i no save long dispela samting. Tasol dispela samting i bin kamap na i wok long kamap yet.

Hia em sampela samting o rot ol dispela lain Enti Korapsen Opisa i tok save long Mista Kamb long sampela opisa long CIS dipatmen husait i bin yusim krangi mani.

1. Deputi Komisina-Michael Mondia i yusim krangi K5,900.

Rekot i stap long opis i soim olsem dispela K5,900 i bin go long baim telipon bil bilong Mista Mondia. Ol i tok Mista Mondia i gat wanpela praivet telipon long haus

bilong em. Na em i mas yusim mani bilong em yet long baim telipon bil na i no CIS Dipatmen.

Dispela ol Enti Korapsen Opisa i tok sampela opisa long seksen bilong lukautim mani i tokaut olsem ol wokman bilong Komyunikesen Seksen long Dipatmen i spenim dispela K5,900 long baim telipon bil bilong Mista Mondia. Ol dispela lain wokman i bihainim tasol toktok bilong Mondia na spenim dispela mani long baim telipon bil bilong em.

2. Dipatmen i baim bikpela mani long ol opisa i lusim hetkwata na go aut long ol ara-

pela provins.

Dipatmen i baim bikpela mani i go long ol opisa olsem deputi na ol asisten komisina long go aut long ol arapela provins. Bikpela mani tru i go long raun bilong ol dispela opisa. Tasol raun bilong ol i nogat gutpela kaikai long en. Ol opisa ya i no inap long kisim ol dispela raun. Dipatmen i westim nating mani long ol dispela raun ol opisa ya i mekim. Bos bilong wan wan haus kalabus long ol provins i mas mekim ol wok we ol opisa i bin go aut long mekim.

Komisina i mas lukluk na glasim ol dispela raun. Tasol em i no bin mekim wanpela samting.

Sampela opisa long seksen bilong

i go moa long pes 2



COASTER BAS

EM NAU... NAMBawan PMV BAS LONG
PAPUA NIUGINI NAU ILUK SMAT MOA!



PORT MORESBY 229400 LAE 422322 RABAU 921988 MADANG 822188
GOROKA 721844 MT HAGEN 521888 WEWAK 862255 KAVIENG 942132
KIMBE 935155 TABUBIL 589060 VANIMO 871254 PORGERA 579367
ALOTAU : WALTERS WORKSHOP PH 611174

Ela Motors
OLGETA HAP

Ripot bilong ol kain kain samting long Bogenvil ailan

BRA tanim nau long ol lapun na ol meri

VERONICA HATUTASI i raitim

OL REBEL paitman bilong Bogenvil i wok long kilim nating ol man bilong ples long ailan.

Planti em ol meri, lapun na ol lain olsem husat i no inap long pait bek o ranawe.

Insait long tripela wik i kam inap nau, 4-pela pipel i dai pinis na tripela i kisim bagarap long han bilong ol lain BRA long hap bilong Saut Wes Bogenvil.

Ripot i kam long opis bilong Praim Minista i tokaut olsem

long las wiken, ol BRA i bin kilim tupela meri bilong Nagovis bihain long ol i banisim ol long rot. Tupela meri ya i bin go long gaden bilong kisim kaikai wantaim ol nara-pela meri.

Ripot i tok tu olsem planti lain BRA nau i wok long ranawe i go long hap bilong Saut Bogenvil long taim ol sekyuriti fos i banisim ol isi isi i go insait long Sentrel Bogenvil. Tasol ol resisten paitman tu i wok strong yet

bilong helpim ol sekyuriti fos long lukautim ol pipel bilong ol long ples. Olsem bai ol i no ken kisim bagarap long han bilong ol BRA.

Long Siwai, tupela man i dai pinis bihain ol lain BRA i kilim ol. Long Trinde, Novemba 17, ol i bin kilim wanpela man nem bilong em Pironu husat i winim pinis 49 krismas. Em i bilong ples Munnu klostu long Konga gavman senta long Siwai.

Ol paitman i bin go insait long ples long samting olsem 4 klok long bikmoning, pairapim gan na kilim dispela man.

Wanpela wik pastaim long

dispela samting i kamap, ol BRA i bin kilim tu wanpela man bilong ples Siwai long Siwai. Nem bilong man ya em Pongua. Em i bin ron long ka wantaim ol arapela man i go long Boku gavman stesin we ol sekyuriti fos memba i stap nau long en. Na klostu long ples Sininnai, sampela lain BRA i hait i stap na sut i go long ka na kilim man ya.

Siaman bilong Saut Wes Interim Atoriti, Nick Peniai i tok ol paitman i wok long makim na kilim dai nau ol meri, lapun manmeri na ol lain husat i no strong tumas long lukautim ol yet.



Isi long lap ya...Tupela yangpela ya i kilim skin stret long lap. Kain lap bilong ol meri Buka i save narakain tru ya. Taim tupela yangpela i kilim skin long lap. Lapun mama long raithan i mekim save long salim ol samting bilong em. Dispela maket long Buka i save pulim ol mama long ol ples long kam salim kaikai. Maket

long Buka i save pulap long planti ol gupela kaikai tru.

Olpela primia na BRA lida wok long kisim taim nau

OLPELA primia na wanpela BRA lida, Joseph Kabui i no stap gut tumas nau long Bogenvil. Long wanem ol BRA i kalabusim em i stap long ples Sipuru antap long ol maunten long Paguna.

Dispela toktok i kamap bihainim ol ripot i kam long ol gavman wokman bilong Lolohe insait long Sentrel Bogenvil.

Ripot i tok ol BRA i mekim olsem long Mista Kabui bihain long meri na ol pikinini wantaim ol arapela wan-lain bilong em i lusim Sentrel Bogenvil na go stap long Motupela kea senta long Nagovis.

Ol ripot i tok Koko Kabui na ol lain bilong Mista Kabui i bin ranawe i go long Motupela kea senta long tupela wik i go pinis. Na ol i stap gut tasol long hap wantaim ol narapela pipel. Ol sekyuriti fos i wok long askim yet Misis Kabui tu long wanem samting i kamap nau long man bilong em wantaim ol arapela samting.

Long wankain taim tu, ol ripot i kam long opis bilong Stet na Bogenvil Afeas i tok moa long 600 pipel bilong Kongara i ranawe i go pinis long Morokaimoro long Siwai. Ol pipel bilong hap na ol ples klostu i wok

long lukautim ol wantaim kaikai, klos na ol arapela samting.

Ripot i tok olsem ol pipel i les pinis long stap aninit long lukaut bilong ol BRA. Bikos planti bagarap, sik, dai na taim nogut i kamap long ol. Ol i sot tru long ol klos, marasin, kaikai na ol arapela samting.

Ripot long Lolohe i tokaut tu olsem long olgeta de, sampela lain famili na ol wan wan man i wok long lusim bus na go long ol kea senta insait long Sentrel Bogenvil bilong kisim kaikai, klos na marasin long ol gavman opisa na ol sekyuriti fos memba.

Long wankain taim tu, sampela lain sumatin long Yunivesiti bilong PNG long Mosbi i stap pinis long Bogenvil bilong helpim ol gavman wokman long hap wantaim ol progrem bilong stretim bek ol wok kamap long Bogenvil na sindaun bilong ol pipel long ailan.

Sampela bilong ol i stap nau long Lolohe bilong helpim ol pipel bilong Manetai na Mabiri insait long Sentrel Bogenvil. Ol bai sekap long ol bagarap na taim nogut ol pipel i bin kisim aninit long han bilong ol lain BRA. Bihain long dispela, ol bai raitim ripot na glasim gen.

Hombru kamapim gen moa hevi

ALOYSIUS SAMI i raitim

HOMBRU na strong-pela dring i wok long kamapim bikpela hevi nau long Buka na ol arapela hap bilong Bogenvil.

Ol ripot i kam long Buka i tok olsem i no ol yangpela tasol i wok long kisim hombru na kamapim ol hevi. Nogat. Sampela bikman bilong komyniti tu i wok long spak long hombru.

Hombru em i strong-pela dring ol pipel bilong ples yet i wokim long wara bilong kokonas, yis, suga na susu.

Ripot i tok i gat sampela lain bilong sekyuriti fos, ol pablik sevan,

ol sios woka, sampela sief na ol meri tu i kisim hombru na spak nabaut. Na kamapim sem pasin bilong bagarapim gupela sindaun long ples.

Siaman bilong Buka Interim Atoriti, Thomas Anis i bin autim dispela long wanpela bung bilong ol lida, plis, sekyuriti fos, ol siaman bilong ol interim atoriti long ailan, ol sios lida, meri na yut long Buka tupela wik i go pinis.

Mista Anis i bin askim strong ol plis long lukautim lo na oda long ples. Na em i laikim ol sios, yut na grup bilong ol meri long helpim ol i go moa long pes 17

Mani lus long CIS

i kam long pes 1

lukautim mani i tokaut olsem planti opisa taim ol i kisim trevel alauwens bilong ol, ol i no save go aut long provins em ol i mas go long en. Na tu sampela i no save pinisim taim ol i mas stap long provins ol i go long en. Sapos ol opisa ya i no go aut long provins o i no pinisim taim ol i sapos long stap long provins, ol i mas givim bek hap mani i go long dipatmen.

3. Bikpela mani tru i go aut long baim 4-pela mentenens kontrakta kampani long Mosbi.

Seksen bilong lukautim mani i tokaut olsem K79,465 i bin go aut long baim 4-pela mentenens kontrakta kampani insait long Mosbi. Dipatmen i no bin sapos long givim wok i go long dispela 4-pela kampani na baim ol. Bikos ol kalabusman inap mekim ol dispela wok aninit long lukaut bilong ol tredsmen long Bomana. Hia em nem bilong dispela 4-pela kampani na mak bilong mani dipatmen i baim wan wan bilong ol: I.P Contractors-K14,000, Merume Express-K32,000, Verele Contractors-K14,215 na Purgeine Contractors-K19,250.

Ripot i soim olsem wok bilong stretim ol haus i mas kamap long haus bilong 4-pela opisa tasol. Na dispela mak bilong mani i winim wok bilong stretim haus i bin kamap long haus bilong dispela 4-pela opisa.

Dipatmen i no bihainim stretpela lo na pasin bilong givim wok i go long dispela 4-pela kampani. Narapela samting i olsem nem na adres bilong dispela 4-pela kampani i no stap insait long wanpela buk ol i kolim Telipon Dairektri.

PLIS RIPOT



ALOTAU, Milen Be: Wanpela yangpela man bilong Rosel ailan long Milen Be provins i bin dai long Trinde nait, Novemba 24.

Plis ripot i tok dispela man i bin dai long ol bagarap bilong naip em i kisim long bodi bilong em. Tasol ol i no klia hamas man i bin sutim em tripela taim wantaim naip.

Em i bin bungim dispela birua long Sanderson Be eria.

Plis i no autim yet nem bilong dispela yangpela man inap ol i toksave long ol wanlain bilong em. Tasol man ya i save wok olsem man bilong kisim tok save bilong ren, win na klaut wantaim Dipatmen bilong Sivil Eviesen.

Olsem na plis i askim tu ol man long no ken wokabaut wanpis long ol dispela kain hap long nait. Nogut ol tu bai bungim birua.

DARU, Westen: Distrik Kot i kalabusim pinis tupela man bilong Kainantu long Isten Hailans provins long karim ol smok nogut, mariwana inap long tupela yia. Tasol ausait long haus kot, sinia provinsal mejistret, Jeff Katenge i tok dispela tupela yia i no inap. Tupela man ya i mas kisim bikpela mekim save moa.

Plis i bin holim Joe Koasa bilong ples Vanifa na Kupe Mankena bilong ples

Hamori bikos ol i painim bikpela karamap spakbrus wantaim tupela. Hevi bilong dispela karamap spakbrus em inap long 145 kilogram.

Ol pipel bilong ples i bin tingting planti taim dispela tupela man i go long Wipin ples balus long wanpela sata Cessna 206 balus bilong SIL long las wik Mande moning. Olsem na ol i ripot na plis i go holim tupela.

I gat bilip olsem dispela karamap spakbrus em i bilong salim i go long ovasis. Mani em ol inap kisim long salim dispela olgeta spakbrus em K660,000.

HAGEN, Westen Hailans: Tupela pikinini i stap orait tasol bihain long wanpela man i stilim ka bilong papa bilong ol na ranawe wantaim tupela. Dispela birua i bin kamap long Hagen taun insait long Westen Hailans provins.

Plis ripot i tok long dispela taim, papa bilong ol, Tumu Eresi bilong ples Mulip i bin lusim tupela pikinini wantaim ka na go insait long stua bilong baim wanpela mekpas sekenhan klos. Long taim em i stap insait, dispela man i kamap na katim ol waia bilong ka. Bihain em i joinim ol na kirapim ka na ranawe wantaim tupela pikinini.

Plis i ronim dispela man wantaim ka i go tasol man ya i lusim ka na

RABAUL: Wanpela man i bin dai long Sarere nait bihain long ka i bamim em na pulim em samting olsem wanpela kilomita longwe long ples em i bamim em long en.

Plis ripot i tok olsem dispela birua i bin kamap long ToMaringa Rot. Nem bilong dispela man i kisim bagarap em David Opini. Em i gat 20 krismas na i bilong ples Valaur insait long Is Nu Briten provins.

Provinsal Plis Komanda, Sief Inspekta Patrick Semi i tok Opini i bin spak nogut tru na wok-abaut i go long rot na ka i bamim em. Long dispela taim, draiva bilong ka i painim hat long stapim ka. Draiva bilong ka i bin pret long ol poro bilong Opini husat i bin wokabaut wantaim em na i no stapim ka. Long dispela taim bodi bilong Opini i bin stap aninit long ka na em i pulim em i go olgeta long dua bilong ToMaringa Plis Bareks we draiva i go na stop.

MOSBI: Ol plis long las wik Fraide i bin holim wanpela man husat i bin ranawe long Bomana haus kalabus.

Plis i bin holim Peter Peto Koivi, 32 krismas bilong Woitape distrik long Sentrel provins. Plis i holim em long Korobosea.

Koivi i bin ranawe long kalabus tupela mun i go pinis. Pastaim long em i ranawe, Koivi i bin kalabus long brukim lo long stil, kilim man na brukim ol haus na kisim samting.

Ol plis i bin painim Koivi na bilip tu olsem em i bin go pas long planti raskol pasin long sampela wik i go pinis. Plis i kisim planti ripot i kam long ol man olsem Koivi i bin go pas long ol dispela samting. Na ol i laikim em i mas go bek long Bomana.

Ol meri Is Nu Briten soim pasin nogut bilong ol man

LINDA PASSINGAN i raitim

LONG Fonde, Novemba 25, samting olsem 500 meri bilong Is Nu Briten provins i bin holim wanpela bikpela bung na mas. Ol i bin mas bilong soim ol man olsem kain kain pasin nogut

bilong bagarapim ol meri i wok long kamap bikpela insait long kantri na long wol. Dispela bung na mas i bin sut tu long traim na daunim pasin bilong ol man i save kros na paitim ol meri bilong ol.

Ol meri long Is Nu Briten i tok olsem em i longpela taim nau ol i save painim kain kain hevi. Bikos ol man i save paitim, kilim, bagarapim, tok pilai na kalabusim ol. Na tu ol man i save givim ol planti wok bilong mekim. Ol i tokaut olsem i no ol meri long Papua

Niugini tasol i wok long bungim dispela hevi. Nogat. Olgeta meri insait long wol i save painim wankain hevi. Wanpela liklik grup bilong Nu Briten Sosol Eksen Komiti (ENBSEK) ol i kolim long Domestik Vailens i bin go pas na kamapim dispela bung na mas. Dispela grup i save lukluk long kain kain hevi bilong ol meri na traim

long painim rot bilong helpim ol. Long dispela bung siaman bilong ENBSEK, Sir Ronald ToVue i bin givim toktok bilong em. Dame Josephine Abajiah, Misis Angela Bata na Misis Alice Pawa i bin toktok tu long taim bilong pasim bung. Nesenel Kot jas, Jastis Tracey Doherty husat i bin stap long

Mosbi taim dispela bung i kamap i salim tu ol toktok bilong em. Tupela samting i kamap long dispela bung em kwaia na pilai drama. Ol pilai drama i soim hevi ol meri i save bungim insait long famili na komyuniti. Ol pilai drama i soim olsem sapos ol man i laikim na rispektim ol meri bilong ol, ol pikini

ni bai lainim gutpela pasin. Na tu ol bai painim gutpela sindaun long taim bihain. Narapela samting tu i olsem ol pikinini i no inap tingting long kamapim ol bikhet pasin insait long famili na komyuniti. Olsem bai ol inap painim gutpela sindaun na laip na stap amamas oltaim.



• Sampela bilong dispela ol meri husat i bung na mas i holim ol pepa i gat kain kain pasin nogut ol man i save mekim long ol meri.



• Sampela memba bilong samting olsem 500 meri husat i holim dispela bung na mas i giaman na putim ol plasta na banis long het na han bilong ol. Dispela em long soim bagarp ol meri i save kisim taim ol man i paitim ol.

Ogio stretim mani bilong Not Solomons na Bogenvil opresen

MANI em olgeta'progrem bilong Bogenvil i kisim long dispela yia em inap long K32 milien. Long dispela mani, Difens Fos bai kisim K12 milien na wok progrem tasol bilong stretim gen ol samting bai yusim narapela K20 milien.

Bogenvil, Michael Laimo. Mista Ogio i tok long ol wok bilong ol, ol soldia bilong PNG Difens Fos wantaim plis na woda i bin mekim gutpela wok tru long ailan. Ol i bringim gen ol sevis bilong gavman i

go insait hariap tru long Bogenvil. Minista i tok long Not Bogenvil nau, olgeta samting i orait gen. Long Wakunai, ol nupela haus i kirap, na ol i stretim tu Asitavi haiskul na ol komyuniti skul long hap. i go moa long pes 4

Gutpela mani ripot nau kamap long hatwok bilong 1992

BIKPELA senis i bin kamap long wok didiman long 1992. Dispela i kamap bikos ol pipel i bin sindaun gen long ples na kirapim ol wok didiman bilong ol. Dispela tu i bin wanpela as bilong yia 1992 i kamap olsem wanpela gutpela yia bilong PNG. Memba bilong Namatanai na minista bilong Fainens na Plening, Sir Julius Chan i bin autim dispela taim em i wok long givim ripot bilong Beng bilong Papua Niugini long 1992 long taim Palamen

i holim las kibung bilong en long las mun. Sir Julius i tok PNG i bungim gutpela taim long 1992 bikos wok bilong Kutubu Wel projek i bin stat, mak bilong ol minerel em tupela main long Pogera na Misima i painim i go antap, wok didiman tu i go antap na kos bilong ol samting em PNG i save salim i go ausait long kantri long wok fores tu i go antap.

Mani bilong 1993 Egrikalsa Developmen Progrem pinis

i kam long pes 1 Ol narapela memba bilong Palamen husat i kisim mani em Daniel Tulapi (Kagua/Erave) - K80,000; Francis Koimanrea (Is Nu Briten Provinsal) - K20,000; na Sylvanus Siembo (Noten Provinsal) - K20,000. Taim Wantok i laik toktok wantaim ol opisa bilong

DAL husat i lukautim dispela progrem, ol i no laik toktok. Na ol i pretim tu Wantok long no ken autim wanpela stori bilong dispela, bikos ripot niuspepa i holim i gat sampela asua long en. Ol i tok dispela samting bai kamap pablik taim NEC i sekim na autim long plua bilong Nesenel Palamen.

Ripot bilong beng i tok long 1992, ol i bin wokim K39.3 milien profit. Olsem na long dispela mani, gavman i bin go het yet long kisim samting olsem K4.2 milien long olgeta yia long las 5-pela yia i kam inap long 1992. Sir Julius i tokaut tu olsem long 1992, Beng bilong PNG i bin kamapim sampela senis long ol wok bilong en long bringim bek kantri long stretpela rot. Na dispela i bin wok gut tru. Na dispela i min olsem em i senisim tu ol sampela lo bilong en long pasin bilong wok wantaim ol arapela ovasis kantri.



WANTOK

NIUSPEPA BILONG OL PAPUA NIUGINI STRET

Moa ripot bilong las Palamen kibung long 1993

1992 bin hat tasol Elcom i joinim gen ol pawa lain

Krungutim liklik ol kastam

Long dispela wik i gat tupela bikpela samting i kamap.

Wanpela i kamap long Trinde na narapela bai kamap long Fraide. Long Trinde, PNG i bin tingim Wol AIDS De na dispela sik nogut AIDS. Orait long Fraide, em i taim bilong tingim ol dispela lain trangu em yumi kolim olsem ol disebel.

Nau dispela sik i bruk pinis long PNG, em bai hat long stapim. Wanem samting yumi inap mekim em long daunim em olsem bai em i no inap bruk i go kamap bikpela moa yet.

Long mekim olsem, yumi ol pipel bilong dispela kantri yet i mas glasim tu ol pasin tumbuna na kastam bilong yumi. Planti yumi i no inap brukim, tasol ating sampela yumi mas traim krungutim liklik.

Bikpela hap tok bilong dispela i sut long kain kastam na lo bilong PNG long toktok bilong man na meri i pren, slip wantaim na long skin bilong wanpela na narapela. Sapos mipela i laikim olsem ol pikinini i klia long dispela sik, ating i mobeta yumi no ken brukim, tasol krungutim liklik ol dispela kastam na bilip na skulim ol pikinini long skin bilong ol yet, na bilong narapela tu.

Olsem bai ol i no inap sem long toktok na autim tingting bilong ol long narapela man na meri. Olsem tasol, yumi olgeta PNG mas wokbung wantaim long dispela pait.

MANI Lektrik Komisen bilong Papua Niugini (Elcom) i bin kisim long ol wok bilong en long 1992 i no bin bikpela tumas.

Mak bilong mani i bin surik i go antap long 3 pesen tasol. Na dispela i min olsem 1992 i bin

wanpela hatpela yia liklik bilong Elcom.

Dispela i bin kamap long tupela bikpela as. Namba wan em dispela bikpela hevi we i kamap long Bogenvil na Parguna Kopa Main Limited i stap pas yet na narapela em

long mak bilong ol wok bisnis long kantri i pundaun.

Ol dispela bikpela toktok i bin kamap insait long namba 30 Ripot bilong Papua Niugini Lektrik Komisen long las mun bilong yia 1992. Ripot i bin

kamap long plua bilong Palamen long taim bilong kibung.

Ripot i tok tu olsem ol i bin ting bai i gat sampela bikpela senis i kamap long 1993. Tasol i kam inap nau, i luk olsem dispela samting i no bin

kamap.

Bikpela mak bilong pawa em Elcom i bin saplaim long haus, bisnis opis, gavman opis na ol arapela haus nabaut long 1992 i bin kam long pawa bilong wara (73 pesen). Liklik tasol (27 pesen) i bin kam long ol jenereta.

Mosbi em i wanpela hap long kantri we i wok long bungim bikpela hevi. Bikos mak bilong ren em i save kisim long olgeta yia i kam inap long 1992 na 1993 i bin daunbilu tru. Nogat bikpela ren i save pundaun long kain ples olsem Mosbi.

Ripot i tok insait long 20 yia, ating 1992 i bin daunbilu tru. Nogat inap ren i bin pundaun. Olsem na pawa em ol pipel na bisnis opis wantaim ol gavman opis i save kisim long wara tu i go daun. Em nau, kos bilong pawa tu i go antap. Bikos oltaim Elcom i mas kirapim ol jenereta bilong givim pawa long komyuniti.

Long planti taim i bin gat kain kain bagarap i kamap long ol nupela jenereta nau i sanap long Moitaka. Olsem na Mosbi Siti i no save kisim stret pawa.

Long Yonki Dem, mak bilong wara long hap i bin orait tasol na pulap tasol i stap. Na wok bilong saplai pawa long wara i bin go gut tasol. Na long Ramu Pawa Stesin, ol i bin sampela hevi long hap wantaim ol haidro lektrik jenereta bilong ol.

Ripot i tok long ol arapela senta, ol samting i bin go gut tasol.

Long ol winmani bilong Elcom, profit bilong ol wok pastaim long ol takis na manis i bin pundaun long i go moa long pes 5.



• Ambeseda bilong Saina-Madam Wang Nongshang i sekan wantaim Mis PNG Sharon Onsa bihain long em (Madam Nongshang) i givim sampela klos, kalambu na baket i go long PNG Ret Kros na Nesenel Disasta na Imejensi Sevis long helpim ol pipel long Madang na Morobe husat i painim bagarap bihain long bikpela guria.

Laimo kolim 1994 baset olsem bilas tasol

NARAPELA man gen husat i no amamas long 1994 nesenel baset em memba bilong Saut Bogenvil, Michael Laimo.

Long ol toktok bilong em long las bung bilong Palamen long mun Novemba, Mista Laimo i kolim tupela baset bilong gavman olsem 'ol flawa bilong bilasim ples'.

"Bikos ol i stap bilong amamasim tasol ol pipel na mekim ol i hepi," em i tok.

Mista Laimo i bin mekim ol dispela toktok taim em i autim tingting bilong em long 1994 baset em

gavman i givim na putim long plua bilong Palamen.

Em i tok long planti lain memba, ating ol i no bin ritim gut ol samting i stap insait long dispela baset.

"Dispela baset i pulap tru long ol kain sevis na projek na wok em olgeta gavman i mas givim. Helt na Edukesen i no nupela samting, dispela em ol sevis em gavman i save givim oltaim," Mista Laimo i tok.

Em i sutim strongpela toktok olsem wanem samting dispela gavman nau i mekim i skruim tasol wok bilong olpela gavman. Em i givim piksa bilong dispela long wok bilong ol main long Kutubu, Pogera, na Misima.

Long wankain taim, Mista Laimo i tromoi bikpela toktok i go long mani namel long plis na ol yut. Bikos mani bilong Yut Dipatmen nau i go daun na bilong plis i go antap. Tasol minista i no klia sapos kantri bai stretim hevi bilong lo na oda taim gavman i givim moa mani long plis.

"Mi ting olsem em i mobeta long yumi givim moa mani long ol yut. Bikos ol dispela lain tasol i wok long kamapim planti hevi bilong lo na oda. Long wanem, ol i no gat wok," Mista Laimo i tok.

Memba i bin tromoi tu bikpela askim long dispela i go moa long pes 12

Ogio stretim mani bilong Not Solomons

i kam long pes 5

"Mi amamas long tokaut olsem ol pipel bilong Not Bogenvil i sindaun gen olsem long bipo. Ol skul na haus sik bilong mipela tu i op na wok gut pinis," Mista Ogio i tok.

Tasol long Saut Bogenvil, em i sutim strongpela toktok olsem ol pipel i no save soim laik long wokbung wantaim gavman na ol opisa bilong en. Olsem na no gat samting i kamap yet maski ol i bin traim long tupela haikul long Buin na Tuin.

"Mi bilip olsem dispela K10 milien em inap stret bilong bringim gen ol narapela gavman sevis i go long ol

pipel long ailan. Bikos mi save tu olsem Bogenvil i no wanpela tasol long kantri, i gat ol arapela provins tu i stap husat i laikim mani.

"Olsem na dispela K10 milien em inap long mipela ol pipel bilong Bogenvil ailan. Na tu mipela i gat provinsal gavman baset, na em i narapela long dispela K10 milien nesenel gavman i givim," Mista Ogio i tok.

Long ol wok didiman, Mista Ogio i tok em i amamas long nesenel gavman i laik stretim wok bilong Rurel Beng.

WANTOK

NIUSPEPA BILONG OL PAPUA NIUGINI STRET

P.O. Box 1982 BOROKO
Telepon Namba: 25 2500
Feks Namba: 25 2579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00





Kanage i wok long Mosbi na wanpela taim em i go malolo long ples bilong em long Lae. Em i go raun long Tent Siti wantaim poro bilong em Mista Ali.

Em i stap na harim olsem long Situm na Buang i salim graun. Em nau Kanage i kisim Ali na tupela i go long Situm. Tupela i go kamap na askim long namba bilong blok na ol i tok 5.555.

Nau Kanage i askim ol hamas ol i salim na ol i tok K5,555.55. Kanage i tokim Ali, "Small things em pipia bilong Mosbi." Tupela i go bek long haus na Kanage i go kisim mani bilong em na stat kaunim. Tupela kaunim i go na ol i gat K5,555.50. Tupela i kauntim namba tu taim ken na kamap wantaim wankain namba.

Kanage i sot long 5 toia. Long dispela taim tu em i no gat 5 toia. Kanage i tingting i go na tok em i gat K14,000 long I.B.D long ANZ beng. Baga nogut i go long beng na askim lons opisa long kisim 5 toia loan.

"Bilong wanem na yu laik kisim 5 toia loan. Mipela i no inap givim loan bilong 5 toia," wanpela beng opisa i askim Kanage. Kanage i kros no gut tru na askim ol long lukim bos bilong ol. Na bos i givim tok orait long Kanage long kisim 5 toia loan

Busoko Opo Nono LAE.

Kanage i save raun wantaim wanpela meri husat i pinisim gred 10 na redi long kisim wok. Tupela pren na stap i go na meri ya i kisim wanpela wok. Taim tupela i pren, tupela i pasim tok olsem tupela bal marit. Taim meri ya i lusim ples na i go wok, em i no save raitim wanpela pas i kam long Kanage. Olgeta taim Kanage i save go long pos opis na sekim pas. Tasol nogat wanpela pas i save kam. Mekim i go na Kanage i gat bikpela wari tru. Em i ting olsem prenmeri bilong em i mas painim wanpela nupela man. Olsem na em i ting lus long em na promis bilong tupela. Wari i killim stret Kanage. Em i no save kaikai gut. Bikos wari i pulapim bel bilong em. Orait wanpela taim Kanage i raitim wanpela pas i go long prenmeri bilong em olsem:

*Dia Darin,
Mi waitim for yu for long taim nau. Watpo yu no leta me. Wan de, wan wik, wan mun mi go tu pos opis. Tasol yu stil no leta me. Mi ting bek of the promis yu en mi we mek. Na mi kral, mama kral, bebi brata kral, they we ol kral for yu olgeta de no more.*

Darin, mi leta yu nau. Yu tu mas leta mi bihain time. Yu mas save tu that yu got mai gut ting there, en I got very gut ting hia. So taim yu kam bek, plis no ken don wait, for long taim mi stap dry tru. That is the why i leta yu now. Yu mas leta mi quick.

Your Darin Boy - Kanage

Tay Tomi Alfred Anoram, WEWAK

moa tok pifai long pes 21

PNG ken kamapim moa mango bilong salim i go long ovasis

LEO WAFIWA i raitim

PLANTI mango i save kamap insait long Papua Niugini. Na PNG i ken kisim bikpela mani i kam long salim mango i go long ol ovasis maket.

Ol kantri long ovasis husat i save planim na salim mango i no save

kamapim gutpela prodaksen long mun Septemba, Oktoba na Novemba. Dispela em long olgeta yia.

Olsem na PNG i ken salim moa mango long dispela tripela mun. Tasol ol fama i mas save o kisim skul long

gutpela rot bilong planim mango long ol bikpela plantasin nau.

Seketeri bilong Dipartmen bilong Egrikalsa na Lipstok (DAL), Utula Samana i tokaut long dispela long Trinde 1 Desemba. Dispela em long taim DAL i holim wanpela fil de, na soim ol arapela fama, na save-

man bilong wok egrikalsa long gutpela rot bilong planim mango. Klostu long 50 manmeri olgeta i bin kamap long dispela bung long Pasifik Edventis Koles, ausait long Mosbi Siti.

Mista Samana i tok ol fil de i gutpela bilong skulim ol fama. Em i tok moa olsem nau yet

gavman i daunim takis long ol samting em ol fama i ken yusim olsem ol o marasin bilong wok egrikalsa. Na em bai gutpela moa long lukim ol fama i go insait long wok bilong planim na salim mango.

PNG i ken kamapim ol faktori bilong wokim ol loliwara long ol prut olsem mango.

"Dispela i stap tasol long hamas mango ol fama long kantri i ken kamapim," Mista Samana i tok.

Fil de i soim olsem Papua eria i gat gutpela graun bilong mango long kamap gut. Dispela em ol lokol na ovasis mango wantaim olsem sampela i kamap pinis arere long ol haus long Mosbi Siti.

Ol arapela fama i lainim long pasin bilong planim mango long neseri, wanem taim bilong putim wara na o marasin bilong givim gris na taim bilong kisim i go planim long fam. Fil de i soim tu ol arapela pasin olsem bilong lukautim mango diwai long kamap na karim gut kaikai.



• Tupela meri ya i wok long holim ol pkinini mango na aigris i stap long taim DAL i holim dispela fil de bilong en long Pasifik Adventis Koles long Mosbi. Foto: Leo Wafiwa.

Wes tok Sandaun kisim tasol bun bilong baset

FELIX RAMRAM i raitim

"WANEM samting nesenel gavman i ting long mipela, ol dok? Na givim mipela bun na ol yet i kisim mit? Dispela K269,000 nesenel gavman i givim long ol pipel bilong Sandaun em i liklik samting," dispela em ol toktok olpela nesenel memba bilong Vanimo/Green, Micah

Wes i mekim bihainim mak bilong mani nesenel gavman i givim long Sandaun long 1994 mani plen.

Mista Wes i askim nau ol nesenel memba bilong Wes Sepik na ol provinsal lida long tok-tok strong long gavman long givim ol moa

mani. Em i tok planti bilong ol dispela mani bai go long edministresen na pe bilong ol wokman. Na liklik tasol bai go long ol wok projek em gavman bilong Aloitch/Lakurengin i tingting long kamapim.

Wes i tok Sandaun provins i mas kisim wankain mak bilong mani olsem ol arapela provins long kantri. Bikos Sandaun i save givim mani tu i go long nesenel gavman long mani em i kisim long bikpela projek bilong Vanimo Fores Prodaks.

Tasol em i tok nau em i wok bilong ol provinsal na nesenel lida

long pait strong na askim nesenel gavman long givim ol sampela moa mani. Em i askim Primia Peien Aloitch na Fainens ministra bilong em, Andrew Kumbakor long wokbung na askim nesenel gavman long givim ol moa mani.

"Olsem wanpela olpela memba bilong Nesenel Palamen, mi save olsem i gat sampela mani i stap long Mosbi. Tasol em i wok bilong ol lida long pait strong na kisim skel

bilong mipela," Wes i tok.

Em i sutim tok tu i go long ol memba bilong nau bikos em i bilong asua bilong ol na Nesenel Palamen i katim sampela mani.

Nau yet wanpela man long Vanimo taun i sapatim nesenel gavman long daunim mak bilong mani em i givim long Sandaun provins. Em i tok dispela bai kirapim tingting bilong ol lida husat i wok long kisim bikpela mani na ol arapela gutpela

samting. Ol dispela lida i lus tingting pinis long ileksen promis bilong ol long klinim provins.

"Wantaim dispela liklik mani, provinsal gavman bai i mas rausim ol liklik divisen insait long Dipatmen bilong Sandaun. Dispela ol divisen i save kaikaim planti mani bilong provins. Na tu long stapim ol bikman long yusim gavman ka long 24 awa," Dispela man i tok.

1992 bin hat tasol long Elcom

i kam long pes 4 mak bilong K7 milien. Olsem na long 1992, ol i bin kisim tasol K24.2 milien. Na K12.8 milien profit bilong 1991 i pundaun i go daun long K0.9 milien long 1992.

Tasol ripot i tok sampela samting i kamap na mekim ol dispela mani i lus i go kamap olsem K2.6 milien profit. Olsem na olgeta mani na samting em Elcom i yusim nau i sanap long mak bilong K404.8 milien.

Long wankain taim yet, namba bilong ol wokman long 1992 tu i bin go daun. Bipo i bin

gat 1,924 wokman na meri. Tasol long 1992, dispela namba i go daun long 1,884. Dispela i kamap bikos Elcom i bin traim dispela pasin bilong wanpela man i save long tupela o tripela wok. Olsem bai moa wok inap kamap long liklik taim na bikpela mani i no inap lus nating.

Ripot i tokaut tu olsem hevi bilong lo na oda long kantri tu i bin pasim planti sevis bilong go long ol kastoma. Long sampela hap, ol man i katim pawa lain o bagarapim ol pawa pos. Olsem na pawa i no go long ol

dispela hap.

Wanpela samting Elcom i mekim long 1992 na kisim bikpela sapat long ol pipel bilong ples em long pulim pawa lain i go insait long ol dispela hap. Dispela em i wanpela spesel projek bilong givim pawa long ol pipel long ples tasol ol i no inap tromoi bikpela mani tumas. Olsem na long 1990, Elcom i bin pulim 550 kain lain olsem.

Na long karamapim olgeta ripot, maski ol samting i no bin wok gut tumas long 1992, Elcom i bin kamapim gutpela wok.

Nawae ilektret luksave long gavman

NESENEL memba bilong Nawae ilektret, Amos Yamandi i tok em i gat bikpela amamas long Wingti/Chan gavman long putim kamap wanpela gutpela baset bilong narapela yia.

Mista Yamandi i tok dispela em i namba wan taim ol pipel bilong ilektret bilong em i luksave long wanpela gavman husat i gat bikpela tingting long helpim ol pipel long ples na taun wantaim. Bikos Wingti/Chan gavman i skelim bikpela mani i go long ol wok bilong infrastraksa developmen, viles sevis, rurel egrikalsa developmen, pis bisnis, eduken na wok helt.

Em i tok bihain long em i kamap memba bilong Nawae ilektret, em i lukim planti samting i kamap long hap bilong em.

Sampela bilong ol dispela samting em gavman i wokim bikpela rot long Nawae, Busu Buhem rot na bris, Situm plis stesin bai kamap long narapela yia, Nawae kopi faktori na Nawae haikul long narapela yia.

Memba bilong Nawae i gat amamas tu long Wingti/Chan gavman long givim mani i go long stretim ol rot insait long Lae siti. Bikos Lae em i namba tu biktaun bilong Papua Niugini.

Em i tok dispela i soim olsem gavman bilong Paia Wingti na Sir Julius Chan i gat bikpela tingting long helpim ol pipel.

Long wankain taim tu, Mista Yamandi i tok em i amamas long Praim Minista long winim kot bilong em.

TU MINIT TINGTING YUMI OL PASINDIA LONG DISPELA GRAUN

TUDE long olgeta hap bilong graun i gat kain kain grup pipel i muv nabaut. Planti i mas lusim asples bilong ol, long wanem, i gat woa o trabel o taim nogut i painim ol. Yumi ting long ol bot-pipel bilong kantri Vietnam.

Yumi ting long OPM i ranawe long Irian Jaya na i kam sindaun insait long PNG. Yumi ting long ol Bogenvil i laik ranawe long ol BRA, sapos ol inap. Yumi ting long ol pasindia na wantok i lusim ples na i kam sindaun long ol skwata setelmen nabaut long ol taun. I luk olsem planti pipel long graun i no hepi long stap long ples bilong ol, na ol i raun raun long painim gutpela sindaun.

Dispela em i wanpela piksa bilong yumi Kristen tu long dispela graun.


Planti taim Jisas i bin skulim yumi long sut i go long heven, na i no lus long ol samting bilong dispela graun. Em i laik tokim yumi olsem: graun em i no ples tru bilong yumi. Nogat.

Heven em i ples tru bilong yumi. Long taim yumi stap long dispela laip na long dispela graun, yumi olsem ol pasindia i wok-abaut long rot i go long heven. Na Jisas i bin tok lukaut long Matyu 6:19, long yumi no mas lus long ol bilas na mani samting bilong dispela graun. Nogut ol dispela samting i paulim yumi na bai yumi lusim rot i go long gutpela ples bilong heven.

Mi laik soim dispela poin wantaim wanpela stori. I gat wanpela holiman i sindaun i stap long liklik haus bilong em insait long bus. Long wanpela de, wanpela turis i painim em na i kalap nogut long lukim rum bilong holiman ya i no gat tebol na sia na srang na bet samting. Na em i askim holiman olsem: "Westap ol tebol na sia na srang na bet na bokis ais na kentim bilong yu?"

Holiman i tanim nau na i askim turis, "Na ol dispela kain samting bilong yu i stap we?"

Turis i bekim tok olsem: "Mi



FRANK MIHALIC i raitim

turis, mi man bilong wokabaut tasol, mi pasindia; olsem na mi no gat nid long ol dispela samting."

Nau holiman i tok, "Mi tu mi turis, mi pasindia long dispela graun. Mi wokabaut long rot i go long heven, olsem na mi tu mi no nidim ol planti kain samting." Em nau!

Long dispela taim bilong yia,

yumi save tingim Maria na Yosep i lusim Nasaret na i wok-abaut i go long Betlehem. Bihain liklik, tupela i mas ranawe wantaim bebi Jisas na i go long kantri Isip. Tupela i save gut long laip na wari bilong yumi ol pasindia.

Yumi olsem ol Juda long Olpela Testamen. Ol i lusim kantri Isip na ol i hatwok long wokabaut inap long 40 yia long ples wesana nating bilong kamap long heven bilong ol, em kantri Isrel tasol.

Long Sam 39:12 yumi rit olsem: "Bikpela, yu save pinis, mi wankain olsem ol tumbuna bilong mi. Ol tu i bin stap sot-pela taim tasol long dispela graun." Yesa. Yumi olsem pasindia i karim switkes bilong em i go. Nogut yumi pulimapim planti kain bilas bilong dispela graun insait long dispela switkes, na em bai kamap hevi moa, na yumi hatwok tru long go het.

Yumi inap kisim skul bilong

dispela poin long wanpela liklik stori. Em i go olsem. Tupela holiman i stap long ples wesana, longwe long ol pipel. Tupela i save hapim kaikai na wok long pre long God long nait na long san. Tasol long wanpela de bilong yia, tupela i save lusim rabis kem bilong tupela na wok-abaut i go long biktaun. Inap long sevenpela awa stret, tupela i save spin na raun na aigris long ol nupela naispela samting i pulap long ol bikpela stua na supamakot. Pinis, nau tupela i wokabaut i go bek long kem bilong tupela. Long wanpela de olsem, tupela i wok-abaut i go na wanpela i tokim poroman bilong em olsem: "Brata, tude mi bin lukim wan tausen kain kain samting mi no nidim bilong mekim mi i kamap hepi. Nau mi amamas moa moa yet."

Yumi nidim hamas samting tru bilong dispela graun bilong helpim wokabaut bilong yumi i go long heven? Ating.....

Lae Katolik givim K4,000 helpim

OL pipel bilong Madang na Morobe provins husat bikpela guria i bagarapim sindaun bilong ol i wok long kisim helpim i kam long planti grup insait na ausait long kantri.

Long las wik, Lae Katolik Asdaiosis i bin givim K4,000 tausen long helpim ol pipel bilong Morobe provins husat i bin kisim bagarap long dispela guria.

Bisop Van Lieshout i bin givim dispela mani i go long Lutheran Sios Taim Nogut Komiti (Earthquake Disaster Committee) long strongim wok

bilong sios long helpim ol pipel bilong en husat i kisim taim na hevi long guria.

Katolik Sios i gat wanpela fan we i save bungim mani na ol arapela samting bilong helpim ol pipel long taim bilong bikpela hevi. Ol i kolim dispela long Trangu Fan.

Bisop Getake Gam bilong Lutheran Sios i bin givim bikpela tok tenkyu bilong em i go long Katolik Sios long ol i bung wantaim susa sios long mekim wok bilong strongim bodi na sol wantaim.



• Bisop Henry Van Lieshout bilong Lae Katolik Daiosis i givim sekmani inap long K4,000 i go long Bisop Getake Gam bilong Lutheran Sios.

Misin kapsaitim tu helpim long ol trangu



Gutpela Pasin....Ol lain Sista bilong Holli Spirit long Alexishafen long Madang i bin givim K5,000 i go long helpim ol manmeri long Madang na Morobe husat i kisim bagarap bihain long bikpela guria. Long dispela poto, Sista Mary Linden i givim dispela K5,000 sek mani i go long rijonol memba bilong Madang Peter Barter. Mista Barter i tok em bai yusim dispela mani long helpim ol manmeri long Ranara na Gusap husat i kisim bagarap.

Kate distrik na Northelbian Lutheran Sios wok poroman

SANANG ZAZORING i raitim

TUPELA pasto bilong Kate distrik i kam bek pinis long Jemani, bihain long tripela mun wok poroman insait long Northelbian Lutheran Sios.

Kate distrik presiden, Pasto Beka Kosieng, na Kalasa seket presiden, Pasto Rifirekac Awing, i bin makim distrik na go long Jemani.

Pasto Kosieng na Pasto Awing i bin lusim Lae long 8 Ogas, long bekim wokabaut wanpela wok poroman grup bilong Northelbian

Lutheran Sios i bin mekim long 1992. Northelbian Lutheran Sios i bin lukautim wokabaut bilong tupela wokman.

Namel long 8 Ogas, na 5 Oktoba, tupela i stap insait long Northelbian Sios na mekim planti sios wok. Tupela i bin go lukim ol hetman bilong sios, ol het bilong gavman, ol pasto na toktok wantaim ol long wok bilong sios insait long Lutheran Sios Kate distrik, na wok bilong Lutheran

Sios long Papua Niugini.

Tupela i bin raun long olgeta hap bilong Northelbian Sios na autim Tok bilong God na strongim ol Kristen long hap. Long wanpela taim tupela i bin helpim ol pasto na baptisim tupela pikinini na givim ol holi komunio long ol Kristen memba long hap.

Insait long Is Jemani, tupela i bin raun na lukim bikpela banis bilong Belin (Berlin Wall). Dispela em banis bilong komunis gavman. Tasol long 1989, em i bin bruk

taim pawa bilong ol pipel o wok bilong, demokresi i kirap. Tupela i bin luluk raun tu insait long Wittenberg. Wittenberg em asples bilong Dokta Martin Luther we namba wan rifomesen i bin stat long 1517.

Long dispela taim tupela wokman na ol sios lida long Northelbian i toktok planti long strongim na stretim wok poroman namel long ol kongrigesen, seket na distrik bilong ELC-PNG na long Jemani. Ol sios kongrigesen long hap i bin

soim bikpela laik long mekim wok poroman wantaim sios long Papua Niugini.

Wanpela bikpela mak ol i toktok long en em; wok poroman em i no bilong toktok o singaut long mani na arapela helpim, tasol tupela sios i mas strongim tupela yet wantaim Tok bilong God. Wok bilong helpim wanpela na arapela long Tok bilong God na long sait bilong helpim bodi i mas kamap long tupela hap wantaim. Givim presen em i wanpela hap tasol


bilong wok poroman.

Ol pasto insait long Jemani i gat bikpela a m a s . Long wanem, ol pasto bilong hia i save go na kirapim ol Kristen memba long hap wantaim nupela nek na ol Kristen i save laikim tru long harim Tok bilong God ol i save autim.

Wanpela hevi ol i lukim na toktok long en em long ripot bilong mani ol wok poroman bratasusa long hia i no save kamap klia. Ol i tok, wanem kain mani helpim ol i save salim i kam long helpim wan-

pela kongrigesen, seket o distrik, ol i mas givim wok long dispela mani hariap na givim ripot mani i go bek long ol. Ol i no laikim dispela mani i stap long beng long kamapim winmani. Ol bai amamas long dispela mani i mas mekim wok bilong em stret.


Tupela wokman i bin lukluk raun tu long Lutheran Sios insait long Bavaria na wokmisen dipatmen long Neuen-dettelsau pastaim long ol i lusim Jemani long pinis bilong mun Oktoba na kam bek.



4 RUNNER

Dispela top Toyota 2.8 Diesel engine em i gat 5 pela dua na i smat tru...draiva na ol pasindia bai stap isi tasol na raun long dispela top 4WD ka. Ringim Ela Motors nau na yu yet i test draivim wanpela 4 Runner.

TEAM UP WITH
TOYOTA



LAND CRUISER

Long taim hevi i kamap ol strongpela lain i kisim Toyota Land Cruiser... top stret long ol 4WD long Papua Niugini. I gat tu long Australia wantaim Turbo Diesel pawa na otametik trensmisen. Long taim yu kisim Toyota Land Cruiser bai yu givim baksait long ol narapela kar!

AWD STRONGPELA TRU

Ela Motors

PORT MORESBY 229400 • LAE 422322
RABAU 921988 • MADANG 822188
GOROKA 721844 • MT HAGEN 942188
WEWAK 862255 • KAVIENG 942132
KIMBE 935155 • TABUBIL 589060
VANIMO 871254
PORGERA 579367

Mandela tok planti waitskin inap dai

PLANTI wait pipel bilong Saut Afrika inap long dai sapos rait wing grup i go het na kamapim pait insait long kantri, Nelson Mandela, presiden bilong Afriken Nesenel Kongres (ANC) i tok.

Mista Mandela i mekim dispela toktok insait long wangepa bung wantaim ol bik-

man bilong wok bisnis long kantri.

Ol yangplea blakskin manmeri wantaim sampela waitskin tu long kantri i memba bilong rait wing grup. Ol i egensim lo bilong kantri we i givim rait long ol wait manmeri bilong Saut Afrika i stap bos long ol blakskin pipel.

Em i tok ANC i no saptim tingting bilong rait wing grup long kamapim pait. Na bai em i toktok long ol long no ken go heta na mekim olsem. ANC bai toktok wantaim grup ya long wokbung wantaim na kamapim sampela gutpela tingting long daunim ol bel-kaskas pasin namel long

tupela grup long kantri. Na kamapim wok developmen na gutpela sindaun long olpipel bilong ol.

Mista Mandela i tok moa olsem em no wanbel tu wantaim long tingting bilong sampela waitman long rait wing grup husat i laik kamapim narapela kantri bilong ol yet.


ANC i luksave long ol waitman olsem ol i makim bikpela hap bilong komyuniti long kantri. Na ol i mas wokbung wantaim long ol blakman long go hetim wok developmen bilong kantri. Bikos nau bikpela senis i kamap long pasin we ol waitman i bosim ol blakman long kantri.

Lo bilong ol waitman i bos i long kantri i slek nau. Ol blakman i ken autim tingting bilong ol long ol bikpela bung we i karamapim sindaun na laip bilong ol.


Long ol narapela bung moa bihain, Mista Mandela bai i toktok long ol samting.



Tingim Kennedy.... Olpela seketeri bilong John F Kennedy, Evelyn Lincoln wantaim Jack Metxler-superintendenten bilong arlington Nesenel Matmat i go raun lukluk long matmat bilong Mista Kennedy. Dispela em 30 yia bihain long ol man i kilim em na ol i planim em.



Sain bilong win.... Wangepa Kurdish millten i putim han i go antap na soim sain bilong win bihain long plisman long Paris i arestim ol manmeri husat i holim wangepa protes. Ol i protes na askim ol atoriti long rausim moa long 20 waniain em ol i wok long holimpasim ol i stap.



Mohammed soim pes gen.... Jenerel Mohammed Farrah Aidid i soim pes gen long ol manmeri bihain long 5-pela mun long i no soim pes.



Amamas na protes.... Moa long 20,000 sapota bilong Hurdish Wokas Pati i go raun long ol strit long Bonn na amamas wantaim na protes long ol Jemen atoriti i kontrolim ol Kurdish grup.



Halo pater Krismas.... Presiden bilong Amerika, Bill Clinton i raun lukluk long wangepa maket ples bilong Katolk sios long sentral Los Angeles. Beksait long Presiden Clinton em Asbisop Roger Mahony. Taim Clinton i go lukluk raun em i tok olsem Amerika i mas pait egensim pasin bilong kros pait.

Isrel bai stap liklik gen long Gaza Strip

TUPELA lida bilong Isrel na Palestain i bin sainim wanpela tok orait long Septemba 13 bilong dispela yia long tupela sait wantaim i lusim pait.

Na gavman bilong Isrel i rausim ami bilong en long ol ples long Palestain we ol soldia bilong en i stap. Ol i bin tok orait long dispela samting i kamap tru long Disemba 13 long dispela yia.

Diespela bel isi agrimen we Praim Minista Rabin bilong Isrel na Yasser Arafat, lida

bilong PLO (Palestain Libresen Oganaisesen) i bin sainim i kamapim planti toktok namel long tupela grup. Planti man i bel kaskas na sampela i stap isi tasol.

Tasol long nau, planti pait, hevi na dai i kamap yet namel long ol lain Isrel husat i stap nau long sait bilong ol Palestain pipel. Ol i sutim tok tu long ami bilong Isrel long kilim dai planti pipel bilong Palestain bihain long ol tok orait i kamap namel long ol lida bilong

tupela sait.

Orait long las wik ol soldia bilong Isrel i bin kilim lida bilong Hamas, em wanpela resisten grup bilong Palestain pipel. Nem bilong dispela man em lmad Aqal. Dai bilong em i mekim ol Palestain pipel i belhat olgeta na ol i mas i go long bikrot na kamapim trabel.

Ripot i tok olsem long taim ol soldia bilong israel i laik stapim ol trabel ya, ol i kamapim bagarap long 36 pipel.

Tupela man i kisim bikipela bagarap. Wanpela long het na nara-pela long bel bilong


en. Na ol i stap nau long haus sik. I luk olsem bai ol i surukim deit bilong

rausim ol soldia bilong Isrel long hap sait bilong Palestain i go antap gen, abrusim

Disemba 14 mak. Bikos long ol hevi we i wok long go het namel long tupela sait.



Painim ol wanwok... Tupela olpela soldia bilong Amerika i karim wanpela patrol bokis bihain long tupela i kamap long Hanoi ples balus long Vietnam. Tupela wantaim ol arapela olpela soldia bilong Amerika i go long Vietnam long painim sampela soldia bilong Amerika husat i lus na stap long Vietnam. Dispela ol soldia i lus bihain tasol long bikipela pait o woa long Vietnam i pinis.



Papa, ol i kilim yu ya.... Pikinini meri bilong Assad Saftawi- wanpela memba bilong Palestain Libresen Oganaisesen (PLO) i mekimsave long krai taim em i harim olsem sampela man i kilim papa bilong em. Assad Saftawi emi namba tri man long dai bihain long Palestain i sainim wanpela tok orait wantaim Israel.



Soldia kisim bagarap.... Wanpela man i helpim wanpela soldia bilong Georgia i go long balus long Kutaisi. Kutaisi em i namba tu biktaun bilong Georgia. Ol rebel i kamapim kain kain bikhet pasin long Georgia.



Redi long go aut lona spes.... Dispela lain ya bai kalap long wanpela spes sip na go aut long spes long karim aut wanpela medikel rises wok. Ol bai stap long antap long spes long samting olsem 14-pela de na bihain kam daun gen long graun.



Taim bilong kis na amamas.... Wanpela yangpela man Bosnia wantaim premeri bilong em i wok long kis na amamas.

Singaut bilong helpim ol soldia long Buka

ALOYSIUS SAMI i raitim

OL bikman long Bogenvil i laikim ol pipel bilong provins long helpim ol PNG soldia husat i stap long ailan wantaim kaikai.

Bikos long nau yet, ol soldia i sot tru long kaikai. Ol i save kisim saplai bilong ol i kam long gavman long Rabaul na Mosbi.

Ol sief na ol bikman long Buka i laikim tu

nesenel gavman na Difens minista long stretim hariap dispela K15 milien em ol i no peim yet olsem hai risk alauwens na kompensesen bilong ol soldia husat i wok long Bogenvil. Na tu bilong ol dispela lain husat i bin wok pastaim long ailan.

Ol i tok gavman i mas baim ol soldia hariap bilong abrusim

ol kain asua na hevi we i ken kamap sapos gavman na Difens Dipatmen i no stretim hariap pe bilong ol soldia bilong en long Bogenvil.

Wanpela bikman bilong Pis Komiti long ailan, Herman Halihi i askim tu ol pipel bilong Buka long bungim sampela kaikai bilong helpim ol soldia. Ol pipel bilong bikples Bogenvil i stat pinis long givim ol kaikai bilong ples long ol sol-

dia.

Ol ripot i tok tu olsem ol soldia long Buka i sot tru nau long kaikai. Olsem na planti bilong ol i painim tasol ol pis long solwara na kaikai.

Insait long wanpela bung bilong ol bikman bilong ami long Buka na ol sief bilong ples long Fonde las wik, opisa husat i lukautim Buka i tokaut olsem las saplai bilong ol i pinis nau. Long wanem em i bin tilim tu i go long ol soldia

long Buka na bikples Bogenvil. Namel long ol i bin gat 28 katen tinmit na tinpis.

Nau yet, ol soldia i wok long dinau long ol sampela stua insait long Buka. Tasol bos bilong Buka koman i tok olsem em i no laik bai ol soldia i kisim bikpela dinau tumas. Nogut bai gavman i no inap long painim mani bilong bekim ol dispela dinau. Na tu dinau i ken kilim wok bilong ol bisnis kampani long

Buka husat i bin stat nau tasol.

Long nau yet, i no gat planti soldia i stap

long Buka. Planti bilong ol i stap long opresen long bikples Bogenvil.

Not Solomons redi long provinsal so

NOT Solomons provinsal so bai kamap bihain long tupela wik.

Dispela so bai stat long Trinde, Desemba 15 na pinis long namba 19 de bilong dispela mun yet. Man husat bai kisim bikpela wok bilong opim so em Prais Minista bilong kantri yet, Prais Wingti.

Ol kain kain pilai, singsing gita resis, ol drama, kwaia na singsing tumbuna resis tu bai kamap insait long dispela 5-pela de. Na tu bai i gat wanpela so bilong ol man i kalap na flai nating antap long skai.

Tasol pastaim long dispela, balus bai kisim ol i go antap na lusim ol.

Siaman bilong so komiti na seketeri bilong Not Solomons edministresen, George Lessi i tok olsem dispela so bai kamapim tupela samting.

Namba wan em long kamapim gutpela sindaun na bel isi pasin namel long ol pipel long provins, na namba tu em strongim gen ol pasin tumbuna bilong ol pipel we i bin bagarap insait long 5-pela yia bilong hevi.

Nau bai i namba wan taim gen bilong so long kamap long provins bihain long 5-pela yia bilong hevi. Na Mista Lessi i bilip olsem klostu long 50 tausen pipel bai kamap long bung wantaim na amamasim provinsal so bilong ol.

Seketeri i skruim tu toktok olsem dispela so bai inap bungim gen ol pipel bilong provins.

Okapa na Kainantu rot kisim K3 milien

VERONICA HATUTASI i raitim

WOK long 30 kilomita Okapa na Kainantu rot insait long Isten Hailans provins i go het yet.

Nesenel gavman i bin givim K3 milien long dispela yia bilong dispela projek. Rot i stat long hap bilong Lufa i go inap long Fayantina.

Provinsal Lens minista na memba bilong Fayantina, Fleming Asorifa i laikim gutpela wokbung i stap namel

long ol nesenel na provinsal memba long mekim gut wok na pinisim dispela projek. Na ol memba i no ken pilai politik na bagarapim dispela projek.

Mista Asorifa i tok amamas long gavman bilong Prais Minista Prais Wingti long luksave long singaut bilong ol pipel bilong provins, na givim bikpela mani bilong pinisim wok long dispela rot.

Long planti yia i go pinis, ol pipel long ilektret bilong em i bin askim gavman long kamapim wanpela gutpela rot long hap bilong ol. Tasol singaut bilong ol i no bin karim kaikai inap long dispela yia.

Nau projek i stat pinis, em i no laikim pilai politik bilong ol nesenel na provinsal memba long bagarapim ol wok.

Mista Asorifa i mekim dispela toktok bihain long sampela hevi i kamap namel long tupela grup (ol nesenel na provinsal lida) long pasin bilong givim ol wok kontrak i

go long ol kampani.

Em i tok i mobeta tupela grup i lus tingting long pilai politik na wok wantaim long helpim provins i go het wantaim ol wok developmen long ples.

Long taim rot ya i pinis, em bai helpim tru ol pipel husat i stap longwe long kisim ol samting bilong ol i go long maket long taun. Na tu bai isi long ol sevis bilong gavman long go long ol pipel insait long ol ples, Mista Asorifa i tok.

Wau distrik kirapim gen narapela yut asosiesen

ARI GUH DANDEE i raitim

OL YUT long planti hap bilong kantri nau i gat bikpela tingting long yusim gut taim bilong ol na kamapim ol kain kain wok long helpim sindaun bilong ol insait long komiyuniti, ol ples na kantri.

Long tupela wik i go pinis, ol yut bilong Wau distrik long Morobe i kirapim nupela yut asosiesen bilong ol. Ol i kolim dispela asosiesen olsem Biangai Sab Yut Asosiesen.

Ol i bin kirapim dispela asosiesen wantaim bikpela tingting long strongim wok bilong ol yut insait long distrik.

Wantaim nupela han asosiesen i op, namba bilong ol yut grup long Wau distrik i kamap 5-pela. Nem

bilong narapela ol yut grup em ol i bin kirapim long dispela yia em Wau Eben, Wau Rurel, Biaru na Tekaoalu.

Siaman bilong Wau Yut Asosiesen, Suma Andum i tok Wau Distrik Yut Kaunsil i mekim bikpela wok long helpim ol yut bilong provins. Na em i laik bai ol sevis bilong yut insait long distrik bilong em i mas go stret long ol yangpela bilong ples.

Nau tu ol wan wan yut asosiesen long distrik i kirapim pinis ol pasbuk akaun long putim gut mani bilong ol long en. Mani ya bai helpim ol long kirapim na mekim ol wok projek i go het.

Em i laikim tu olsem pasin bilong strongim ol yangpela long sindaun long ples i mas stap long strongim tu pasin lotu bilong ol. Bikos dispela i ken kamapim amamas long sindaun na laip bilong ol.

Rot go bungim nau Kobiak setelmen

WOK bilong wokim wanpela nupela han rot i go insait long Kobiak setelmen long Wau distrik i stat pinis long Mande, Novemba 29.

Ol pipel long dispela hap i save painim bikpela hevi long bipo. Bikos i no gat rot i go long hap em ol i stap long en. Ol i save wokabout i go long bikpela haiwe na kisim ka na i go long Wau na Bulolo taun.

Tasol nau, dispela bai pinis. Bikos nesenel memba bilong

ol, Samson Napo i harim krai bilong ol na putim mani inap long K120,000 bilong wokim dispela rot.

Planti pipel long dispela setelmen i bin kamap na bung long Mande long lukim ol masin bilong wanpela lokal kampani, Mozup Construction i statim ol wok.

Wanpela mausman bilong ol, Yang Keyuc i tok em i amamas tru long lukim olsem ol masin bilong Mozup

Construction i statim wok long Mande.

Woks supavaisa long Wau, Zaka Barun i tok ol bai yusim tu sampela mani bilong dispela K120,000 long wokim bris. Em i tok wok bilong wokim rot na bris bai stap long han bilong Mozup Construction na Divisen bilong Woks.

Mista Barun i tok olgeta wok bilong dispela rot bai pinis bihain long tripela mun. Em i tok bikpela wok em long wokim bris.

WHATS COOKING GOOD LOOKING?
It's **BORAL GAS**

DEPOTS: • PORT MORESBY 21 1925 • LAE 42 317 • RABAU 92 1225
• WEWAK 86 2303 • MT. HAGEN 55 1216
Also available from many selected outlets Nationwide

Kaikai bai kuk kwiktai tru, taim yu kuk wantaim gas

VISADD 1086

Ol tisa long Isten Hailans givim tok lukaut

SAPE METTA I raitim

... tasol rijonal opis mas stap yet long Goroka

OL TISA insait long Isten Hailans provins i no amamas long kain pasin em ol bikman bilong Papua Niugini Tisas Asosiesen (PNGTA) i mekim long pasim rijonal opis

bilong asosiesen long Goroka las wik. Opis nau i stap long Hagen. Long dispela tasol, ol asosiesen memba bilong provins i laikim bai nesenel presiden na seketeri bilong

PNGTA i mas pinis long wok bilong ol. Sapos ol bikman i no harim singaut bilong ol, ol bai pinis long dispela asosiesen na tu rausim olgeta mani bilong ol long fan bilong yunien.

Isten Hailans provins yet i gat samting olsem 3,000 tisa i memba long PNGTA. Ol nara-pela 4-pela hailans provins i gat 2,000 tisa i memba long asosiesen. Na ol

memba bilong Isten Hailans i pilim olsem asosiesen i mekim rabis pasin stret long rausim opis long Goroka na putim long Hagen.

PNGTA i bin mekim sampela samting na i no toktok wantaim ol bikman bilong ol tisa long provins. Olsem na ol eksekutiv i no amamas long dispela.

Wanpela samting PNGTA i mekim em long makim wanpela

opisa long lukautim ol tisa bilong provins long taim rijonal seketeri i no pinis yet long wok bilong em. Na tu yunien i no bin givim mani long rijonal opis bilong ranim ol wok bilong en.

Ol bikman bilong yunien long provins i tok tu olsem eksekutiv bilong PNGTA i no bihainim lo long hari-apim ol samting na i no kisim tok orait bilong ol memba

bilong yunien.

Ol i tok sapos han bilong yunien long provins i autim ol memba bilong en long PNGTA, dispela bai bagarapim strongpela sanap bilong yunien we i save pait hat long kamapim gutpela sindaun long ol memba bilong en.

Tasol ol bai sanap strong yet long larim rijonal hetkwata bilong PNGTA i stap long Goroka.



Las 1993 Sande skul...Planti skul long dispela kain taim i save pasim skul na go nabaut. Tasol pastaim long dispela, ol bai wokim pati o pilai o kain kain arapela samting bilong amamasim Krismas wantaim. Olsem na long Mosbi long las Sande nait, ol lain pikinini bilong Bethel Sande Skul long Tokarara i bin pinisim 1993 program bilong ol. Na ol i bin amamasim tu 27 Aniveseri bilong ol. Na long poto em ol lain pikinini bilong skul i kamapim wanpela pilai drama. Foto: John Rei.

Ariako daunim viles sevises polisi

BEN TAUMAI i raitim

PRIMIA bilong suspended Madang provinsal gavman, Andrew Ariako i tok olsem em i no amamas long viles sevis polisi em nesenel gavman i laik yusim long ol lokol gavman kaunsil.

Mista Ariako i tok sapos nesenel gavman i laik yusim dispela polisi, orait, ol i ken yusim long ol arapela provins insait long kantri. Em i tambuim ol long yusim dispela polisi long Madang provins.

Mista Ariako i tok nesenel gavman i no inap yusim dispela polisi long hap bilong em long Yawar.

"Mi yet, mi no laikim dispela polisi. Bikos i kam inap nau, nesenel gavman i no tok klia long ol bai yusim na ranim dispela polisi olsem wanem.

Na tu mipela ol pipel i no klia long wok bilong dispela polisi," Mista Ariako i tok.

Em i mekim dispela toktok long las wik Fraide long wanpela bung em 111 kaunsela i tok promis long holim wok bilong ol. Dispela bung i bin kamap long Holi Spirit haikul insait long Bogia distrik.

Tasol em i tok em i sapotim tingting bilong nesenel gavman long givim K12 long ol kaunsil bilong makim wan wan manmeri. Nesenel gavman bai givim dispela mani i go long ol lokol gavman kaunsil bihainim namba bilong ol pipel. Na ol kaunsil bai yusim dispela mani long kirapim ol projek long wan wan hap em ol lukautim.

Bogia distrik i gat 4-pela lokol gavman kaunsil.

INSTANT GREASE STRIPPER



**ISI WE
LONG KLINIM
OL DIS NA SOSPEN
BILONG YU!**

Karaitem wara saplai projek kisim K25,000 helpim

BEN TAUMAI i raitim

OL pipel bilong ples Karaitem insait long Lumi long Wes Sepik provins bai i gat gutpela wara nau bilong dring na kukim kaikai. Bikos gavman bilong kantri Keneda i harim askim bilong ol na i givim K25,000 long wokim wanpela wara saplai projek bilong ol.

Long wanpela liklik bung long Madang long Mande, mausman bilong gavman

bilong Keneda, Samie Havens i tok gavman bilong em i amamas tasol long givim helpim i go long ol pipel bilong ples Karaitem.

Mista Havens i bilong Keneda. Na em i wanpela voluntia wokman bilong wanpela grup ol i kolim CUSO long Madang.

Long dispela bung, Mista Havens i givim dispela K25,000 sek i go long man husat i go pas long plenim dispela wara saplai projek, Lawrence Assuman.

Mista Assuman i bilong ples Karaitem. Em i save wok long lokol gavman teknikel sevis long Madang.

Mista Assuman i makim ol pipel bilong em na givim bikpela amamas na tok tenkyu i go long gavman bilong Keneda. Bikos gavman bilong Keneda i luksave long hevi bilong ol na givim helpim i go long ol pipel. Em i givim tok tenkyu bilong em tu i go long Hai Komisina bilong Keneda long Papua Niugini, Michael Berry long oraitim gavman bilong Keneda long

helpim ol pipel bilong ples Karaitem.

"Ol pipel bilong mi long Karaitem na Makain i bin askim provinsal na nesenel gavman long helpim ol na painim mani long wokim dispela wara saplai projek. Tasol provinsal na nesenel gavman i no bin mekim wanpela samting," Assuman i tok.

Samting olsem 1,200 pipel bai kisim gutpela wara bilong dring na kukim kaikai taim dispela wara saplai projek i pinis.

Luteran Sios helpim yet ol yangpela man

SANANG ZAZORING i raitim

LUTERAN Sios nau i sanap strong long skruim na helpim ol yangpela bilong en i sanap long mak bilong gutpela sindaun.

Long mekim dispela wok, sios i kamapim kain kain semina long level bilong ol Kristen memba.

Bihainim dispela program, sampela wok i kirap pinis long ol distrik bilong ELC-PNG long wok bilong ol yut. Aninit long Evanjelisem Dipatmen, Kristen Laip opis i go pas long dispela wok wantaim ol yut lida long kamapim 5-Sta program bilong helpim ol yut long ol distrik na seket.

Long September 20-23, Goroka distrik i bin holim wanpela yut woksap bilong en long Bena stesin. Samting olsem 60 manmeri i makim 4-pela seket bilong Asaroka, Rongo, Tarabo na Bena i bin kamap long bung.

Na long Oktoba 6-16, ELC-PNG Kate distrik i holim yut woksap bilong en long Qembung seket long ples Suqang, Finsafen. Planti manmeri i kamap long dispela woksap. Long 18-27 Oktoba, Lae siti seket tu i bin holim woksap bilong 5-Sta program long Wampar seket long ples Gabmazung. Ol 45 manmeri bilong ol peris long Lae siti seket i kamap long dispela bung.

Long woksap bilong Goroka distrik long Bena, presiden bilong ELC-PNG Goroka distrik, Pasto Ohuno Mambu i mekim sampela tok olsem: yumi wokim banis long pik i no ken bagarapim banis - Rom 16:25-27. Yumi mas stretim banis gen long pik i no ken go insait long banis.

Yut woksap em i wankain. Yut woksap i laik strongim wok bilong 5-Sta program long strongim ol yangpela long stap strongpela memba insait long sios. Wantaim dispela strong, ol inap mekim gutpela wok long strongim famili, kongrigesen, peris, seket, distrik na sios wantaim.

In sait long ol dispela woksap, ol yangpela i wok long stadi long mak wok yut i sut long en, na lukim wanem senis i save kamap long ol yangpela long wanpela yia.

Bikpela samting bung i toktok long en em long senis bilong bodi, save na tingting, pilim na bel, pasin bilong God na lotu, na bung wantaim ol arapela Kristen manmeri.

Ol yut i lukluk tu na glasim wok bilong 5-Sta yut program bilong Luteran Sios. Ol i laik save long dispela yut program i fit insait long famili, kongrigesen, peris, seket na distrik olsem wanem. Dispela stadi i wokim rot bilong sios i ken kamapim wanpela buk bilong 5-Sta program bilong seket na distrik.

Ol yangpela i amamas tru long dispela woksap long wok bilong ol yut insait long Luteran Sios. Ol i laik wankain woksap i mas kamap long 1994 na ol yangpela i ken kisim moa save long 5-Sta yut program bilong Sios.

Dispela bung em ELC-PNG was long sipsip program i go pas long en. Hanns Seidel Foundation i givim mani bilong helpim long ranim dispela woksap.

Saina givim K30,000 helpim

PLANTI grup na oganaisesen ausait na insait long kantri i redi long helpim ol pipel bilong Morobe na Madang husat i kisim bagarap long bikpela guria.

Aste long Trinde Desemba 1, ambeseda bilong Pipels Ripablik bilong Saina, Madam Wang Nongsheng i bin givim sampela katen klos, taunam na 200 plastik baket i go long, siaman bilong PNG Red Cross Loani Henao na bos bilong Nesenel, Imeensi Sevises, Leith Anderson. Na ol bai tilim i go long ol pipel insait long Madang na Morobe. Kos bilong ol samting em inap long K30,000.

Madam Nongsheng i tok Saina i sanap redi tasol long helpim ol pipel husat i kisim bagarap long taim nogut na ol arapela bagarap nabaut.

Long taim bikman bilong Saina i harim long kain hevi em bikpela guria i kamapim long ol pipel bilong Morobe na Madang, em i bin salim i go moa long pes 20

K50,000 birua long Melbon Kap 1993



Bikpela mani bilong NCDC i bin lus long baim dispela ka bilong yusim long wanpela de tasol. Komisen i bin baim ka ya bilong yusim long kibung bilong ol siti meya long Mosbi. Tasol long namba tri de bilong mun Novemba, em i painim birua.

NESENEL Kapitela Distrik Komisen (NCDC) i bin baim dispela ka long mun Ogas.

Na kos bilong en em inap long samting olsem K40 o K50,000. NCDC i bin baim dispela ka long taim olgeta meya i bung long Mosbi long wanpela kibung bilong ol.

Tasol dispela ka i no stap stret. Long bikmoning bilong namba 3 de bilong mun Novemba, em i bungim birua long Porebada Rot. Birua i bin kamap wanpela de tasol bihain long bikpela Melbon Kap resis.

Ol ripot i tok olsem i gat bikpela bilip olsem Gra-

ham, pikinini bilong wanpela komisina bilong NCDC, Robert Suckling wantaim Steven, draiva bilong siaman bilong NCDC i bin stap insait long ka wantaim sampela pren taim ol i bungim dispela birua.

Ripot i tok moa olsem bihain tasol long dispela, ol i bin salim olgeta dispela lain i go long Kens long Australia bilong kisim marasin long dispela apinun yet.

Ol ripot i tok tu olsem Graham wantaim pren biilong em i orait nau tasol long namba 30 de bilong mun Novemba, haus sik ripot i autim tok olsem Steven i dai pinis.

Wimen lida singaut long pasim Vanimo timba

FELIX RAMRAM i raitim

NAMBA tu siameri bilong Sandaun Wimens Kaunsil, Viola lagata i laikim Sandaun provinsal gavman long pasim ol wok bilong Vanimo Fores Prodaks. Na wok painimaut i mas kamap sapos Kampani i bin wok gut bihainim ol tok orait o nogat.

Misis. lagata i mekim dispela toktok bihainim wanpela wokabout bilong em i go long bungim ol mama insait long ol ples em Vanimo Fores i wok long katim diwai long en.

Long dispela lukluk raun bilong em, Misis lagata i lukim sindaun bilong ol mama na pikinini i no stret. Ples na haus slip i no gutpela tumas maski ol kampani i kam na katim timba long provins inap long samting olsem 25 na 26 krismas pinis.

Em i tok olsem em i bin go raun long Krisa na Bewani long go sindaun na toktok wantaim ol mama. Long wankain taim, em i bin traim painim aut long wanem kain sevis kampani i save givim long ol lain husat i stap long ol projek eria.

Na em i painim olsem kampani i no givim gutpela sevis tumas long ol pipel bilong dispela hap.

Ol stilman kisim K82,000 bilong Garamut Enterprise

GODFRIED NIAKA i raitim

WANPELA bikpela bakstua kampani long Wewak ol i kolim long Garamut Enterprise i lusim mani inap long K82,000 long han bilong ol stilman long Mande moning.

Ekting Provinsal Plis Komanda bilong Is Sepik, Inspekta Joe Morere i tok long Mande moning, wanpela wokman bilong Garamut Enterprise wantaim wanpela sekyuriti wasman i kisim dispela K82,000 i go long brens bilong Papua Niugini Benking Kopresen PNGBC long Wewak.

Taim tupelai go

kamap long beng na i laik go insait, 4-pela man i kam ausait long wanpela ka wantaim wanpela sot gan na ol naip. Em nau ol i henskapim tupela na katim sekyuriti ya na kisim beg mani long han bilong em na ol i kalap long ka na ranawe.

Inspekta Morere i tok dispela 4-pela stilman i kalap long ka na ranawe i go olsem long Kaindi. Taim ol i go kamap long Kaindi, ol i lusim ka long wanpela hap bus na ranawe.

Em i tok ka dispela 4-pela stilman i yusim i bilong haia ka kampani, Avis Rent A Car

long Wewak. Ol i bin hairim dispela ka long yusim na mekim dispela stil pasin.

Morere i tok ol plisman i no holim yet wanpela bilong ol dispela 4-pela stilman. Ol i painim ol yet.

Em i tok ol i kisim pinis sampela tok save long husat i wokim dispela stil pasin. Tasol ol i wok long sekap yet long painimaut olsem tok save ol i kisim i bin trupela.

Mista Morere i tok nau em Provinsal Lika Laisensing Bod (PLLB) i tingting long rausim tambu bilong bia long provins, hevi bilong lo na oda long provins bai go

bagarap gen.

Em i mekim dispela toktok bikos PLLB i wok long holim miting na paitim toktok long rausim tambu bilong bia long Is Sepik.

Long sait bilong bia, PLLB i tok orait na givim laisens i go pinis

Laimo kolim 1192 baset

i kam long pes 4

helpim em gavman i laik givim long wok didiman. Em i ting olsem dispela program i kamap long maus tasol na bai pinis olsem. No gat wanpela kaikai bai kamap long en.

"Mi toktok long dispela bikos Not Solomons i no bin kisim dispela mani long helpim wok kopra na bikpela depo bilong en long Buka.

"Not Solomons i gat bikpela nem long wok bisnis bilong kopra, tasol long dispela yia, gavman i givim gen K30 milien. Dispela em wankain mani tasol olsem ol arapela gavman bilong bipo i save givim."

THE NATIONAL

**gives you
the choice of...**

- * **Brighter, . . . more colourful pages!**
- * **Better in-depth reporting!**
- * **More news . . . more information!**
- * **More to interest everyone!**

THERE is now a new paper in Papua New Guinea - "The National".

It is a newspaper that reflects the national interests of our country, as the masthead, in the colours of the national flag, demonstrates.

With the new paper you now have an alternative and a choice... a more balanced diet of news about our country and ourselves.

"The National" is a bright and active paper, with many pages presented in colour. Get "The National" now!

**On Sale
Now!**

FROM STREET SELLERS
AND USUAL NEWS AGENTS

**THE
NATIONAL**

**A bold new
paper for PNG**

THERE is now a new paper in Papua New Guinea — The National. It is a newspaper to reflect the national interests of our country, as the masthead, in the colours of the national flag, demonstrates.

Gavman i mas givim bikpela mani long ol sios. Kerowagi taun i senis pinis

Dia Edita,

Mi rait long Wantok Niuspepa long autim wari bilong mi. Wari bilong mi i stap long ol sios husat mi ting inap mekim bikpela wok long daunim hevi bilong lo na oda long PNG. Tasol ol i no gat inap helpim long rait bilong mekim wok.

Tru, sampela wokman bilong ol sios i stap wok insait long ol oganaisesen na grup long kantri husat i laik daunim ol kain hevi bilong lo na oda.

Orait, i no gat wanpela taim mi harim long redio o ritim long ol niuspepa olsem gavman i givim bikpela mani i go long ol sios long PNG.

Ol hevi bilong lo na oda i wok long go bikpela moa. Planti manmeri i wok long dai long han bilong ol man nogut. Na pasin nogut bilong repim ol meri tu i stap long planti hap bilong kantri.

Baibel i tok klostu long las de, ol kain samting olsem bai i kamap. Tok propesi long Baibel em i tok bilong God. Na em bai i kamap tru.

Orait em i taim nau gavman i yusim ol sios long daunim ol kain hevi bilong lo na ada. Long taim gavman i givim pawa na mani i go long plis, sampela plisman i no yusim gut pawa. Ol i paitim man, kilim ol pik, kukim ol haus na ol kain samting nogut

olsem. Na dispela em i no pinisim pasin raskol.

Ating em i moagutpela long plis na ol sios i wok-bung wantaim long daunim ol hevi. Olsem na gavman i mas givim bikpela mani i go long ol sios long helpim dispela wok.

Orait, long taim gavman i givim mani long ol sios, em i mas glasim gut wok ol sios long kantri i mekim. Long bilip na lukluk bilong mi, ol Pentekostel sios long kantri i mas kisim bikpela mani. Taim mi save raun long maket ples na ol hap nabaut long taun, mi lukim ol Pentekostel sios i autim tok bilong God. Dispela em ol kain progrem we ol sios i ranim long bringim tok bilong God i kam long yumi ol manmeri we yumi i ken bihainim na tanim bel. Sampela sios i save stap nating na wetim Sande long mekim lotu.

Pasin bilong yusim gan na mani tasol i no inap daunim hevi bilong lo na oda. Olgeta sios i mas sanap long pablik ples, go aut long bus na autim tok. Na i no ken wetim tasol Sande: Oganaisim ol bikpela kruset we ol ewanjelikel sios i mekim. Olsem wanpela we i bin kamap long Popondeta long mun Ogas.

**Warambil Nava
Wewak**

Dia Edita

Mi bin raitim wanpela pas bilong wanpela brata nem bilong Joe Bruce Siwi. Long pas bilong em, em i bin komplem olsem Kerowagi taun i no senis liklik.

Mi laik tokim Joe olsem memba bilong Kerowagi John Kamb em i wanpela gutpela memba. Mista Kamb em i gat bikpela laik na tingting long helpim ol pipel insait long ol rureleria long Kerowagi.

Joe, yu gat bikpela bilip long memba bilong Kerowagi John Kamb. Tasol watpo na yu bin askim kain kain kwesten long Mista

Kamb.

Ol askim bilong yu, we yu bin askim, i ken go long tupela olpela memba-Yim Yer Waim na David Tul. Na tu long ol arapela olpela memba. Yu no ken givim dispela ol askim bilong yu i go long Mista Kamb. Bikos em i go insait long nesanel Palamen long nau tasol.

Mi ting olsem yu mas wanpela ai pas man ya. Bikos, sapos ai bilong yu i no pas, yu bai lukim ol samting Mista Kamb i wokim. I luk olsem yu mas wanpela man long nara-pela provins ya. Sapos yu no save, orait hia em sampela samting

Mista Kamb i wokim: Bikpela selebren long Independens De; opim gen Kerowagi haikul; baim Kerowagi yut ben; givim ol wilsia long ol bagarap pipel; vot long Palamen long sapatim fri edukesen skim; kamapim Kerowagi bihaiv projek na tu Kerowagi maket projek.

Brata, mi save olsem yu no stap long Kerowagi. Yu stap long arapela hap na raitim nating pas i go long *Wantok Niuspepa*. Sapos nau yu go long Kerowagi, bai yu lukim olsem taun i senis pinis.

**John Kair
Kerowagi, SIMBU**

Ol musikman mas lusim pasin bilong kopiket.

Dia Edita

Mi wanpela manki long hap bilong Baiyer Riva. Mi laik sapatim pas bilong Emil Kami bilong Wewak.

Long pas bilong em, Emil i bin tok olsem planti musikman insait long kantri i wok long kopiket long singsing bilong ol arapela musikman na meri long kantri.

Toktok bilong Emil em i wanpela trupela tok-

tok. Bikos tude planti musikman na meri insait long kantri bilong yumi Papua Niugini i wok long kopiket long singsing bilong ol arapela musikman na meri. Sampela taim ol i save bihainim stail bilong musik bilong ol arapela lain. Na long sampela taim ol i save bihainim nek o we bilong singim ol singsing.

Wanpela bikpela hevi mi luksave long planti o

sapos nogat olgeta musikman insait long kantri i olsem ol i save singsing tumas long ol meri. Ol i no tingting long komposim singsing long kain kain hevi i wok long kamap o i stap long kantri. Na tu pasin nogut gavman i wok long wokim o ol arapela samting we i no gutpela long sosaiti bilong mipela. Kain ol singsing olsem i ken helpim long senisim kantri bilong yumi i kamap wanpela gutpela kantri. Plis, traim na lusim dispela pasin bilong hapim tumas nem bilong ol meri.

Lusim dispela pasin na komposim ol arapela gutpela singsing na hapim nem bilong kantri, ples o provins

bilong yupela. Maski long strong tumas long hapim nem bilong ol meri.

Long sait bilong ol Gospel singa, mi nogat toktok. Bikos ol i wok long mekim gutpela wok long lipitapim nem bilong Bikpela Papa God. PNG em i wanpela Kristen kantri na wanem samting ol i mekim i gutpela.

Long pinisim toktok bilong mi, mi laik tok olsem em i moa gutpela long hapim nem bilong Papa God, Jisas Krai na Holi Spirit. Na i no long hapim nem bilong ol meri.

**Paul Mendaki Sipani
Baiyer River, HAGEN**

Em we bilong ol Tobaras

Dia Edita,

Mi laik bekim pas bilong man ya Kundil Sap bilong Kundiwa taun. Pas bilong em i bin kamap long *Wantok Niuspepa* bilong Oktoba 28. Long pas bilong em, em i no amamas long ol Tolaiman i pasim laplap na raun long taun insait long hailans.

Oke bos, mi wanpela boi Tolai na mi stap long Rabaul taun. Mi laikim yu Kundil long pasim maus na stap. Na no ken mekim kain toktok i go long ol man Tolai i pasim laplap na raun long taun long hap bilong Hailans.

Mi tokim yu bos, em i laik bilong wan wan man long putim wanem kain klos em i laik na raun long wanem hap kona bilong kantri. Sapos yu laik putim siot na trausis, em i orait. No gat man bai i toktok.

Laplap em i klos ol tumbuna bilong yumi i save putim. Na mipela ol Tolai i amamas long putim kastam laplap wantaim purpur na raun. Traim na kam daun long Barike taun. Yu bai lukim ol man i putim trausis na siot na sampela i pasim laplap, siot na basket o beg long sait na luk stail moa moa yet long taim ol i raun.

Em i no long Hailans tasol ol man Tolai i putim laplap na raun. Nogat ya. Long olgeta hap bilong PNG, mipela ol Tobaras i save putim laplap long laik bilong mipela yet. Bikos mipela i pilim gut long pasim laplap.

Long wan wan provins i gat stail bilong yumi yet. Traim na lusim ples bilong yu long Kundiawa na lukim long ai bilong yu stret long ol ples olsem long Momase, Sauten na tu long ol Ailan rijon. Rabaul em i Barike ples, Kavieng em Karanas o bilas ples, Wes Nu Briten em ples bilong Tavor na Bogenvil em i maus bilong Sankamap. Bai yu nap lukim kain bilas bilong ol man long ol wan wan rijon.

Stail bilong ol Sepik em long karim bbasket bilong em na raun. Ol Manus na Kavieng i gat stail bilong ol yet long karim basket na putim smel purpur i hangamap long basket na raun wantaim.

Yumi long kantri i gat fridom long putim wanem kan klos long laik bilong yumi. Husat manmeri i gat sampela toktok long dispela, rait i kam tasol long *Wantok Niuspepa* na bai mi ritim.

**John Burat
RABAU**

LAIKIM PENPREN

Nem: Jartis D. Soronane

Krismas: 19 (man)

Adres: Igam Barracks, Free Mail Bag Service, Lae, Morobe Province.

Save Laikim: Pilai soka, volibal, ragbi na raun.

Nem: Benson Gabsta

Krismas: 20 (man)

Adres: B.K. Trading, P. O. Box 52, Kerema, Gulf Province.

Save Laikim: Helpim pipel, pilai soka, basketbal, lotu, harim na singim ol singsing lotu.

Nem: Augustine Wanbein

Krismas: 11 (man)

Adres: P. O. Box 8, Vanimo, Sandaun Province.

Save Laikim: Musik, pilai ragbi, basketbal, volibal, raitim pas i go long ol poroman na, lukim piksa.


Nem: Thomas Tuanis

Krismas: 19 (man)

Adres: P.O. Box 423, Kimbe, WNB.

Save Laikim: Pilai soka, volibal, ritim Wantok Niuspepa, harim musik, raitim pas na senisim presen.

Husat i laik salim pas i kam long Edita i mas raitim stret nem na salim i kam long dispela adres: Pas i go long Edita, Wantok Niuspepa, P.O. Box 1982, Boroko, NCD.



Laplap em bun bilong ol Tobaras

Dia Edita,

Mi wanpela meri Kopex long Is Nu Briten provins. Tasol mi marit na stap long Dagua long hap bilong Is Sepik provins.

Mi laik bekim pas bilong brata ya Kundil Sap. Pas bilong em i bin kamap long *Wantok Niuspepa* long namba 28 de bilong mun Oktoba.

Brata ya Kundil long pas bilong em i bin komplem long ol man Tolai long Kundiawa na tu long ol arapela Hailans provins i save pasim laplap na raun long taun.

Mi laik tokim Kundil

olsem maski long jeles nating long ol manki Tobaras. Bikos dispela em i we na stail bilong mipela ol man na meri Tobaras. Em i laik bilong ol manki Tobaras long pasim laplap na raun long taun. Wanem samting tru i mekim na yu no save amamas long lukim ol manki Tobaras i pasim laplap na raun long taun?

Brata, plis yu no ken jeles nating. Laplap em i bun bilong mipela ol meri na man Tobaras. Yu ken putim trausis na raun long taun. Mipela i bihainim pasin bilong mipela em bipo ol tumbuna papa bilong

mipela i bin mekim.

I luk olsem wanpela meri Tobaras i mas pasim laplap na raun long taun. Na yu lukim em na aigris long em. Tasol em i no gat laik long yu. Olsem na yu giaman jeles na mekim kain toktok olsem long pas bilong yu. Tingim, mipela ol Tolai i no save komplem long yupela ol manmeri long Hailans i pasim purpur o malo na raun long taun. Bikos dispela em i pasin tumbuna bilong yupela.

**Rubble Billie
Warkokul
Dagua, WEWAK**

Plis, no ken bagarapim fridom

Dia Edita

Mi bin harim long ol arapela manmeri na tu ritim long niuspepa olsem gavman bilong Praim Minista Paais Wingti i wok long traim long senisim planti lo. Na putim kamap ol nupela lo we i bai bagarapim laip na fridom bilong ol pipel.

Long tingting bilong mi na tu bilong ol arapela gutpela manmeri, wanem samting gavman bilong Wingti i wok long mekim i no gutpela tumas. Bikos dispela ol nupela lo bai

i no inap long givim gutpela helpim i go long mipela ol manmeri bilong dispela kantri. Mipela ol pipel husat i stap long ol rurel eria bai kamap olsem ol kalabusman na meri bilong dispela ol nupela lo olsem ID kat sistem na Intenel Sekyuriti Ekt.

Ating gavman bilong Wingti i ting lus olsem PNG em i wanpela demokratik na Kristen kantri. Mipela ol pipel i gat rait long wokabaut raun long laik na tingting bilong mipela. Bikos dispela rait bilong mipela i stap

insait long Mama Lo bilong kantri.

Bipo long taim bilong tumbuna papa bilong mipela, i no gat dispela kain ol lo i bin stap. Ol tumbuna papa na papamama bilong yumi i bin wokabaut raun long laik bilong ol. No gat wanpela lo i stopim ol. Bikos dispela em i pasin bilong bungim wantok, pren na wanpesisin.

Gavman bilong Wingti i no tingting gut pastaim na mipela dispela samting. Ol i wok long wokim nating long laik bilong ol. Ol i no tingim ol pipel long

ples husat i votim ol. Ol i ting lus long na i laik tanim bek na mekim nabaut long ol wantaim dispela ol nupela lo ol i putim kamap. Olsem wanem. Yupela i kamap minista na memba long laik bilong yupela yet? Plis tingim, i gat ol pipel i stap husat i givim tok orait long yupela i kamap olsem ol bikman bilong gavman. Kamapim ol lo we bai i no inap kalabusim o bagarapim ol pipel.

**Rheimona Sompan
WEWAK**

Olgeta Hailans mas go bek long asples bring ol

Dia Edita,

Mi wanpela man Hailans na mi stap long ples bilong mi long Sauten Hailans provins. Mi gat bikipela wari stret long ol manmeri bilong Hailans rijon husat i stap long ol narapela provins. Moa yet long ol nambis provins.

Mi gat bikipela tingting na laik long olgeta manmeriHailans i mas kam bek long wan wan asples bilong ol.

Wanem hap kona yu go long dispela kantri, bai yu lukim ol manmeriHailans i pulap i stap. Na mi no amamas long lukim olsem planti long ol lain bilong mipela husat i stap long ol arapela provins i painim hevi na dai.


Mi mekim bikipela singaut i go nau long yupela

olgeta manmeri bilong Hailans rijon long kam bek long ol asples bilong yupela.

Ples bilong yupela i stap. Olgeta samting i stap. Mani, kaikai na wanem narapela samting yu ting yu nidim em i stap. Ol i no rausim yupela long ples bilong yupela na yupela i lusim ples. Tu ol trabel na hevi we i kamap long ol arapela hap i sut i go long yupela.

Plis harim singaut bilong mi, glasim na kam bek long ples bilong yumi. Bikos long nau, sampela ples long Hailans i sot long ol manmeri. Long wanem planti bilong yumi i lusim asples na stap long narapela hap bilong kantri.

**Humbra Kurpais,
Mendi,**



Sekim ol samting na salim

Dia Edita,

Mi laik autim liklik wari bilong mi long *Wantok Niuspepa*. Mi bin baim wanpela wilwil long stua bilong ol Saina long Kapore na mi no bin raun long en tasol em i bagarap pinis.

Taim mi kisim wilwil ya i go long haus na mi traim stia bilong en i krungut na sen i slek.

Orait, mi kisim bek wilwil ya i go bek long stua we mi baim long en. Taim mi toktok long papa bilong stua long sik bilong wilwil ya, em i tok em i no save long raun long kain wilwil olsem. Em i no traim long helpim mi na stretim dispela hevi.

Mi laik tokim ol papa bilong stua olsem yupela i mas sekim ol wilwil samting bipo ol kastoma i baim. No gut mipela ol kastoma i tromoi bikipela mani nating long ol samting i bagarap pinis.

**Joseph Savlu
KIMBE**

Ol Kange bosim Ela Bis long Mosbi

Dia Edita

Mi wanpela manki Kange (Hagen) tasol nau mi stap long Mosbi siti. Mi laik autim liklik wari bilong mi long wanpela samting mi lukim long ai bilong mi na mi no amamas. I no mi tasol. Sampela arapela gutpela Kange long Mosbi tu i no amamas long dispela samting.

Wari bilong mi i olsem long olgeta Sande ol yangpela manmeri long Hagen i save go na pulap long Ela Bis long Mosbi. Ol i save go long Ela Bis long 6 klok

BRA em i no giaman ami

Dia Edita

Mi wanpela manki bilong Sauten Hailans provins. Mi laik bekim pas bilong wanpela brata bilong Maun Hagen. Pas bilong em i bin kamap long *Wantok Niuspepa* long samting olsem wanpela mun i go pinis. Long pas bilong em, em i bin tok olsem BRA i no ol ami tru.

Brata, mi ken tokim yu olsem ol BRA i ami tru ya. Na ol i fit tru long pait. Yu tingim, ol liklik lain man tasol ol i fit tru long pait wantaim ol ami bilong kantri bilong yumi. Yu traim na tingim hamas ol lain ami, plis na woda plis na tu ol arapela man i bung wantaim na i wok long pait egensim dispela liklik lain man. Tasol ol i no pinisim ol yet. Sampela memba bilong BRA i bin holim wok olsem plisman, woda plisman na ami bipo. Olsem na ol i gat save long pait na abrusim birua.

Dispela hevi long Bogenvil i stap longpela taim nau. Planti manmeri long wol i save long dispela hevi. Na planti i wok long toktok long dispela hevi i mas pinis hariap. Bikos planti manmeri tru i dai pinis insait long dispela hevi.

Ol BRA i no olsem ol raskol man. Nogot. Ol i olsem wanpela lain ami. Olsem ami, ol i gat save na samting long pait wantaim wanpela arapela lain ami. Ol i kolim ol yet BRA bikos ol i save olsem ol i gat olgeta samting na save bilong pait egensim sekuriti fos bilong Papua Niugini.

Olsem na mi laik tokim brata ya long skelim gut tingting bilong em na mekim kain toktok olsem long niuspepa.

**Tonny David
MENDI**

long moning na stap i go inap long apinun.

Ol i save go na sindaun stori na lap i stap. Bihain ol bai kirap wokabout liklik na kam bek sindaun. Ol i no save go long Ela Bis long waswas long solwara. Ol i save go long Ela Bis long sindaun na stori na lap tasol.

Ol yangpela meri Hagen i no save isi long stailim ol yet. Ol i save pinisim stret olgeta kain stail bilong bilas. Ol i save pasim ol traipela laplap na long wankain taim putim ol taitpela liklik klos bilong ol meri ol i kolim top. Na ol yangpela man i save putim ol jin trausis na putim ol ragbi jesi. Na tu ol i save putim ol blakpela aiglas. Ol i save pilim hat long bikipela san tu o nogot. I luk olsem bodi bilong ol i mas i gat ea kondisen masin ya.

Ol wantok bilong mi, mi ting olsem em i taim nau yumi mas lusim

dispela kain pasin. Bikos Ela Bis em i no wanpela maket o ples bilong singing. Na yumi save dresap smat tru na go soim ol stail bilong yumi. Ela Bis ol i wokim long ol manmeri long go na waswas na kisim gutpela win. Na i no yu dresap olsem wanpela wokman o wokmeri na i go raun long hap.

Mipela sampela i luksave olsem i gat komplekain stail bilong mipela long dispela kain pasin mipela i save wokim. Na mipela i yusim het bilong mipela na lusim pinis dispela pasin. Tasol yupela arapela i wok long holim yet dispela pasin.

Plis tru ol wantok bilong mi, dispela em pasin bilong kisim sem ya. Na tu i ken bagarapim na daunim nem bilong mipela ol Hagen. Olsem na mi laik askim yupela long lusim dispela pasin.

**Naki Wanira
MOSBI**

Sekim gut Landwel timba kampani

Dia Edita,

Mi wanpela wokman bilong Lanwel Timba Kampani. Na mi laik autim wari bilong mi long *Wantok Niuspepa* long ol wokman long gavman na pablik i ken ritim na skelim.

Na tu mi askim Fores minista Tim Neville long sekap na lukluk gut long wok bilong Lanwel Timba kampani long Sentral provins. Sekim sapos kampani ya i bihainim tru lo gavman i putim long ol loging kampani o nogot.

Mi yet mi lukim sampela samting we kampani i wokim na mi no amamas. I luk olsem ol ovasis timba kampani i laik katim planti diwai hariap na mekim bikipela kwik mani. Na ol i no wari sapos ol diwai em ol yangpela. Ol i katim nating i go. Ol i no wari sapos ol i bagarapim ol diwai, bus, wara, abus na ol arapela samting i stap insait long bikbus bilong yumi.

Mi laik tokim gavman na Fores minista olsem bosman bilong dispela kampani (Lanwel) i putim ol kain kain lo insait long kampani long laik bilong em yet. Mekim na ol wokman i no amamas tumas.

Orait, sampela wokman i wok long aua na ol arapela lain i wok long kontrak. Na oda bilong menesa yet i tok long ol kontrak lain na tu ol dosa opereta long wok strong na katim planti diwai. Na ol i ken kisim bikipela pe.

Long dispela as tasol, ol senso opereta i no save kanim ol diwai. Nogot tru. Masi bikipela o liklik diwai, ol bai katim i go daun. Samting tru em ol i resis long katim planti diwai na kisim bikipela pe.

Long dispela as tasol, ol i bagarapim planti diwai nating. Asua i stap long menesa bilong dispela timba kampani.

Mi laik askim gavman sapos em i givim dispela tok orait long Landwel Timba kampani long mekim dispela kain samting long katim nating planti diwai. O olsem wanem, Lanwel timba kampani i bihainim lo aninit long kantri o long laik bilong em long mekim kwikmani. Na bagarapim planti ol yangpela diwai, wara, bus na abus.

Mi askim Fores minista long lukluk gut long kain giaman pasin bilong ol planti timba kampani long kantri.

Mi wok wantaim Landwel timba kampani na mi lukim dispela pasin we ol i wok long bagarapim ol diwai na bus bilong yumi. Na mi no amamas.

**Mathias H Roi
MOSBI**

LAIKIM PENPREN

Nem: Gary Bolten

Krismas: 13

Adres: P O Box 334, Kimbe, WNB

Save Laikim: Pilai ol kain kain spot, go long skul na lotu na raitim pas.

Nem: Gladys Kakraba Arthur

Krismas: 20 (meri)

Adres: Cape Vars, P O Box 017, Cape Coast, Ghana, West Africa.

Save Laikim: Ritim buk na harim musik.

Nem: Comfont A Baidoo

Krismas: 21 (meri)

Adres: Kokoado Avenue, P O Box 017, Cape Coast, Ghana, West Africa.

Save Laikim: Ritim buk, kukim kaikai, harim musik na danis.

LAIKIM PENPREN

Nem: Ofori Muhammed

Krismas: 21

Adres: C/-Barkisu Botchway, P O Box M 84, Accra, Ghana.

Save Laikim: Kukim kaikai na ritim buk.

Nem: Allan Sam

Krismas: 18

Adres: Apewosika Avenue, P O Box 017, Cape Coast, Ghana, West Africa.

Save Laikim: Waswas long wara na solwara, danis, pilai spot na harim musik.

Nem: Ebenzer Arthur

Krismas: 19

Adres: C/-Ebmund R C Korsal, Ghana Co-op Bank, P O Box 460, Cape Coast, Ghana, West Africa.

Save Laikim: Danis, harim pop musik na pilai kain kain spot.

Tingim Fraide olsem de bilong ol disebel

VERONICA HATUTASI i raitim

SIAMAN bilong Nesenel Disebel Bod na wampela disebel man yet, Tole Wia i laikim gavman long givim luksave long ol disebel pipel long kantri. Na tu long givim wankain sevis na helpim i go long ol olsem ol man husat i nogat bagarap long bodi bilong ol.

Disebel pipel em ol lain husat i gat sampela bagarap long bodi bilong ol. Na ol i no inap long wokabaut, sanap, sindaun na mekim ol kain wok olsem ol man nating.

Mista Wole i tok olsem gavman i no gat polisi o lo bilong lukau-

tim ol disebel pipel long kantri. Dispela i kamap ples klia long ol haus na rot insait long kantri, em gavman i no mekim sampela samting long helpim ol disebel pipel.

Sans bilong ol disebel pipel long kantri i kisim wok i no gutpela. Mista Wole i tok olsem i mobeta long gavman i luksave long samting ol disebel pipel i ken mekim na givim helpim i go long ol. Na em i noken lukluk tasol long samting em ol disebel pipel i no inap long mekim.

Long givim luksave long ol disebel pipel long wol na kantri, PNG bai makim intane-

senel de bilong ol disebel pipel long Fraide, Desemba 3. Het tok bilong dispela de em "Rait bilong sitisen na i no wok marimari".

I kam inap nau, ol non-gavman ogenaísesen wantaim ol lotu tasol i mekim wok bilong helpim ol disebel pipel long kantri. Em ol grup olsem long Sen Jon Ambulens bilong ol aipas man, PNG Rihabilitesen Senta, Red Cross Spesel Skul na Cheshire Hom. Ol ogenaísesen ya i save yusim namel long K100,000 na K200,000 insait long wan wan yia bilong helpim ol disebel pipel.

Wampela eksampel tasol we gavman i go

insait liklik long wok bilong helpim ol disebel em long Nason Paulias Projek long Is Nu Briten provins em wampela gavman opisa i go pas long en.

Na 12-pela provins insait long kantri i kisim helpim na sevis i kam long ol dispela non-gavman ogenaísesen long lukautim ol disebel manmeri. Na nesenel Disebel Bod i lukautim olgeta wok bilong helpim ol disebel long PNG.

Bikpela helpim wantaim mani i save kam long ol ovasis kantri long Yurop na Australia. Kristofel Blinden Misen long Jemeni, Asosiesen bilong ol Blain long Suva na Save the Childrens fan



• Wampela disebel man i wok long stretim ol flawa. Em i no wari olsem em i wampela disebel man na wok hat tru long stretim ol flawa pot.

Nau em i taim bilong mekim samting long sik AIDS

KAIN kain samting i bin kamap long ol provins bilong makim na luksave long Wol AIDS De long aste, Trinde 30 Novemba.

Het tok bilong 1993 Wol AIDS De em "Time to Act".

Dispela het tok i min olsem nau em i taim bilong mekim samting.

Long olgeta provins long aste, olgeta lain bilong helt long ol gavman na sios grup i bin kamapim ol kain kain pilai, drama na ol arapela samting bilong tingim dispela de.

Wok kempen bilong dispela sik nogut i bin stat long bipo yet, tasol long PNG em nau tasol.

Ol dokta na saveman bilong ol kain kain marasin i bin traime long painim marasin na kain kain rot bilong stapim dispela sik. Tasol i kam inap nau, no gat wampela i kamap yet.

Long Papua Niugini yet, ol ripot em Helt Dipatmen i kisim i soim olsem 13 provins wantaim Nesenel Kapitel Distrik i gat dispela sik pinis. Ol ripot i tok olsem i gat moa long 150 man na meri i karim nau binatangg bilong dispela sik.

Na 30 man na meri i dai pinis long sik AIDS.

Maski sik AIDS i bin kamap bipo yet na i stap i kam inap nau, no gat wampela marasin inap pinisim dispela sik long man o meri sapos em i kisim. Dispela sik i save stap long blut olsem na ol pikinini tu inap kisim.

Long wol tude, planti pikinini i kisim binatang bilong dispela sik nogut taim ol i kisim blut. Bikos binatang i stap pinis long blut na i kalap tasol i go

long ol taim ol i kisim blut. O sapos mama i gat ol dispela binatang, pikinini bai kisim taim em i stap insait yet long bel bilong mama.

Bikpela rot bilong ol man na meri long kisim dispela sik em long pasin pamuk. Olsem na wampela gutpela na stretpela rot bilong abrusim sik AIDS em long stap pas wantaim wampela man o meri tasol. Na no ken traime pinisim laik wantaim ol kain kain man na meri.


Bikos long ausait, man o meri i ken luk gutpela na nais moa. Tasol insait bilong em i bagarap pinis.

Long tingim Wol AIDS De long aste, kain kain samting i bin kamap tu long Mosbi.

Ol drama na tieta grup kampani wantaim wampela musik grup i bin kamapim ol kain kain pilai bilong sik AIDS long wol tude. Dispela i bilong helpim na kliaim tingting bilong ol pipel long wanem samting em i sik AIDS na ol rot bilong abrusim dispela sik.

Namel long ol lain husat i kamapim dispela program long Mosbi em ol lain bilong Tambaran Culture musik grup, ol lain bilong Katolik Karismetik Yut grup long Gerehu, Nesenel Kapitel Distrik Tieta na Yut A Fire grup bilong CRC Sios long Tokarara.

Ol lain bilong Wol AIDS De Plening komiti i bin go pas long kamapim ol dispela program long Mosbi.



• Okai na Linda i sanap ausait long B. C rum long Hagen Disebel Hom. Linda em i wampela long ol disebel meri husat i stap long hap.

em ol sampela ogenaísesen we i givim bikpela helpim wantaim mani long bod bilong ol disebel long mekim wok bilong en long PNG.

Aninit long tripela gavman Dipatmen bilong Hom Afeas, Yut na Relisen, Helt na Edukesen, Nesenel Bod bilong ol Disebel i

save kisim liklik helpim Gavman i save givim tasol K60,000 long wan wan yia.

Ten pesen bilong ol pipel long olgeta hap bilong wol i disebel. Ol

kain birua bilong ka na pilai i wokim man i disebel na ol kain kain sik we yumi no save tumas long as bilong ol.

Na long PNG yet, moa long 500 pipel i disebel. Bod bilong ol disebel long kantri i bin kirapim wok long Mosbi long yia 1984.

Orait, bilong makim dispela de bilong ol disebel pipel long Fraide, bod bai kamapim ol pilai na ol arapela samting bilong amamasim ol disebel lain.

Moa mani mas go long helpim wok bilong ol meri

MOA mani i mas long ol meri bilong kamapim wok bilong ol long kantri. Na dispela sapot i mas kam long gavman. Bikos em i mas kisim helpim bilong ol meri long daunim hevi bilong lo na oda long PNG. Het-meri bilong Nesenel Kaunsil bilong ol Meri, Josephine Abaijah i bin mekim dispela toktok bihain long em wantaim 6-pela wanwok bilong em i kam bek long wampela bung bilong ol meri long Filipin Ailan.

Faipela de bung long hap i bin stat long Tunde, Novemba 16 na pinis long Sarere, Novemba 20. Na moa long 500 meri i makim ol non-gavman ogenaísesen insait long Esia na Pasifik rijon i bin go na toktok long ol samting i karamapim wok bilong ol meri. Na wanem ol wok kamap ol meri i mekim long kantri na hap bilong ol.

Sampela bikpela toktok em i bin kamap long bung i sut long wok helt, envairomen, wok bilong katim timba, maining, edukesen, populesen, human raits, famili, saiens na teknoloji, bagarap we ol meri i kisim long han bilong ol man na planti arapela samting.

Insait long ol dispela 500 ol meri, 13 tasol i makim ol Pasifik ailan kantri. Sevenpela i makim PNG. Na i bin gat wan wan meri i makim Fiji, Vanuatu, Kuk Ailans, Guam, Tonga, na Solomon Ailans.

Bikos long ol liklik lain tasol i makim

Pasifik rijon, ol i no bin givim bikpela luksave long ol samting we i karamapim ol meri long dispela hap.

Olsem na ol bai kirapim wampela asosiesen bilong ol meri long Pasifik rijon yet bilong bung wantaim na tok tok long ol hevi na ol wok we ol meri i ken mekim long kamapim sindaun bilong ol insait long ol ples, ol komyuniti na kantri. Na tu bilong redim ol toktok bilong bikpela bung bilong ol meri em bai kamap long Beijing insait long Saina long yia 1995.

Mis Abaijah i tok dispela bung long Filipin Ailan i bin givim sans long ol meri husat i makim PNG long redi gut long wanem samting ol bai toktok long en long ol kain bikpela bung olsem.

Tasol em i no bin amamas long lukim ol meri bilong ol narapela kantri i kirap na givim toktok long ol samting insait long PNG. Tok piksa long dispela em taim wampela meri Fiji na narapela meri Vanuatu i bin givim sampela toktok long ol samting i kamap long PNG. Na sampela samting em ol i bin tokaut long en i no stret tumas.

Olsem na em i strongim ol meri PNG yet long redi gut long sanap makim kantri long ol bikpela bung olsem.

Dem Abaijah i laikim tu ol meri long gat wampela haus buk bilong ol yet long putim wantaim ol buk, pepa, piksa na ol arapela samting bilong ol,

Intanesenel Red Cross salim tupela man

TUPELA memba bilong Intanesenel Federesen bilong Red Cross (IFRC) i stap pinis long Bogenvil bilong helpim ol wok bilong Red Cross long ailan.

Tupela i lusim Mosbi long Fraide, Novemba 26 na go long Wakunai, hap em PNG Red Cross opis i stap long en.

Tupela man ya em David Lynch bilong IFRC hetkwata long Swisalen na David Butt, man husat i makim Pasifik na Australia na i stap long Australia.

Mista Lynch bai wok olsem Bogenvil liesen opisa bilong Red Cross long Rabaul inap long 6-pela mun. Em bai wok long stretim olgeta helpim bilong marasin, kaikai, klos na ol arapela samting i kam long ol arapela kantri na insait long PNG i go long ol pipel long Bogenvil.

Deputi siameri bilong PNG Red Cross Sosaiti, Sue Darby i tok olsem ol bai go het yet long ol wok bilong givim banis sut long ol liklik pikinini long ailan stat long mun Janueri long neks yia. Ol bai yusim hap mani em IFRC i bin bungim long wanpela apil bilong en long ol ovasis kantri long dispela yia. Olgeta mani wantaim em K500,000.

Tasol sosaiti i yusim pinis sampela hap mani long baim ol samting bilong ol kea senta pipel insait long Not Solomons.

IFRC i laikim tu wanpela savenes bilong en long

kam long kantri na helpim ol helt woka long Bogenvil wantaim ol imunaisesen progrem. Long nau yet, ol i wok long stretim ol pepa bilong nes ya long kam wok long hia.

Long wankain taim tu, planti famili, manmeri na ol kampani insait long PNG i givim pinis ol klos na ol narapela samting bilong helpim ol pipel insait long ol kea senta long Bogenvil.

Misis Darby i salim bikipela tok amamas i go long ol dispela pipel husat i gat tingting long helpim ol pikinini, meri na man husat i kisim taim nogut long ol hevi bilong Bogenvil.

Em i tok long dispela wik, sampela kampani i harim gen wanpela apil bilong ol liklik samting olsem Krismas presen i go long 4,000 pikinini husat i stap long Bogenvil, Morobe na Madang provins em bikipela guria bilong Oktoba 13 i bin bagarapim. Na tu long ol pikinini husat i stap insait long sampela hap bilong Sentrel provins we hevi bilong draipela san i bagarapim ol.

Misis Darby i tok bikipela bensin kampani, Shell PNG i givim samting olsem 1,000 hanwas i go long Red Cross opis bilong dispela apil. Fortuna haus kaikai long Mosbi tu i givim pinis moa long 4 tausen katen twistis i go long amamasim ol pikinini bilong ol hap i gat hevi.

Tonu haiskul bai kisim moa studen

VERONICA HATUTASI i raitim

TONU haiskul insait long Saut Wes Bogenvil bai kisim moa sumatin long neks yia. Na namba bilong ol sumatin bai go antap long 40.

Siaman bilong Saut Wes Interim Atoriti, Nick Peniai i tokaut olsem dispela i kamap long wanem hap bilong Bahasi na Nagovis i kamap gut nau. Bikos ol i stap nau long

lukaut bilong gavman. Na ol sumatin bilong dispela tupela hap inap long go skul long Tonu haiskul long 1994.

Tonu haiskul em i namba 4 haiskul bilong provins long op gen na kisim ol sumatin. Tupela bilong ol haiskul ya i stap long Buka distrik, em long Hutjena na Tarlena. Na Atols eria we i karamapim ol liklik ailan olsem Nissan, Katerets, Nuguria, Motlok na Tasman i gat Nissan haiskul long hap bilong ol.

Long bikiples Bogenvil, Asitavi long Wakunai na Tonu haiskul i op i stap. Rigu haiskul long Sentrel Bogenvil na Buin haiskul long Saut Bogenvil i stap pas yet. Bikos ples i no orait yet.

Long nau, Tonu haiskul i gat samting olsem 150 sumatin bilong Siwai eria tasol. Skul i mekim ol wok bilong en long hap bilong olpela DPI stesin long Konga. Bikos hap we Tonu haiskul i stap long en i no orait tumas.

Mista Peniai i tok olsem skul bai stap yet long Konga long narapela tupela yia inap olgeta samting i kamap orait long ples. Na bihain ol bai srukim i go long olpela hap bilong en long Tonu.

Em i tok moa olsem klostu foapela nupela klasrum na ol haus slip bilong ol sumatin bai pinis nau. Ol bikman bilong skul i lukim nid long wokim moa haus slip bikos planti moa sumatin bai go skul long 1994.

Long dispela yia tu, ol gret 10 sumatin tasol i bin slip long skul.

Hombru na strongpela dring kamapim moa hevi

i kam long pes 2

plis long lukautim lo na oda na lukim olsem gutpela sindaun bilong ol pipel long ples i stap yet.

Provinsal Plis Komanda, Sief Inspekta Joel Kean i tokim kibung olsem rabis pasin we sampela pablik sevan na ol lain bilong sekuriti fos i mekim long spak nabaut i soim tru olsem

ol i no gat rispek long lo bilong kantri.

Mista Kean i tokim ol pipel long ripot kwiktaim long ol man husat i brukim lo na wokim trabel bihain long ol i dringim hombru na ol narapela strongpela dring. Na bai lo i stretim ol.

Em i tambu yet long kisim ol strongpela dring i go long Not Solomons provins stat long

taim gavman i go bek long ailan long 1991.

Tasol long ol ripot bilong ol sekuriti fos na plis, sampela lain i wok long haitim ol strongpela dring long Rabaul na ol arapela ples ausait na karim i go long Bogenvil.

Sampela i save haitim gut ol botol strongpela dring na salim i go long ol wanlain bilong ol long Buka. Ol ami

na plis i save pinis long dispela samting. Na ol bai was gut nau na givim mekim save long husat manmeri ol i painim i rong long mekim dispela samting.

Mista Kean i askim tu olgeta pipel long wok wantaim ol plis long daunim hevi bilong strongpela dring na hombru we i wok long kamap bikipela long planti hap bilong ailan.

Welcome to MBA

- AGAUN
- ALOTAU
- AMAZON BAY
- ARAGIP
- BAMURU
- BALIMO
- BINGUNI
- CAPE VOGEL
- DARU
- ESA ALA
- FANE
- QUASOPA
- IHU
- IOKEA
- KAMUSI
- KEREMA
- KIKORI
- KITAVA
- KWINGA
- KURI
- LAE
- LESE
- LOSUIA
- MALALAU
- MENDI
- MISIMA
- NOWATA
- ONONGE
- POPONDETTA
- PORT MORESBY
- PUMANI
- RABARABA
- SAFIA
- SALAMO
- SEHULEA
- TABUBIL
- TAPINI
- TERAPO
- TUPI
- VIVIGANI
- WANIGELA
- WEDAU
- WOITAPE

CENTRAL RESERVATIONS 250555

MENDI ALOTAU 591060 611591

MEDIVAC

Pressurised & non pressurised aircraft
24 hours a day

VIP CHARTERS

Two seater to 19 seater to suit requirements

CARGO CHARTERS

Fast direct service

MBA

Anytime, anywhere

VISADD 0989

PROVIDING AVIATION SERVICES THROUGHOUT PAPUA NEW GUINEA

BISNIS LONG PAPUA NIUGINI

Boi Solomon Ailan em hapman stret bilong wokim masin bilong wasim klos

KOPRA

Pe bilong kopra i go antap nau long K50 long wan wan tan long dispela yia. Pe bilong ol bikpela depo olsem Mosbi, Alotau, Lae, Madang, Wewak, Kavieng, Toboi, Kimbe na Kieta i stap olsem:

Smoke	K250
F.M.S	K250
Hot Air	K255

Na pe bilong kopra long ol liklik depo i stap olsem:

SAMARAI	Smoke	K218
	F.M.S	K220
	Hot Air	K203
KANDRIAN na NAMATANAI	Smoke	K215
	F.M.S	K217
	Hot Air	K220
BUKA	Smoke	K214
	F.M.S	K216
	Hot Air	K219
FINSCHHAFEN	Smoke	K210
	F.M.S	K212
	Hot Air	K215
LORENGAU	Smoke	K205
	F.M.S	K207
	Hot Air	K210
KARKAR	Smoke	K215
	F.M.S	K217
	Hot Air	K220

CMB nau bai i no inap long kisim moa prais sapot long Gavman. Dispela i stat long Janueri 1, 1993.

KAKAO

PRAIS bilong drai kakao long wanwan tan long Rabaul long Mande inap long Fraide long las wik.

Mande	Tunde	Trinde	Fonde	Fraide
22/11	23/22	24/11	25/11	26/11

Pe ol baiya sasim long papa bilong fementri

K713	K711	K719	K719	K707
Sapot prais				
K500	K585	K585	K585	K585

Prais ol papa bilong fementri i kisim

K1213	K1296	K1304	K1304	K1292
-------	-------	-------	-------	-------

Sapot prais bilong kakao long dispela mun em K628.95. Dispela prais i no wankain olsem pe bilong kakao long ol narapela hap bilong kantri.

KOPI

Pe bilong drai arabika na robusta kopi long wanwan kilogram long Nov 21, 1993. Dispela i karamapim prais bilong kopi long dua bilong faktori, na i no long sait bilong rot.

Arabika :		
National	K110 to	166
Kainantu	K160 to	166
Goroka	K162 to	165
Kundawa	K150	
Minz na Banz	K140 to	145
Wapenamanda		
Mendi		
Hagen	K135 to	145
Lae	K120 to	140
Erap	K130	
Mumeng	K140	
Wau/Bulolo	K110	
Madang	K130	
Wasu	K120	

Ol ripot i kam long Kopi Industri Kopresen. Mipela i no kisim ripot bilong Kundiawa, Wapenamanda, Mendi, Erap, Aseki, na Wasu.

Robusta :
Is Sepik K90 to 100
Ripot bilong ol arapela senta husat i save groim robusta kopi i no kamap.

RABA

Gavien faktori (ESP) - 21 1/2 kg
Doa faktori (Sentrel) - 36 1/2 kg inap long 39 1/2 kg

KADAMON

Prais bilong kadamon em A. T. Agri Agency Pty Limited long Madang i tokaut long en i stap olsem:

Drai long san:	K1.40
Hot Air Drai: Yelo/Wait:	K2.25
Hot Air Drai: Grin:	K3.25
Pikinini Kadamor:	K2.50
Lombo gret wan:	K1.60
Lombo gret tu:	K1.40
Lombo gret tri:	K0.80
A. T. Agri i lukautim Kobum Spice em i stap long Bundi we planti ol kadamon i save kam long en.	

PRAIS BILONG OL BENSIN

Kos long wanpela lita

Ex Pump (wantaim takis)	
Petrol	50.5 toea
Diesel	39.3 toea
Kerosin	45.5 toea

GODFRIED NIAKA i raitim

PARTINSON Bekala em i wanpela sumatin bilong Pasifik Adventis Koles (PAC) long Mosbi. Em i marit na i bilong Solomon Ailan.

Mista Bekala bai greduet wantaim Basela bilong Ats (BA) long Edukesen long PAC long namba 25 de bilong dispela mun (Desemba). Bihain long em i greduet, em bai go bek long Solomon Ailan na holim wok olsem tisa long wanpela haikul long hap.

Dispela man bilong Solomon Ailan em i wanpela saveman stret. Bikos em i wokim wanpela masin bilong wasim ol klos. Dispela masin em i wokim i no inpa yusim lektrik pawa. Nogat tru ya. Lektrik pawa bilong yusim dispela masin em i wokim long wasim ol klos i stap long han bilong man tasol.

Hia em stori bilong watpo na Partinson i wokim dispela masin bilong wasim klos.

Long pinisim skul bilong em na greduet na kisim setifiket bilong BA long Edukesen, em i mas wok long wanpela projek. Dispela projek em i hap bilong kos bilong em. Dispela projek i tok olsem em i mas luksave o painim wanpela hevi. Na i mas painim wanpela rot bilong stretim dispela hevi.

Em i tingting i go na luksave olsem taim meri bilong em i save wasim ol klos long han, em i save pilim pen long baksait bilong em, lek bilong em i save pen long sanap longpela taim na nek bilong em i save pen taim em i putim het i go daun na wasim ol klos.

Em nau Partinson i kamap wantaim tingting bilong wokim wanpela kain masin bilong wasim ol klos. Dispela masin em i ting bai pinisim oldispela hevi meri bilong



• Partinson i putim sampela klos i go insait na traim masin em i wokim.



• Partinson Bekala (hansut) i small wantaim na tok klia long ol niusman long we bilong yusim dispela masin bilong wasim klos em i wokim. Meri bilong em Setina i sanap long sait bilong hansut bilong em. Long sait bilong hansut bilong meri bilong Partinson em wanpela tisa bilong PAC.

em i save bungim taim em i wasim ol klos.

Bihain long em i luksave long dispela hevi, Partinson i kisim klostu 10-pela wik long mekim ol rises wok long rot em bai bihainim long wokim dispela masin. Long ol rises wok bilong em, Partinson i lukluk na stadi long ol masin bilong bipo, ol nupela masin bilong wasim klos, rot ol masin i save wok, wanem samting i save mekim masin long wok na tu ol arapela liklik samting. Em i raitim pas na salim i go long Australia na askim sampela kampani husat i save wokim masin bilong wasim klos long helpim em na givim em tingting. Long wankain taim, em i lukluk tu long wanem ol samting em bai yusim long wokim dispela masin. Na tu em i lukluk long we bilong putim dispela ol samting wantaim long kamapim dispela

masin. Bihain long dispela 10-pela, em i redi long statim wok bilong wokim dispela masin. Skul i helpim em na baim wanpela samting ol i kolim barel long wanpela bia kampani long Mosbi ol i kolim long Fairdeal Liquors. Em i baim dispela barel long K25. Em i baim tu sampela skru, bolt na nat, em i kisim sampela hap ain, wanpela hap sotpela raba hos na wanpela samting i save stap insait long masin bilong wasim klos ol waitman i wokim long faktori. Nem bilong dispela samting ya em akiteta.

Taim em i bungim dispela olgeta samting pinis, em i katim barel long namel. Bihain em i wokim wanpela liklik hol aninit long wanpela hap bilong barel em i katim. Na em i putim sotpela raba hos i go insait na pasim long nat. Bihain gen em i joinim agiteta ya long wanpela hap ain na pasim long nat. Taim em i pinisim dispela wok, em i kisim wanpela praitpela hap ain na i go long woksap bilong skul na weldim wanpela hap stretpela ain long en. Bihain em i joinim dispela hap ain i gat agiteta long en long dispela hap ain em i bin weldim long dispela praitpela hap ain. Em nau olgeta wok i pinis na masin i kamap.

Rot bilong yusim dispela masin long wasim klos i olsem: Pulumapim dispela hap barel wantaim wara. Putim ol marasin o sop bilong wasim klos olsem Omo i go insait. Apim handel bilong masin i go antap na i go daun na marasin bai tanim tanim wantaim wara. Bihain putim ol klos i go insait na hapim handel bilong masin i go na i go daun. Mekim olsem inap long samting olsem 10 o 15 minit. Taim yu mekim olsem, agiteta i apim wara i mekim wara long tanim tanim. Na long wankain taim wara i sekim ol klos na rausim doti. Bihain long dispela, wasim ol klos long klintpela wara na hangamapim long lain.

Em tasol. Long apinun, rausim ol klos long lain na kisim i go insait long haus.

PE BILONG AIR NIUGINI LONG PNG TASOL

KISIM LONG I GO LONG PE BILONG	PE BILONG	
	BALUS	KAGO
POM Alotau	K101	K1.01
POM Daru	K117	K1.17
POM Goroka	K114	K1.14
POM Hoskins	K140	K1.40
POM Kavieng	K234	K2.34
POM Kundiawa	K113	K1.13
POM Lae	K96	K0.96
POM Madang	K129	K1.29
POM Manus	K206	K2.06
POM Mendi	K136	K1.36
POM Misima	K155	K1.65
POM Mount Hagen	K132	K1.32
POM Popondetta	K58	K0.58
POM Rabaul	K187	K1.87
POM Tabubil	K189	K1.89
POM Tari	K153	K1.53
POM Vanimo	K234	K2.34
POM Wapenamanda	K141	K1.41
POM Wewak	K180	K1.80

Ol kago em hevi abrusim 16kg bai gat pe

Exchange Rates

PNGBC

Bank buys at:	Notes	T/T
Australia	1.5632	1.5307
USA	1.0604	1.0320
UK	0.7243	0.6963

Bank sells at:	
Australia	1.5197
UK	0.6925
USA	1.0240
Solomon Islands	3.2232
China	5.8420
Fiji	1.5410
Hong Kong	7.8802
India	31.454
Japan	102.61
New Zealand	1.8241
Philippines	28.087
Singapore	1.6304
Switzerland	1.5264
Germany	1.7209

Gold rates (in US\$):	
per ounce	\$372
per gramme	\$11.96

Namba bilong ol pis fama long Isten Hailans go antap

SAPE METTA I raitim

LONG planti hap bilong hailans rijon nau, ol pipel i lukautim ol pis. Em bilong ol long kaika taim ol i kamap bikpela.

Egrikalsa divisen bilong Isten Hailans provinsal gavman i tingting long helpim ol pis fama bilong provins long lukautim pis. Olsem na dipatmen bai wokim wanpela raunwara long Goroka bilong lukautim ol liklik pis. Na husat man i laik lukautim pis i ken kisim ol long hap.

Tasol long nau, ol pis fama bilong provins i bungim hevi bikos Fiseris Rises Senta long Aiyura i no inap long saplaim ol fama wantaim inap kiau bilong pis. Dispela samting i kamap bikos planti man tru i laik lukautim ol pis.

Olsem na long las wik, samting olsem 50 pis fama bilong Bena, Unggai na Henganofi i bin bung long wanpela fil de bilong kisim moa save long wok bilong lukautim pis.

Wanpela opisa bilong DPI long provins i tokaut olsem Isten Hailans provins i gat moa long 200 pis fama nau.



•Wanpela bikman bilong Saidor long Madang provins i opim egensi opis bilong Kopra Maketing Bod long Saidor.

Pukpuk bisnis kirap long Wara Ramu

PIUS IKUMA I raitim

OL SKIN pukpuk bilong Wara Ramu insait long Madang provins i ken

painim gutpela maket na prais sapos ol pipel bilong hap i wok strong long kirapim pukpuk projek bilong ol yet.

Dispela em ol tingting

planti asples pipel bilong ples Bangapela long Midel Ramu i bin autim long taim ol i opim wanpela pukpuk projek long las wik.

Paul Kivu bilong ples Bangapela i bin opim nambawan pukpuk projek bilong Ramu eria long las wik. Em i kirapim dispela projek

wantaim mani inap long K70,00. Egrikalsa Beng i bin helpim Kivu wantaim K57,000 bilong kirapim na go strongim projek bilong em. Long dispela mani, beng i givim K26,000 olsem Les Developmen Eria Projek Skim.

Mista Kivu i gat bikpela sapot i kam long ol pipel bilong ples long dispela pukpuk projek bilong em.

Em i tok dispela projek bai helpim tru ol wok bisnis bilong ol asples pipel. Long wanem inap long longpela taim pinis, ol ausait man i paulim ol gut tru long inap mani bilong ol yet. Na ol i no save peim gutpela mani long skin pukpuk bilong ol.

Long nau yet, Mista Kivu wantaim ol lain bilong em i digim pinis 20 raunwara na banisim long waia bilong putim ol pukpuk na lukautim ol.

Em i painim pinis maket bilong salim ol skin pukpuk bilong em.

Groa asosiesen no amamas olsem prais sapot i bin senis

PAPUA Niugini Groas Asosiesen (PNGGA) i no amamas long nesanel gavman i laik senisim prais sapot bilong kopi, kakao na kopra.

PNGGA i tok gavman i bin tokaut long givim prais sapot. Tasol nau em i laik senisim gen dispela tingting bilong en.

Nesanel gavman i bin tokaut olsem em bai givim prais sapot i go long kakao-K1,300, kopi-2,300 na kopra-K250 inap long 5-pela yia stat long las yia.

Presiden bilong PNGGA, M. J. Manning i tok long givim komoditi prais sapot em i wanpela gutpela rot bilong helpim planti manmeri. Na long senisim dispela prais sapot bai bagarapim planti pipel husat i gat bilip long gavman. Bikos ol i amamas olsem gavman i gat bikpela tingting long helpim ol.

Mista Manning i tok kopra bisnis i save helpim samting olsem 40,000 pipel long Papua Niugini. Na ol bai bungim bikpela hevi taim senis i kamap. Planti pipel i no inap long wokim kopra na salim. Bikos long nau yet, prais i stap olsem K250 long wan wan tan. Tingting bilong gavman long daunim prais sapot mani bai kamapim hevi long planti lain.

Em i tok PNGGA i askim nau gavman long tingting gen long tingting bilong em long daunim sapot prais bilong kakao, kopi na kopra. Bikos dispela i no inap long helpim ol pipel husat i mekim wok bilong kopra, kakao na kopi.



Potnait Fraide ... Long olgeta potnait wik Fraide, liklik taun bilong Kundiawa long Simbu provins i save pulap tru. Bikos ol lain famili bilong ol gavman woka na ol arapela lain i save kam long taun. Sampela i gat wok tasol ol arapela i raun bilong painim ol wantok na pren. Hia em ol biklain i bung ausait long provinsal gavman opis. Foto: Michael Koma.

Steamships tok long skruim wok helpim long komyuniti

LOUIS WARIMI I raitim

STEAMSHIPS Treding Kampani long Mosbi long Novemba 27 i bin givim foapela bikpela

haus i go long Jisas Hapwe Senta long Morata. David Copland, Men-

esing Dairekta bilong Steamships Treding Kampani long Papua Niugini i givim ol haus ya long Pasto Charles Lapa bilong Jisas Hapwe Senta. Prais

bilong dispela foapela haus em K60,000. "Dispela em i wanpela bikpela mekim bilong wok Steamships Treding Kampani i wok long traime na daunim pasin

bilong raskol insait long Papua Niugini," Mista Copland i givim dispela toktok long liklik bung kaikai bilong givim ol haus long Novemba 27.

wanpela woksap bilong senta long neks yia.

Insait long dispela woksap, ol yangpela man na meri bilong senta bai lainim wok kamda, stretim ol lektrik masin, buk kiping, besik akaunting na ol narapela opis wok. Dispela bai helpim ol long redi long komyuniti bilong ol taim ol i lusim Jisas Hapwe Senta.

Pasto Lapa husat i tok tenku long Steamships i tok olsem: "Long Baibel, olgeta samting i save wok wantaim long ol manmeri husat i laikim tumas Bikpela na yumi mas pasim i go."

"Mipela bai amamas

sapos yupela i ken wok wantaim mipela long planti yia moa," Pasto Lapa i tok.

Em i tok dispela na tingting long 1973 taim Hapwe Senta i bin bungim planti hevi. Tasol em i tok tu olsem em yia bilong blesing tu bikos ol kampani olsem Steamships, Hertz Rent a Car, Vari-form, Trukai Rice Industries, The Professionals na planti moa insait long kantri i bin helpim senta.

Nau yet i gat 6-pela Jisas Hapwe Senta insait long kantri. Em long Mosbi, Lae, Mendi, Popondetta, Kimbe na Rabaul.

Wau gat kampani bilong prinim ol singlis

ARI GUH DANDEE I raitim

WAU distrik insait long Morobe provins nau i gat wanpela nupela kampani husat i wok long prinim kain kain stail samting long ol singlis.

Dispela nupela kampani i bin stat long dispela yia. Long statim ol wok bilong en, kampani i prinim ol singlis na yunifom bilong wanpela ragbi lig klap bilong Wau taun long las wiken.

Mausman bilong dispela kampani i tokaut olsem dispela em i namba wan taim bilong ol long prinim

ol klos.

Mausman ya, Brown Shem i tok em i bin amamas tru long wokbung wantaim wanpela arapela printa, nem bilong em Brown Bangan, long kamapim dispela nupela printing kampani.

Mista Shem i tok ol i ken prinim ol kain kain stail na nem long ol singlis. Em i tok tu olsem ol i redi long sapatim ol spot klap long prinim ol yunifom bilong ol.

Em i tok ol arapela grup ol i tingting long helpim em ol yut grup, ol sios, skul na tu ol arapela grup husat i laikim nem antap long ol singlis o yunifom bilong ol.

Progrem bilong Jant long planim gen diwai wok gut

GODFRIED NIAKA | raitim

WOK bilong katim diwai na salim i go long ol ovasis kantri i wok long kamap bikipela moa yet insait long Papua Niugini.

Planti diwai kampani i kam insait pinis long kantri na mekim ol dispela wok.

Dispela i no min olsem i no gat hevi i kamap. Nogat. Kain kain hevi i wok long kamap bihainim ol dispela wok. Wapela bikipela hevi em i olsem ol papa graun i wok long komplek na sutim tok long ol timba kampani long bagarapim bus, graun, wara na solwara bilong ol. Ol i komplek tu long ol kampani i no baim ol gut long katim diwai long bus bilong ol na salim i go long ovasis.

Wapela bilong ol dispela kampani em Jant.

Jant i stap katim diwai nau insait long hap bilong Gogol/Naru long Madang provins. Em i stap wok long hap inap long klostu 22 yia nau.

Tasol wok bilong Jant i no wankain olsem bilong ol arapela timba kampani insait long kantri. Wok bilong Jant i narakain.

Jant i no save katim diwai na salim i go long ovasis. Na tu em i no

save katim diwai na wokim timba.

Jant i save katim diwai long Gogol/Naru na bihain em bai kisim i go long hap bilong ol long Madang taun. Taim ol diwai i go kamap long faktori, ol diwai i save go insait long wapela bikipela masin. Dispela masin i save katim ol diwai i go liklik liklik na kamap sodas. Bihain nau bikipela sip i save kam na kisim ol dispela sodas i go long ol ovasis kantri.

Olsem mi tok pinis, Jant i katim diwai insait long hap bilong Gogol/Naru klostu 22 yia nau. Jant i katim diwai long tripela hap olgeta. Dispela em long Gogol-49,800 hekta, Naru-15,800 hekta na Barum-9,500 hekta.

I kam inap long dispela yia, olgeta diwai insait long ol dispela hap i pinis nau. I no gat planti diwai i stap. Wapela liklik hap tasol i stap na Jant i wok long katim diwai long em.

Taim Jant i bin statim wok long 20 yia i go pinis, ol bikman bilong kampani i luksave olsem bihain long sampela yia, olgeta

diwai long Gogol, Naru na Barum bai pinis. Na kampani bai painim nupela bus gen bilong katim diwai. Tasol ol i luksave olsem dispela i ken kamapim sampela hevi.

Bikos long dispela, ol bikman bilong Jant i kamapim tingting bilong planim gen diwai long ol hap em kampani i katim pinis long en. Dispela i min olsem sapos kampani i katim diwai long wapela hap graun em mak bilong en em inap long 45 hekta, em bai planim gen ol kain diwai olsem teminalia o akesia long dispela hap graun. Ol i kolim dispela kain wok riforestesen.

Jant i statim dispela progrem long 1975. Long dispela taim i kam inap long 1979, Jant i traime dispela progrem na i painim olsem ol diwai ol i panim i kamap gut. Em nau ol i go het na planim diwai long olgeta hap em ol i katim diwai long en.

I no Jant tasol i bihainim dispela riforestesen progrem. Ol papa graun tu i wok long bihainim dispela progrem.


Long sait bilong ol papa graun, kampani i save givim ol ol liklik diwai. Na ol bai planim long hap graun bilong ol em kampani i bin

katim diwai long en. Ol papa graun bai planim na lukautim ol diwai i go inap ol i bikipela na winim 8-pela krismas.

Em nau kampani bai katim ol gen na salim. Bihain kampani bai givim royalti mani i go long ol papa graun.

Kampani i save baim tu ol papa graun long klinim na lukautim ol diwai bihain long ol i planim.

Piksa bilong dispela: sapos wapela papa graun i gat 45 hekta graun, kampani bai givim em fri ol liklik diwai bilong planim. Sapos dispela papa graun i klinim na lukautim ol diwai, kampani bai baim em. Rot bilong baim dispela papa graun ya i olsem: sapos em i katim gras raunim as bilong wan wan diwai, kampani bai baim em long K15 long wan wan hekta. Sapos em i katim gras bihainim wan wan lain diwai, kampani bai baim em K30 long wan wan hekta. Na K40 long wan wan hekta sapos em i katim gras na klinim olgeta dispela 45 hekta. Dispela i min olsem sapos em i klinim dispela 45 hekta, kampani bai baim em K1,800 (45 hekta x K40). Sapos em i klinim tasol as bilong wan wan diwai, kampani bai



• Menesing Dairekta bilong Jant-Junji Fukushi (hankals) long ka), wapela eksekutyv bilong Jant (hansut) wantaim wapela opisal bilong Embasi bilong Siapan long Mosbi i lukluk long sampela liklik diwai ol wokman bilong gavman i laik kisim i go planim. Forestri dipatmen i gat ol plantesen tu long Gogol/Naru erla.

baim em K675 (45 hekta x K15). Na sapos em i klinim ol diwai bihainim wan wan lain diwai, kampani bai baim em long K1,350 (45 hekta x K30).

Sapos wapela papa graun i les long planim, klinim na lukautim ol diwai, em i ken kisim ol arapela manmeri long mekim ol dispela samting. Na kampani bai baim ol long planim, klinim na lukautim ol diwai bilong em. Taim ol diwai i go kamap bikipela na winim 8-pela krismas, kampani bai katim na bihainim givim royalti mani i go long dispela papa graun.

I kam inap long dis-


pela yia, Jant i planim pinis 1,400 hekta diwai. Na em i wok long go het long planim ol nupela. Sampela kain diwai Jant i planim aninit long riforestesen progrem em teminalia, akesia na kamarere.

Menesing Dairekta bilong Jant, Junji Fukushi i tok long yia 1999, Jant bai katim samting olsem 180,000 kubik mita diwai insait long wan wan hekta long olgeta riforestesen plantesen. Na long yia 2008, Mista Fukushi i tok Jant i lukluk long katim 2 milien kubik mita diwai long wan wan hekta aninit long dispela riforestesen progrem bilong em.

Mista Fukushi i tok insait long wan wan yia, gavman bilong Siapan i save givim Jant 1.2 milien yen (mani bilong Siapan) long karim aut dispela riforestesen progrem.

Fukushi i tok Jant i stat toktok pinis wantaim gavman long stretim gen tok orait bilong kampani long karim aut wok. Em i tok ol i stat toktok long 1991.

Em i tok sapos gavman i givim tokorait, Jant bai stap yet long Madang long narapela 20 yia. Insait long dispela 20 yia, Jant bai i no inap katim diwai long nupela eria. Jant bai katim diwai long ol riforestesen plantesen bilong kampani na tu bilong ol papa graun.



• Dispela em i wapela hap bilong bikipela neseri gaden em ol wokman bilong Jant i save planim ol liklik diwai long plastik bek na sanapim. Taim dispela ol liklik diwai i go bikipela, ol i save rausim na i go planim long ples we ol i katim diwai pinis long en.

Sir Wiwa tokim ol tisa long skruim yet save

GAVANA Jeneral bilong Papua Niugini, Sir Wiwa Korowi i bin tokim ol tisa sumatin husat i greduet long Dauli Tisa Koles insait long Sauten Hailans provins long las Fraide long lainim ol skul pikinini long stap longwe long ol pasin nogut olsem stil.

Em i tokim ol tisa olsem nau ol i greduet, ol i gat save long wok insait na ausait long klasrum. Na ol i mas wok hat long helpim ol sumatin bilong ol long gutpela pasin long laip.

Em i tokim ol olsem ol komyuniti bilong ol nau bai lukluk long ol long strongim wok bilong gutpela sindaun.

Sir Wiwa i tok olsem namba wan wok bilong ol tisa em long lainim ol sumatin bilong ol long sanap strong long abrusim kain pasin nogut olsem dring na kisim spakbrus.

"Ol sumatin bilong yu i mas gat strong long mekim stretpela disisen bilong ol yet taim ol i bungim kain kain traime insait long laip bilong ol," Sir Wiwa i tok.

Em i tok olsem nau yet planti manmeri i painim hat long kisim wok, na dispela i mekim planti i bihainim pasin raskol. Sir Wiwa i tok olsem dispela hevi long nogat wok na ol arapela hevi i wok long go antap wantaim sampela pasin nogut em ol save manmeri i wok long mekim.

Sir Wiwa i tok olsem dispela i soim olsem olgeta save bilong ol i lus nating. Tasol em i tok olsem sapos ol tisa i lainim ol sumatin bilong ol long sanap strong long mekim ol gutpela disisen bilong ol, bai ol yet i ken strong long no ken go insait long trabel.

Saina givim K30,000 helpim

i kam long pes 12 tok sori bilong em i kam long ol pipel long maus bilong Embasi bilong Saina hia long Mosbi. Na em i tokim han bilong Red Cross long Saina long bungim sampela samting hariap bilong helpim ol pipel long Madang na Morobe.

Orait long Novemba 12, ol dispela samting i bin kamap long PNG. Na long asle, Red Cross na NDES kisim ol.

Madam Nonsheng i makim ol pipel bilong Saina na givim bikipela tok sori long ol pipel bilong tupela provins

husat i bungim taim nogut long bagarap bilong guria. Na em i ting ol samting ol pipel bilong Saina i givim bai helpim long daunim hevi we ol pipel bilong Morobe na Madang i bungim long nau yet.

Em i tok moa olsem ol bagarap bilong bikren na guria i save kamap tu long sampela hap bilong Saina na bagarapim sindaun na laip bilong planti pipel. Na han bilong Red Cross long kantri i save givim helpim i go long ol pipel.

Mista Henao na Mista Anderson i

givim bikipela tok tenkyu i go long Madam Nonsheng na kantri bilong en long helpim ol i givim long ol pipel bilong Madang na Morobe.

Mista Henao i tok sosaiti bai lukim olsem ol dispela samting i go stret long ol pipel husat i nidim i dispela helpim insait long tupela provins.

Sosaiti i salim bikipela tok tenkyu tu i go long Air Niugini long en i tok orait pinis long karim ol saplai i go long Madang na Morobe provins wantaim nogat pe bilong karim ol kago.

Koki kisim yelopela gras long het olsem wanem tru

BIPO, bipo tru long wanpela ples ol i kolim Vunavatikai insait long Is Nu Briten provins i gat tupela poro i stap. Dispela tupela poro em Koki na Bilakbokis.

Tupela i gut pela poro stret. Tupela i save slip, kaikai na raun wantaim. Taim tupela i raun painim kaikai, tupela i save kaikai wantaim. Tupela i no save kros o pait.

Tasol wanpela samting i mekim tupela i luk narakain. Long bipo yet, Bilakbokis i gat tupela yelopela gras long het bilong em. Taim koki i no gat dispela yelopela gras.

Koki i save mangalim stret tupela yelopela gras long het bilong Bilakbokis. Olgeta de taim tupela i waswas na bilas long raun, Bilakbokis i save luk sma tru wantaim dispela tupela yelopela gras long het bilong em.

Taim Koki i lukim het bilong em, em i save sem tru. Bikos em i no gat wanpela gutpela bilas long het. Olgeta bodi bilong Koki i wait na taim em i laik lukim poro bilong em, man,

ai bilong em i save raun. Bikos olgeta hap long bodi i bilak na het tasol i yelo.

Wanpela taim tupela i go waswas pinis na wok long redi long bilas. Koki i kirap na askim Bilakbokis long traिम putim dispela tupela yelopela gras. Tasol Bilakbokis i no laik tru long givim em. Koki i tokim Bilakbokis, "Ating sapos mi putim dispela yelopela gras antap long het bilong mi, ples Vunavatikai bai paia stret ya." Tasol bilakbokis i strong tru na tok no gat.

Olgeta taim Koki i save stap na tingting long wanem samting em bai wokim long kisim dispela tupela gras long het bilong poro bilong em.

Wanpela taim tupela i stap na tupela wantaim i slip long nait. Tasol Koki i giaman slip na wok long luk stil long Bilakbokis i stap. Taim em i lukim poro bilong em i slip indai, isi tasol em i kirap lusim ples em i slip na wokabaut i go klostu long poro bilong em. Koki i kirap tasol na



rausim tupela yelopela gras long het bilong Bilakbokis. Na putim long het bilong em. Taim em i putim pinis, em i saname i go long bus.

Bilakbokis i slip i go na kirap laik sekim poro bilong em na em i

no lukim em. Em i sekim het bilong em na i no lukim tupela yelopela gras long het. Man, em i belhet nogut tru na i go painim em long bus. Em i raun painim poro bilong em i go inap tulait na em i no lukim em.

Nau yupela save

lukim Bilakbokis i raun long nait inap tulait. Na tu yupela save lukim Koki i gat yelopela gras long het bilong em. Em dispela gras tasol em i stilim long Bilakbokis.

Michael Joe Lames. RABAU.



Wanpela taim Kanage wantaim tripela poroman bilong em i laik go long danis long Passam No.3 long Wewak.

Ol i wokabaut bihainim maunten i go. Disepla ples tu em i ples bilong ol masalai. Ol i wokabaut i go na Kanage i wok long stori long laip bilong em taim em i yangpela yet.

Ol i wokabaut i go na wanpela mumut i ran krosim rot na Kanage i ranim em. Kanage i kirap na tok, "Sori mipela i no minim long kilim em, mipela i raun em i kam bek long haus bilong em."

Wanpela poro bilong em i harim wanem samting Kanage i tok na i no amamas. Na em i tokim Kanage long tok English "Don't Worship the Dimon." Kanage kirap na bekim "Sss, mi giamanim masalai ya. Nogut em i belhat long mipela. Mi giamanim em na bai yumi ken go hariap long danis." Ol poro bilong em i harim olsem na isi tasol holim bel bilong ol na wokabaut i go long danis.

Gee Polix WEWAK.

Mi laik lusim Kristen laip bikos no gat meri laikim mi

Dia Laiplain,

Stat long taim mi kamap wanpela Kristen, mi bin wok long beten long God long givim mi wanpela meri long maritim. Tasol mi no kisim ansa bilong beten bilong mi.

Mi raitims pas i go long ol meri. Tasol mi no save kisim bekim bilong ol pas bilong mi. Mi ting olsem mi wanpela smatpela man. Olsem na mi no save watpo na ol meri no laikim mi.

Olsem na mi tingting nau long lusim Kristen laip bilong mi. Bikos ol beten bilong mi i no karim kaikai.

IMPATIENT

Dia Pren,

Mipela i amamas olsem yu kamap wanpela Kristen. Na i gat bilip olsem yu bai kamap klostu long God long olgeta de taim yu bihainim ol eksampel na skul bilong Jisas Kraus.

Tasol mipela i no amamas long yu tok olsem yu laik lusim Kristen laip bilong yu. Bikos ol beten bilong yu i no karim kaikai. I luk olsem yu no klia gut long wanem samting em i beten na wanem samting em i Kristen laip.

Wanem samting em i min long stap olsem Kristen? Long stap Kristen em i min olsem wanpela man i traिम long bihainim ol eksampel na tising bilong Jisas Kraus. Na tu i bilip olsem Jisas em i rot we God i laikim yumi long bihainim ol pasin bilong em long kisim gutpela laip long dispela graun.

Wanpela man o meri husat i wokim disisen long bihainim Jisas olsem Lord na Master, i save painim gutpela amamas long olgeta de long stap olsem Kristen. Tasol em i ken painim hevi na trabel. Na em bai i no inap long kisim olgeta gutpela samting em i ting em bai kisim.

Long stap olsem Kristen em i no wanpela isipela laip we i no gat hevi. Bikos Kraus Jisas yet i tokaut. Tasol wanpela man o meri husat i go het yet long stap olsem Kristen bai painim gutpela na amamas bilong oltaim. Kain amamas em God i laikim mipela long painim insait long em.

Mipela i wari long yu tok long lusim Kristen laip bilong yu. Bikos mipela i bilip olsem long Kristen laip tasol yu ken painim gutpela amamas. Sapos yu lusim Kristen laip bilong yu, yu bai painim hat gen long kisim wanpela gutpela laip. Bikos i no gat

wanpela arapela laip i winim Kristen laip.

Beten em i wanem samting? Jisas Kraus i tokim yumi olsem sapos yumi laikim samting, yu mas beten na askim Papa God. Tasol Papa God bai i no inap long givim samting long we na rot yumi askim long en.

God i save ansaim beten bilong mipela olgeta taim. Sapos ol askim bilong mipela i gutpela, em bai ansaim long gutpela we na long taim em i ting i gutpela. Tasol sapos yumi askim em long samting we bai helpim yumi yet na i no ol arapela manmeri, ating em bai i no inap ansaim askim bilong mipela.

Skelim dispela eksampel: Yu tok olsem yu bin wok long beten long Papa God i mas givim yu wanpela meri. Dispela em i wanpela gutpela askim wanpela yangpela man olsem yu ken askim Papa God long beten. God i save olsem yu nidim wanpela meri. Tasol em i laikim yu long kisim wanpela meri long taim we i gutpela na stretpela. Em bai i no inap ansaim beten bilong yu na salim wanpela meri kam long yu. Na yutupela i wokim pren na bihain marit.


God bai helpim yu long luksave long gutpela rot yu ken bihainim long kisim wanpela gutpela meri. Mipela i bilip tu olsem God bai helpim yu long yu bai luksave long yu yet olsem ol arapela manmeri i lukim yu.

Eksampel: Wanpela as watpo na ol meri i no laikim yu i ken olsem yu save so op long ai bilong ol meri. Sapos no gat orait yu save ekt olsem yu wanpela smatpela man. Olsem na ol meri i no save luksave long yu.


Sapos dispela i tru, orait yu mas senisim nau kain pasin bilong yu. Ating wanpela gutpela poroman bilong yu i ken helpim yu na tok klia long wanem kain ol samting yu ken wokim long painim wanpela prenmeri.

MI LAIPLAIN

Salim ol hevi na wari bilong yu i kam long LAIPLAIN, P.O.Box 6047, Boroko. Yu ken ringim mipela tu long telipon namba 260011. Mipela i no inap autim trupela nem bilong long hia



Lusim ya, ol i no mau yet...Niusman bilong Nesenek Brodkasing Komisn (NBC) Elliot Raphael wantaim tupela poroman bilong em i wok long pilim ol mango. Dispela em long Pasifik Adventis Koles (PAC) long Mosbi long Trinde, Disemba 1 taim Dipatmen bilong Agrikalsa na Laipstok i holim wanpela fil de bilong en. Foto: Leo Wafiwa.



PABLIK NOTIS

Ph: Miri Alori Ext. 203
John lagata Ext. 217
Votovo Magull Ext. 232
ffrey Malliou Ext. 216

Sapos yu laik advertais, telepon 25 2500 na askim long



Word Publishing has a vacancy for a **DISTRIBUTION SUPERVISOR**. Applicants should have an outgoing personality and be able to fulfil the following requirements.

1. Communicate with agents at all levels
2. Have some knowledge of accounting matters and computer
3. Be prepared to work irregular hours
4. Possess a current driving licence

Salary and conditions negotiable

Apply in writing to:

The Marketing Manager
Word Publishing Co P/L
PO Box: 1982
Phone: 25 2500 or Fax: 25 2579



ADVERTISING SALES REPRESENTATIVE

Word Publishing require an experienced sales person to sell advertising space in our papers **THE TIMES, WANTOK, PNG BUSINESS & WEEKEND SPORTS**.

The ideal candidate will possess good sales contacts throughout PNG and be well presented.

For the right person an exciting future awaits with good financial rewards.

Apply to:

The Advertising Manager,
Telephone: 25 2500 or
Fax details to 25 2579.



MADANG TAUN INTERIM KOMISEN HOLIDE MADANG

Madang Taun Interim Komisen i amamas long tokaut olsem Madang Taun i gat nem olsem wanpela naispela taun long Papua Niugini. Bikos long ol gutpela samting olsem nambis na ol ailan long Madang, dispela i save pulim ol turis bilong ol arapela kantri na PNG yet.

Madang Taun Interim Komisen olsem Atoriti i lukautim wok bilong klinim na kamapim gutpela taun i amamas long Madang. Komisen i amamas long givim sevis i go long ol lain husat i stap long taun na ol pipel bilong Madang provins.

Komisen long sampela yia i bin wok hat long kamapim gut lukluk bilong taun long mekim i luk moa gutpela.

Komisen i lukim olsem Madang i gat bikpela sans bilong kamapim ol wok bilong Turisem Indastri long dispela kantri. Na em i yusim olgeta samting bilong en long kirapim Madang i go kamap olsem wanpela ples em bai pulim moa turis winim ol arapela provins.

Wantaim tingting bilong kamapim Plis Faktori na wokim Madang ples balus i go kamap olsem wanpela intansenel ples balus. Dispela nau bai opim rot bilong turisem na Madang bai go pas long Turisem Bisnis long PNG.


Komisen i gat progrem bilong kamapim taun long olgeta yia long mekim Madang Taun i kamap klin long ol turis na pipel bilong en.

Planti bisnisman na meri bai kisim helpim long wok bilong Turisem bikos ol bai salim planti kaikai na klos na ol arapela samting taim i gat planti turis i go long Madang.

Madang Taun Interim Komisen i askim olgeta lain i stap long taun na pablik long helpim komisen long larim taun i stap klin oltaim. Na wankain tu long taim bilong Kris-mas. Mipela i askim ol lain i stap long taun long klinim hap bilong ol long go wantaim bikpela astok bilong Komisen "Striving for beauty."

Komisen i laik givim tok amamas bilong em i go long olgeta bisnisman na meri, ol yut grup, gavman dipatmen na olupela taun menesa, Anton Yagama husat nau i wok olsem namba tu edministreta bilong Madang na edministreta, Wep Kanawi (OBE) husat i bin givim sampela helpim long 1993 mani yia.

Mipela i tok Meri Krismas na Gutpela 1994.



WANTOK

NIUSPEPA BILONG OL PAPUA NIUGINI STRET Ernst & Young audited circulation 15,377

IT'S AS EASY AS 1, 2, 3.

Call **252500** and make an appointment for our sales rep to visit your office. He will establish your advertising needs and give you effective solution.

The rest is up to you!



PABLIK NOTIS

Sapos yu laik advertais, telepon 25 2500 na askim long

Ph: Miri Aiori Ext. 203
John lagata Ext. 217
Vetovo Maguli Ext. 232
Jeffrey Maliou Ext. 216



SEKYURITI SEVIS

PNG ARMoured SEKYURITI SEVISES

I laik tok tenkyu i go long olgeta lain husat i save mekim wok bisnis wantaim ol long gutpela sapot na helpim yupela i givim long 10-pela yia i go pinis. Na mipela i lukluk gen long helpim yupela long narapela 10 pela yia i kam.

Ol Wokman na meri wantaim Menesmen.

RITNA SAVE

Wantok - Niuspepa bilong PNG stret



Hungrabos eksekutiv kam bek wantaim stail

FAY DUEGA | raitim

... tasol no gat wanpela samting long 1994-1995 bai isi

NELSON HUNGRABOS i kisim bek wok bilong em olsem presiden bilong sofbal asosiesen bilong ol man long Lae bihain long wanpela kibung bilong ol long las wik. Em bai holim dispela wok long 1994/95 sisen.

Tupela narapela

memba bilong olpela eksekutiv bilong em tu bai holim ol wok bilong ol. Tupela em maniman bilong asosiesen, Michael Tulungenaram na seketeri, Kaul Tama. Vais presiden Francis Nambon tasol i nupela man long dispela eksekutiv. Ol i bin makim em bihain long

olpela vais presiden, Ivan Gawi i risain na lusim spes i stap.

Hungrabos i tok olsem ol pipel long asosiesen i makim ol gen long pinisim wok em ol i bin statim long en. Em i tok klia olsem long dispela yia tasol, eksekutiv bilong em i bin stat wokim strong-

pela lo long ol klap. Wanpela eksampel em taim ol sampela klap i bin fofit bihain long ol i no bin givim ol konstitusen bilong ol long asosiesen.

Long kibung las wik, asosiesen i rausim olpela konstitusen na stat bihainim nupela.

Presiden Hungrabos i

tok olsem ol eksekutiv bilong em bai wok hat long kamapim gutpela stended bilong sofbal bihainim nupela konstitusen.

Narapela senis ol i laik lukim em long bungim ol tim menesa na kosa bilong ol klap moa long ol kibung bilong asosiesen. Hun-

grabos i tok olsem i gutpela olsem ol presiden bilong ol klap i ken makim maus bilong ol klap bilong ol long ol kibung. Tasol planti i save long administresen wok na i no klia gut long lo bilong sofbal yet.

Hungrabos i tok tu olsem nupela konstitusen i ken stretim ol hevi bilong asosiesen moa long olpela konstitusen.

Nupela eksekutiv bai sindaun nau long makim mani ol klap mas peim bihain long foapela klap i no bin kamap long kibung las wik. Ol foapela ya em NGI, Gazelle, YMCA na Island Hawks.

Na long ol gem long Sande, Kabiu bai traim bun bilong Taubar long 9 klok moning, na Hawks bai bungim NGI long 15 minit i abrusim 10 klok. Long 30 minit i lusim 11 klok moning, PNGBC bai traim hat long wilwilim YMCA. Gem bilong Gazelle na Karanas long 15 minit i go bungim 1 klok apinun bai lukim tupela i strong long winim narapela. Brown Eagles bai wilwilim Bismark long 2 klok apinun.

Bikpela pilai bai kamap long 15 minit i abrusim 3 klok namel long Aviat na Malangan. Aviat i no lusim

wanpela gem bilong ol yet. Malangan i bin lusim sampela gem bilong ol tasol ol i wanpela strongpela tim tu bihain long olpela pilai bilong Island Hawks i go pilai wantaim ol.

Robin Kunai, wanpela sinia pilai bilong Aviat i tok olsem gem ya bai i wanpela strongpela pilai stret. Em i tok olsem dispela i bikos tripela olpela pilai bilong Hawks husat i pilai wantaim Malangan nau bai i strongim tim bilong ol. Ol tripela ya em pitsa Steven Turalom, ketsa Moses na sotstop pilai, Tagaga Ngaongao.

Kunai i tok tu olsem long Sande, i luk olsem ol bai yusim sampela risev gret pilai bikos man husat i save bosim fes bes bilong ol, Julius Uvia, i go malolo long ples. Narapela risev gret pilai, Kaian bai bosim sotstop sapos pilai/kosa bilong ol, Joe Kolimus i bagarap yet.

Lainap bilong Aviat long Sande em pitsa Victor Bunbun, ketsa Mark Sahin, Pini Aisoli bai lukautim namba wan bes, na Willie Mande husat save lukautim rait autfil bai bosim seken bes. Martin Sama bai sanap was long numba tri bes na Kolimus Kaian bai stap long sotstop.



• Dispela em tim bilong Fujitsu A gret tim husat i bin pilai wantaim Royals long las wiken long Moshi sofbal resis. Royals i bin winim dispela pilai 7-1.

BENSON & HEDGES SOCCER

Gazelle traim gen long kamapim nem bilong ol long Mosbi sofbal

FAIRDEAL GAZELLE bai bungim Malangan long bikpela sofbal pilai bilong ol meri long Mosbi long Sarere long apinun.

Tupela tim wantaim long las sisen i bin gat nem. Tasol taim 1993/94 sisen i stat, Nesenel Sofball Federesen i bin putim Gazelle aninit long saspensen bihain long wanpela protes mas ol i bin mekim long mun Septemba taim ol i holim klap sempionsip long Mosbi.

Tasol long tupela wik i go pinis, federesen i bin lusim Gazelle long pilai gen. Nau yet, ol i wok hat long strongim tim bilong ol. Ol i bin dro wantaim All Stars tupela wik i go pinis na long las wik tasol, ol i bin nilim Yokomo, 4-1.

Malangan las wiken i lus long Madza, 7-5 na ol i mas pilai strong sapos ol laik winim dispela pilai.

Long ol narapela pilai bilong ol meri long Sarere, Mazda Carps bai bungim ol Elcom long 9 klok moning. Mazda las wik i bin mekim fes win bilong

em long sisen. Ol i no bin winim wanpela pilai na las wiken, em fes win bilong ol bilong dispela sisen.

Tupela tim wantaim i no bin pilai strong long stat bilong dispela sisen na ol i mas bihainim toktok bilong kosa bilong ol sapos ol i laik win.

Long hap pas 10 moning, Royals bai daunim Yokomo. Ol plismeri i bin soim long stat bilong sisen olsem ol i wanpela strongpela tim na sapos Yokomo i no lukaut gut, ol Royals bai wilwilim ol.

Bikos ol i bin stat let long dispela sisen, dispela wiken Gazelle i gat tupela pilai long pinisim. Long hap pas wan, Gazelle bai bungim United. Ol lain United las wik i bin dro wantaim All Stars na sapos ol i no pilai hat long Sarere, Gazelle bai winim ol gen.

All Stars bai bungim Wantok long 3 klok apinun. Tupela tim wantaim inap winim dispela pilai.

Soka hevi inap pasim ol pilai long Sissano

ARI HABA | raitim

SISSANO Spot Asosiesen (SSA) insait long Aitape distrik long Wes Sepik provins i bin pinisim gut olgeta pilai bilong em long mun Oktoba.

Gren fainal bilong basketbal na volibal i bin kamap gut tru.

Soka tasol i bin bungim sampela hevi olsem na ol i no pilaim gren fainal.

Ol eksekutiv bilong tripela pilai; soka, volibal na basketbal i bin sindaun na kisim 4-pela top tim na larim ol i go long fainal. Volibal na basketbal i bin pinisim gut semi fainal na bihain ol i go long gren

fainal.

Soka tasol i bin bungim hevi long taim bilong semi fainal. Nimas soka tim i no bin amamas long sampela samting na katim ol golpos. Dispela nau i bin stapim kik long go het.

Presiden bilong SSA, John Ainep i bin askim ol pilai na opisal

bilong Nimas soka tim long stretim dispela hevi wantaim ol eksekutiv. Em i askim ol opisal bilong tim long wokbung wantaim ol eksekutiv na ol bai stretim samting haviap. Ainep i no laikim dispela kain pasin long kamap. Bikos Sissano em i wanpela liklik stesin.

PUBLIC SERVANTS SOCCER ASSOCIATION DRAW

Week 5: Sunday December 5, 1993

Time	Div	Fixtures	Grounds/referee
8:00	M2	DCA vs NBC	B1 J Silikara
9:10	W2	DCA vs NBC	B1 J Minan
10:00	M2	Finance vs P/Mcgregor	B1 P Julius
11:10	W2	Finance vs P/Mcgregor	B1 M Takai
12:00	M2	Labrics vs Transport	B1 R Tsuga
1:10	W2	Labrics vs Transport	B1 Jenny Silikara
2:00	W2	A General vs POSF	B1 M Salaiiau
2:50	M2	A General vs POSF	B1 T Wangi
4:00	W2	PTC vs Works	B1 H Posing
4:50	M2	PTC vs Works	B1 R Tsuga

8:00	M1	Deced vs Lands	B2 M Takai
9:10	W1	Deced vs Lands	B2 Jenny Silikara
10:00	M1	BPNG vs PNGBC	B2 F Kasau
11:10	W1	BPNG vs PNGBC	B2 G Kaluwin
12:00	M1	CMB vs NPF	B2 P Julius
1:10	W1	CMB vs NPF	B2 C Saulep
2:00	W1	P/Minister vs University	B2 H Posing
2:50	M1	P/Minister vs University	B2 T Gawot
4:00	W1	Education vs Teachers	B2 M Salaiiau
5:50	M1	Education vs Teachers	B2 J Mangor

Note: All referees must make sure that all games must start on time and finish on time. 5 minutes are allowed for breaks.

EASTERN PAPUA COMMUNITY SOCCER TOURNAMENT DRAW - 1993

Saturday November 4 1993

Bisini One				Bisini Two			
Time	Games	Round	Division	Games	Round	Division	Games
750	A Amazon bay vs Gerehu	W 7	Togelu	D vs Naniu	3	D	Naniu
0840	C Gerehu 2 vs Kulumata 1	M 5	Gordons	B vs Naniu	5	B	Naniu

Sunday November 28 1993

MURRAY BARRACKS OVAL

07:00	A	1st pool A	vs	4th pool B	M	1
0800	C	1st pool A	vs	4th pool B	M	2

09:30 Sunday Service

Sunday December 5 1993

1000	B	4th pool A	vs	1st pool B	M	3
1100	A	3rd pool A	vs	2nd pool B	W	4
1200	B	3rd pool A	vs	2nd pool B	M	5
1300	B	4th pool A	vs	1st pool B	W	6
14:00	A	2nd pool A	vs	3rd pool B	W	7
1500	B	1st pool C	vs	4th pool D	W	8

The following games will be played in the first games next weekend on Saturday 11 Decembr 1993.

Men 9	2nd pool	vs	3rd pool B
Men 10	2nd pool	vs	3rd pool D
Men 11	4th pool	vs	1st pool D
Men 12	3rd pool	vs	2nd pool D

Complete draws for the finals weekend (December 11-12 1993) will be issued later. Please take note that due to time limitation and field unavailability, there will be no Presidents Cup competition this year.

PORT MORESBY WOMEN'S SOFTBALL ASSOCIATION INC. 1993 - 1994 SEASON DRAW - ROUND ONE WEEK 8 - 4/12/93

Time	Diamond One		Grade	Umpire
9:00	Mazda Carps	vs Elcom	A	P Byrd
10:30	Royals	vs Yokomo	A	A Simitap
12:00	Fujitsu	vs Globe Malangan	A	A Moe
1.30	Fairdeal Gazelle	vs United	A	L Duba
3:00	Shell Wantoks	vs Lotto Stars	A	J Sogai
4:30	Fairdeal Gazelle	vs Globe Malangan	A	C Terra

Diamond Two		Grade	Umpire
9:00	Norths vs PNGBC	C	K Paivu
10:30	UPNG vs Pomtech	C	P Klink
12:00	City Tigers vs Garamut Country	C	M Robinson
1.30	United vs Admiralty	C	L Paivu
3:00	Isuzu Karanas vs Garamut Country	AR	A Evald

Diamond Three		Grade	Umpire
9:00	Chebu vs Fairdeal Gazelle	B	A Evald
10:30	Tarangau vs Fujitsu	AR	C Terra
12:00	Chebu vs Lotto Stars	AR	J Knox
1.30	Norths vs UPNG	AR	G Talim
3:00	Mazda Carps vs Globe Malangan	AR	L Sorang

BYE: Grade Elcom C

* All B grade teams have completed their 1st round of matches for this year and will resume on January 15, 1994 for the second round.

EPC Soccer Summary of Round - Robin games Game No. Cumulative Points as at 28/1193

Pool A	1	2	3	4	5	6	P	G/F	G/A	P
Gerehu 1	W	W	D	W			7	13	0	1
Defence	W	D	D	W			6	2	0	2
LSC	W	W	L	D			5	5	3	3
Simla 2	L	L	W	W			4	2	7	4
Gordons 2	L	D	L	L			1	0	5	5
Kulumata 2	L	L	D	L			1	2	9	6

Pool B										
Amazon Bay	W	D	D	W	W		8	10	5	1
Dodobgu	W	D	D	L			5	6	2	2
Tokararu	W	D	D	L			4	4	4	3
Mini	L	D	D	D			3	2	3	4
Luba	L	D	D	D			3	3	6	5
Ambo	L	D	L	L			1	1	6	6

Pool 6										
Gordons 1	W	D	W	W			7	5	2	1
Kulumata 1	D	W	L	W			5	5	3	2
Yabwau	D	D	D	W			5	3	1	3
Lagimu	D	D	D	L			3	2	4	4
Nim	D	L	D	L			2	1	3	5
Gerehu 2	L	D	D	L			2	0	3	6

Pool D										
Simla 1	D	W	W	W			7	7	1	1
N/East	D	W	W	D			6	4	2	2
Naniu	W	L	D	W			5	3	1	3
Togelu	W	L	D	D			4	1	1	4
T/Malets	L	W	L	L			2	6	7	5
Kula	L	L	L	L			0	0	9	6

WOMEN A										
Weramaka	W	W	W	D	W		9	5	1	1
Togelu	L	L	W	W	W	W	8	12	4	2
LSC	W	W	D	W	L		7	7	2	3
Nim	W	D	L	L	W		5	7	2	4
Gerehu	L	D	W	L	W		5	3	4	5
Amazon Bay	L	L	W	L	L		2	1	13	6
Defence	L	L	L	L	L		0	0	9	7

WOMEN B										
Nanu	W	W	W	W	W	W	12	11	1	1
Dodobgu	D	D	W	L	W		6	6	3	2
Luba	D	D	W	L	W		6	4	1	3
Kula	D	L	D	L	W		4	4	5	4
Kulumata	L	L	D	D	W		4	2	4	5
Gordons	D	D	L	L	L		2	0	6	6
Tokararu	W	L	L	L	L		2	3	10	7

Eastern Papua Soccer Carnival unofficial points table

POOL A - MENS

Team	P	W	C	L	F	A	PTS
Gerehu 1	4	4	0	0	13	0	8
Defence	4	2	2	0	2	0	6
LSC	4	2	1	1	5	1	5
Simla 2	4	2	0	2	2	7	4
Gordons 2	4	0	1	3	0	5	1
Kulumata 2	4	0	1	3	2	9	1

POOL B - MEN

Amazon Bay	5	3	2	0	10	5	8
Dodoeugu	3	2	1	0	6	2	5
Tokararu	4	1	2	1	4	4	4
Mini	4	0	3	1	2	3	3
Luba	4	0	3	1	3	6	3
Ambo	4	0	1	3	1	6	1

POOL C - MEN

Gordons 1	4	3	1	0	5	2	7
Kulumata 1	4	2	1	1	5	3	5
Yabwau	4	1	3	0	3	1	5
Lagimu	4	0	3	1	2	4	3
Nim	4	0	2	2	1	3	2
Gerehu 2	4	0	2	2	0	3	2

POOL D - MEN

Simla 1	4	3	1	0	7	1	7
N/East	4	2	2	0	4	2	6
Naniu	4	2	1	1	3	1	5
Togelu	4	1	2	1	1	1	4
T/Malets	4	1	0	3	6	7	2
Kula	4	0	0	4	0	9	0

GOGODALA COMMUNITY SOCCER ASSOCIATION

SATURDAY - 4TH DECEMBER 1993

GROUND ONE: GAME FIVE

DATE: 04/12/93

TIME	TEAMS	DIVISION
09:00	Gerehu vs Kalama	B
09:50	Kalu vs Gordon	W
10:40	Pasiya vs Hohola	B
11:30	Mase vs Malebe	W
12:20	Gerehu vs Kalama	A
01:10	Kalu vs Gordon	*A

GROUND TWO: GAME FIVE

DATE: 04/12/93

09:00	Pasiya vs Hohola	W
09:50	Mase vs Malebe	B
10:40	Gerehu vs Kalama	W
11:30	Kalu vs Gordon	B
12:20	Pasiya vs Hohola	A
01:10	Mase vs Malebe	*A

SOGERI VALLEY RUGBY LEAGUE DRAW Round 2, Game 1

RESERVE GRADE

Sunday 05/12/93

9:30	R/Spiders vs S/Tigers
10:20	T/Bros vs K/Kaiman
11:15	B/Raiders vs KK Utd
12:00	H/Canning vs Kerras


A GRADE

1:00	R/Spiders vs S/Tigers
2:00	T/Bros vs K/Kaiman
3:00	B/Raiders vs KK Utd
4:00	H/Canning vs Kerras

DAVID UNAGI OFF SEASON POINT LADDER (Round 1-5)

"A"	Team	W	L	D	Pt
5	Korobosea	3	1	1	7
5	6 Mile	3	1	1	7
5	3, 4 Mile	3	2	1	6
5	Saraga	2	1	2	6
5	Gordons	3	2	1	6
5	Erima	3	2	1	6
5	Gordons	3	2	1	6
5	5 Mile	1	2	2	4
5	Makana	1	4	1	1
5	E/Boroko	1	4	1	1

"B"	Team	W	L	D	Pt
5	Saraga	4	1	1	8
5	3, 4 Mile	3	1	2	8
5	6 Mile	3	1	1	7
5	Makana	3	2	1	6
5	Korobosea	2	1	2	6
5	Gordons	3	2	1	




• Pilaia bilong Brisbane Broncos, Chris Jones i laik givim yuni-fom bilong Broncos long David Unagi.



• Dispela em stail bilong Unagi op sisen lig long Godens. OL lain long hap i save kamapim ol gutpela pilai tru.



• Dispela tupela pilaia ya i resis long hetim bal. Dispela em stail bilong pablik sevan soka long las wiken.



• Dispela pilaia bilong Hawks i autim pinis wanpela pilai bilong NGI na em i salim bal i go long poro bilong em. Dispela em stail bilong Mosbi sofbal long las wiken.



• Dispela pilaia bilong Yunivesiti long lephan i laik traime katim birua bilong em bipo long em i kisim bal. Dispela em kik bilong ol meri pablik sevan em i bin kamap long las wiken.

**LAE WOMEN'S SOFTBALL ASSOCIATION
1993-94 SEASON - ROUND ONE DRAW**

Saturday, December 4, 1993

Diamond 1

Time	Fixtures	Umpires
9.30-10.30	Malangan vs Elcees (JL)	Margaret Gaugau
10.30-12.00	Malangan vs Elcees (L)	Ara Hungrabos
12.00-1.30	Medics vs Westpac (L)	Helen Costigan
1.30-3.00	Taubar vs Gazelle (L)	Steven
3.00-4.30	Bismark vs Kunai (L)	Paul Pasen

Diamond 2

Time	Fixtures	Umpires
9.30-10.30	Bismark vs Kunai (JL)	Nelson Katusela
10.30-12.00	PNGBC vs Coro (1)	Wantoks
12.00-1.30	Manalos vs Karanas (1)	Coronation
1.30-3.00	Defence vs Kingston (1)	Noah Warkia
3.00-4.30	Aviat vs Wantoks (1)	J. Zurencuc

Diamond 3

Time	Fixtures	Umpires
9.30-10.30	Medics vs Westpac (2)	Gazelle
10.30-12.00	ANG vs Kingston (2)	Defence
12.00-1.30	Defence vs Tarangau (2)	KKK/Kingston
1.30-3.00	Karanas vs Manalos (2)	Tarangau
3.00-4.30	Coro vs Tarangau (2)	Karanas

Diamond 4

Time	Fixtures	Umpires
9.30-10.30	Taubar vs Gazelle (JL)	Kunai
10.30-12.00	Taubar vs Gazelle (LR)	Medics
12.00-1.30	Bismark vs Kunai (LR)	Taubar
1.30-3.00	Malangan vs Elcees (LR)	Bismark
3.00-4.30	Medics vs Westpac (LR)	Elcees

Diamond 5

Time	Fixtures	Umpires
9.30-10.30	Coro vs Royals (2)	Urusula Wanana
10.30-12.00	Uni vs Manalos (2)	Uni
12.00-1.30	Uni vs Lae Tech (2)	Coronation
1.30-3.00	Kabiu vs BSP (2)	Tarangau
3.00-4.30	Defence vs BSP (2)	Kabiu

Sunday, December 5, 1993

Diamond 2

Time	Fixtures	Umpires
9.30-10.30	Coro vs BSP (2)	Carol Yawing
10.00-12.00	Uni vs Kingston (2)	Coronation

12.00-1.30	Defence vs Manalos (2)	KKK
1.30-3.00	Karanas vs Kabiu (2)	Ann Ilikis
3.00-4.30	Lae Tech vs Manalos (2)	Monica/Defence

Diamond 4

9.30-10.30	Lae Tech vs Karanas (2)	Helen Costigan
10.00-12.00	Kunai vs Westpac (LR)	Gazelle
12.00-1.30	Elcees vs Gazelle (LR)	Urusula Wanana
1.30-3.00	Kunai vs Westpac (L)	Ara Hungrabos
3.00-4.30	Elcees vs Gazelle (L)	Helen Costigan

Diamond 5

9.30-10.30	Dfence vs Karanas (2)	Ara Hangrabos
10.30-12.00	Manalos vs Tarangau (2)	Lauiana Sadgrove
12.00-1.30	Royals vs Kabiu	Tarangau
1.30-3.00	Manalos vs Kingston (1)	Kabiu
3.00-4.00	Wantoks vs Karanas (1)	Lauiana Sadgrove

Please note: All games must start on time. All results must be given straight after each game to either A. Rukaiin or Alikis

**MT HAGEN SOFTBALL ASSOCIATION
COMPETITION DRAW - 1993/1994 SEASON
GAME: 6 ROUND: 1**

Saturday 4/12/93

Time	Venue	Grade	Teams	Umpire
1300-1500	D.2	Women	Aviat vs Royals	M Jerry
15.00-1700	D.2	Women	NGI vs Wantok	W Pup
1300-1500	D.1	Men	Gazelle vs B/Eagles	M Vonono
1500-1700	D.1	Men	Elcom vs Aviat	P Tonga

Sunday 5/12/93

1300-1500	D2	Women	Wantoks vs Elcom	J Kundi
1500-1700	D2	Women	BYE: NGI	
1300-1500	D1	Men	Hagstars vs Strivers	M Rek
1500-1700	D1	Men	TSL vs Unicats	P Poipoi
		Women	BYE: Unicats	
		Men	BYE: NGI	

DCA kisim helpim i kam yet long Jemani

WINIS MAP i raitim

NUPELA mekpas yunifom DCA soka tim i kisim long las wik Fraide i kirapim pinis tingting bilong ol pilaia. Na i luk olsem ol bai kirapim das long Bisini soka graun.

Long las wiken DCA i bin kamapim gutpela kik long publik sevansoka resis na winim ol pilai. Tim bilong ol meri long las wiken i bin nilim ol plis meri bilong McGregor, 1-0 na ol man i laki long winim McGregor, 2-1.

DCA long las wik Fraide i bin kisim tupela nupela mekpas yunifom i kam long tupela kampani bilong Jemani husat i mekim sampela wok wantaim DCA. Dispela tupela kampani em Weidleplan na Sel.

Weidleplan em i wanpela kampani bilong givim toktok o edvais na Sel em i wanpela

kontrakta husat i kam mekim wok long sampela projek bilong DCA.

Weidleplan em i wanpela kampani husat i gat nem long kantri Jemani long wokim ol ples balus na ol arapela kain wok olsem.

Projek menasa bilong Weidleplan, Klaus Maraun na mausman bilong Sel, Hartmut Cloos i tokaut olsem kampani bilong tupela i amamas tasol long givim helpim i go long DCA taim ol i bin askim long sponsa.

"Mipela i no kam long wok long ol projek tasol. Mipela i laik amamas wantaim ol pipel olsem na mipela i sponsaim DCA soka tim," Maraun i tok.

Taim kik bilong publik sevansoka long Mosbi i stat na DCA i putim tim bilong ol, DCA i no bin kisim wanpela sponsa.

Ol pilaia yet i save hatwok long painim mani na baim ol yunifom bilong kik.

Tasol long dispela yia, ol i bin laki long kisim tupela sponsa long helpim tim. Sel i sponsaim tim bilong ol meri na Weidleplan i sponsaim tim bilong ol man.

DCA tim i amamas long ol lain husat i bin wok hat long kisim dispela tupela sponsa. Man husat i bin wok hat tru long kisim dispela sponsa em Eric Petrus. Narapela tupela man husat i bin helpim Petrus em Philip Pakop na Harold Baona. Dispela tripela man i mekim bikpela wok tru long painim sponsa.

Long taim ol i kisim dispela tupela nupela mekpas yunifom, kosa bilong ol man Philip Pakop i tokaut olsem DCA bai kamapim strongpela kik.

"Dispela nupela yuni-



• Sampela pilaia bilong DCA i soim nupela yunifom bilong ol. Long beksait stat long lephan em Philip Pokop, Klaus Maraun namba 4 long lephan em Hartmut Cloos. Foto Winis Map

fom bai kirapim tingting bilong ol pilaia long kik strong," Pakop i tok.

Dispela toktok bilong

Pakop i no bin lus nating bikos long las wiken, DCA i bagarapim stret sindaun bilong ol plisman na

meri bilong McGregor. Ol meri DCA i winim McGregor 1-0 na ol man i winim McGregor gen long 2-1.

Olsem na ol arapela tim i mas lukaut long DCA. Nogut ol i givim marasin nogut long ol tu.

Unagi lig autim Pepsi trening skwat

DAVID Unagi Op Sisen Lig bilong Godens husat i bin winim Pepsi op sisen lig tonamen long las yia, long dispela yia gen i redi tasol long bungim salens bilong ol arapela tim.

Unagi lig i no laik westim taim na makim pinis tim long stap insait long dispela tonamen. Ol pilaia husat i stap long trening skwat em Nane Demose, Modol Liu, Hamo Ehai, John Komane, Ruben Dibeca, Moses Kits, Michael Baro, Simon Yomba, Belden Tapie, Big Joe, David Furegi, Kotaria, P. Pilika, Alex Kafreewa, Tose Philip, Leqnard Kaupa, Uncle Erima, Sumei Dama, Lawrence Alie, Samson Fumi, Axon Nori, Nick Timothy na Jimmy Lolly. Tim kosa em Glen Otto.

Pepsi i bin statim dispela tonamen long las yia na long dispela taim i gat 4-pela lig tasol i resis. Ol disela lig em Morata, Hohola, Unagi na Porebada. Morata wantaim Unagi lig i bin go long gren fainal na ol boi long Godens i winim Morata.

Olsem na long 1993/1994 Pepsi tonamen ol boi long Godens i redi tasol long banisim taitel em ol i winim long las yia.

Toktok bilong minista em long bekim hatwok

NESENEL minista bilong relisen, Hom Afeas na Yut, Andrew Posai long Mande nait i bin askim ol spotman na meri husat bai go stap insait long namba 4 Mini Saut Pasifik Gems long Vanuatu long kamapim gutpela pilai na apim nem bilong Papua Niugini olsem ol i bin wokim long 1991 Saut Pasifik Gem.

Mista Posai i bin mekim dispela toktok taim ol i holim las bung wantaim ol pilai pastaim long tim i kisim balus long Trinde na go long Vanuatu. Dispela bikpela pilai bai stat long Desemba 6 na pinis long Desemba 16.

Long dispela taim, Posai i askim ol spotman na

meri husat i stap long tim long soim gutpela pasin taim ol i stap long Vanuatu. Bikos ol i makim PNG.

Em i tokim olsem gavman na ol pipel bilong PNG bai sapatim ol taim ol i stap pilai long Vanuatu.

Em i askim ol long pilai strong na traim winim planti medal olsem ol i bin wokim long 1991 Saut Pasifik Gems. Em i tok, gavman na ol kampani i lusim bikpela mani long salim tim. Na ol i laikim sampela samting long bekim hatwok bilong ol.

Gavman wantaim ol biknem sponsa olsem SP Holdings, Highlands Gol, Pogera Join Venja (PJV) na ol arapela kampani i lusim bikpela mani na ol i

laikim sampela kain gutpela nius taim tim i kam bek.

Tim menasa bilong PNG i go long Mini Gems, Raphael Sapea i askim ol pilaia long lus tingting long wanem samting bai kamap na askim ol long wok hat. Em i askim ol long lus tingting long winim gol medal o ol arapela prais tasol em i tokim ol long kamapim gutpela pilai.

Planti tim opisal i bilip olsem ol bai winim sampela gol medal. Tim menasa bilong Boksen i bilip olsem tim bilong em bai winim sampela medal. Bikos long olgeta taim ol lain long boksen i no save lus liklik long winim medal.

Eels paia yet long Godens tas

LIONEL YOGOMIN i raitim

BIKPELA pilai bilong Godens Flat Tas resis namel long Offcut Eels na Pipia Brothers long las wiken i bin gutpela tru. Eels i bin strong na winim Brothers, 11-9.

Eels yet i bin putim namba wan taim Roko Koloma i go na skoa. Tasol i no long taim na Willie Why i go na skoa long kisim skoa i go antap long 1-1. Dispela i no stapim ol malio na Dominic Kakas na Farapo Kapo i go na skoa long kisim

skoa i go long 3-1.

Misina Dai i no wari na putim wanpela trai bilong Pipia na kisim skoa i go antap long 2-3. Eels i putim narapela skoa taim Peter Kodara i skoa. Pipia i kisim narapela skoa ken taim Joe Bulu i go na skoa. Eels i strong yet na Kenneth i go skoa long kisim skoa i go antap long 5-3 long hap taim.

Bihain long hap taim tupela tim i kamapim strongpela pilai na pait hat tru long daunim arapela. Roko Koloma i pilai strong tru na putim tupela trai long kisim skoa i go antap long 7-3.



• Dispela em Koera Dogs A gret tim husat i sampela pilai long Godens tas kompetisen. Foto Lionel Yogomin

BENSON & HEDGES SOCCER



BENSON & HEDGES SOKA

Wantok

21 YIA TASOL NA KAPIN FLAI ANTAP

WINIS MAP i raitim

...boi Manus winim bikpela taitel bilong yia

DRIMAN bilong Michael Kapin long stap insait long Papua Niugini soka skwat i kamap tru pinis.

Taim Kapin i liklik boi em i bin driman long makim kantri long wanpela taim sapos em i kamap bikpela man.

Yangpela Kapin i gat 21 krismas na em i bilong ples Kari insait long Manus provins. Em i bin gat bilip long

em yet olsem long wanpela de, em bai makim PNG long ol bikpela kik. Na long wokim driman bilong em i karim kaikai, em i bin pilai strong tru long resis wantaim ol arapela soka pilaia bilong ol arapela senta long stap insait long skwat.

Las wiken tu i bin wanpela bikpela taim bilong Kapin long amamas. Kapin i bin winim 1993 *Player of the Year* awot long divisen bilong ol man. Kapin i tokim *Wantok* olsem em i bin amamas tru long winim dispela awot.

"Mi no ting olsem mi bai win," Kapin i tok.

Em i givim bikpela tok amamas bilong em i go long Rabaul Soka Asosiesen (RSA) long givim nem bilong em i go long Papua Niugini Futbol Asosiesen (PNGFA). Bikpela tok

amamas bilong em i go long presiden bilong RSA, Kumbia Juwe na kosa bilong em long Vitiaz soka klap, Allan Joseph.

Dispela yangpela boi Manus i no man nat-ing, em i gat nem pinis long soka. Em i bin stat pilai taim em i stap long Rabaul haikul long 1986. Na em i save kik long taun resis.

Long 1987 em i bin joinim Admiralty soka klap bilong Kokopo na save kik long Kokopo soka resis. Long dispela taim em i bin makim Kokopo long kik bilong anda 19. Orait, long 1988, em i bin go kik long Rabaul wantaim Admiralty klap. Long dispela taim em i bin stap insait long Rabaul skwat.

Em i lusim Admiralty long 1989 na joinim

PTC. Long dispela yia yet, em i bin makim Rabaul long anda 19 tonamen. Ol nesenel selekta i bin makim em long stap insait long nesenel anda 19 skwat tasol em i no bin go kik bikos long dispela taim, em i bin stap yet long skul.

Long 1990 Michael i bin lusim PTC na join Vitiaz na long dispela yia em i bin kisim Vitiaz i go long gren fainal wantaim Pascol na Vitiaz i winim kik. Ol bosman bilong RSA i luk save long kik bilong em na makim em long stap insait long Rabaul skwat. Rabaul skwat i bin kik wantaim PNG nesenel skwat na Rabaul i winim ol 2-1. Dispela em long 1991 pastaim long Saut Pasifik Gems.

Long 1992, yangpela Michael i bin stap insait

long Rabaul skwat na ol i go kik long Manus long nesenel taitel. Long dispela yia yet em i bin kamap kepten bilong Vitiaz na kisim tim i go long Lae long stap insait long nesenel klap sempionsip. Vitiaz i bin kamap namba 4 long dispela resis.

Yangpela Kapin i bin winim tu prais bilong *Player of the Tournament* long taim bilong nesenel klap sempionsip long las yia.

Tasol long dispela yia, em i bin winim *Player of the Year* prais em PNGFA i givim long las wiken.

Printed and published by Anna Solomon, of Bittern Place, Gordons, at Allotment 2, Section 209, Hohola.



•Michael Kapin.

EPC go insait nau long ol nokaut

KIK bilong Isten Papua Komyuniti (EPC) i wok long kam long arere bilong en nau.

Long dispela wik Sande, EPC baim holim kik bilong nokaut. Ol dispela kik bai kamap long Murray Bareks.

Sapos olgeta samting i go stret, EPC bai holim fainal bilong em long narapela wik. EPC inap pinisim olgeta kik bilong em bihain long 4-pela wik. Tasol hevi bilong pilai graun i mekim na ol i srukim i go long 5-pela wiken.


Tupela asosiesen wantaim i save yusim Bisini soka graun. Ol lain bilong Pablik Sevan soka i save yusim long Sande na EPC i save yusim long Sarere. Dispela nau i stapim kik long pinis long taim ol i bin tingting long pinisim.

Tasol long dispela yia ol eksekutiv bilong EPC soka i bilip olsem kik i kamap gut tru.

Presiden bilong EPC soka, Nagia Tomdia i bilip olsem kik bilong displea yia i winim bilong las yia na sampela yia i go pinis.



• Dispela pilaia bilong Teachers i kikim bal bipo long birua bilong bilong Yunivesiti i kam klostu na stapim em.





REBO



HEY, WANTOK!

YU LAIK RITIM NIUSPEPA LONG TOK- PLES BILONG YUMI?... ORAIT, BAIM

EM NIUSPEPA BILONG YUMI OL PAPUA NIUGINI STRET!

INO DIA TUMAS. 40t TASOL!




• Ol dispela lain yangpela meri bilong Gumine haiskul i amamas na lap long kamera Bikos ol i stadi hat pinis na sanap gris lilik i stap ausait long klasrum bilong ol. Em ol i bin redi long fainal eksem long las wik i kam. *Poto Michael Koma.*

Raithan...Joe Kari edministreta blong Galp (raithan) i givim setifiket i go long wanpela sumatin.

Lephan...Wanpela sumatin i kisim setifiket bilong em.



Joe i laki tru!



KLOSTU JOE I KISIM TAIM!.. SUPA HIRO, SUPA SWIT MOA I STAP OLSEM NA SEVIM LAIP BILONG JOE!!



SUPA SWIT MOA

The Taste of Paradise

MUSIK NA TELEVISEN

PAPUA NIUGINI



Wok bilong glasim ol demo keset

WOK BILONG o katim wanpela keset i no isi. Yu mas mekim sampela samting bipo long ol lain long studio i givim tok orait long yu long katim singsing long studio.

Ol musik man na meri husat i tingting long katim singsing wantaim Chin H Meen (CHM) Supasaun 48 trek stidio long Mosbi, ol demo keset em ol i katim long ausait long studio i mas kamap gut long yau bilong George Luff.

Luff i save sekim ol demo keset ol lain i salim long CHM, wok bilong Luff em long harim ol demo keset na bihain em i save givim tingting bilong em long dispela lain long rekot o nogat.

Kain wok Luff i mekim em i bikpela wok pastaim. Ol arapela studio long narapela kantri tu i save bihainim dispela pasin bilong harim pastaim demo keset bipo long ol i givim tok orait long wanpela ben i ken katim keset.

Long wanpela de em i save kisim samting olsem 4 o 5-pela keset em ol i save salim. Sampela i save go


stret long stidio na givim.

Luff i tok, em i save kisim 2 o tripela wik long em traim ol demo keset bipo long i givim tingting bilong em.

"Long namba wan taim mi save harim ol singsing na musik long ol dispela keset ol man i salim. Bihain mi save givim tingting bilong mi na givim keset i go long menesing dairekta bilong CHM, Raymond Chin long kisim tingting bilong em," Luff i tok.

Luff i tok em i save harim samting olsem 5-pela keset long wanpela de. Na em bai mekim wankain samting long narapela de inap em i painim keset i gutpela long rekotim. Ol demo keset we i no gutpela ol bai no inap givim tok orait.

"Mi save givim tingting bilong mi tu long sans dispela keset i gat long maket sapos ol katim singsing bilong ol long studio. Mi save tok save tu watpo na mi rausim ol arapela demo keset. Mista Chin tu i save givim tingting bilong," Luff i tok.



• George Luff

Em i tok ol i save glasim demo keset long gutpela nek bilong man i singsing na musik i go wantaim singsing.

"Keset em mipela i laikim em ol dispela i gat gutpela strongpela nek. Nek mipela i laikim i mas go gut wantaim musik," Luff i tok.

Luff i bilong Daru long Westen provins. Em i bin kamap demokrina wantaim CHM long Septemba 26, 1992. Sief ensinia bilong CHM, Thomas Lulungan i bin askim CHM long kisim Luff long mekim dispela wok.

Pastaim long em i kisim dispela wok wantaim CHM, em i bin wokim keset bilong wanpela lokol ben bilong Daru ol i kolim Faded Glory. Dispela i bin mekim isi long em long kisim dispela wok.

Luff i save helpim tu long pilai gita long helpim ol ben husat i go katim keset long studio. Em i save helpim long pilai lid na bes gita.

Long dispela yia Luff i bin stap insait long wanpela grup em CHM i salim i go pilai long Solomon Ailan. Em i bin stap tu long narapela grup bilong CHM husat i bin go pilai long Daru.

I KAM LONG
Ela Motors
OL WIL BILONG NESEN

AMERICAN TOP FORTY

AS AT 27/11/93

CUR.	TITLE	ACT NAME
1.	All That She Wants	Ace Of Base
2.	I'd Do Anything For Love (But I Won't Do That)	Meat Loaf
3.	Again	Janet Jackson
4.	What Is Love	Haddaway
5.	No Rain	Blind Melon
6.	Dreamlover	Mariah Carey
7.	Please Forgive Me	Byran Adame
8.	Two Step Behind	Def Leppard
9.	The River Of Dreams	Billy Joel
10.	Another Sad Love Song	Toni Braxton
11.	Sweat	Inner Circle
12.	Better Than You	Lisa Keith
13.	Cryin'	Aerosmith
14.	IF	Janet Jackson
15.	Everybody Hurts	R.E.M.
16.	Right Here/Human Nature	SWV
17.	Hero	Mariah Carey
18.	Wild World	Mr. Big
19.	Runaway Train	Soul Asylum
20.	Anniversary	Tony! Toni! Tone!
21.	Both Sides Of The Story	Phil Collins
22.	Hey Jealousy	Gin Blossoms
23.	Ooh Child	Dino
24.	Baby I'm Yours	Shai
25.	Can't Help Falling In Love	UB40
26.	If I Had No Loot	Tony! Toni! Tone!
27.	Can We Talk	Tevin Campbell
28.	Human Wheels	John Mellencamp
29.	Hey Mr. D.J.	Zhane
30.	Break It Down Again	Tears For Fear
31.	Said I Loved You ... But I Lied	Michael Bolton
32.	Reason To Believe	Rod Stewart
33.	Soul To Squeeze	Red Hot Chili Peppers
34.	Juet Kickin' It	Xscape
35.	Jimmy Olsen's Blues	Spin Doctors
36.	I Can See Clearly Now	Jimmy Cliff
37.	Lately	Jodeci
38.	All About Soul	Billy Joel
39.	Nothing 'Bout Me	Sting
40.	Mr. Vain	Culture Beat


EMTV TELEVISEN

THURSDAY 2ND DECEMBER, 1993

5.27	STATION OPEN
5.30	ITN NEWS (G)
6.00	TODAY SHOW (G)
8.00	SESAME STREET (G)
9.00	STATION CLOSE
1.27	STATION RE-OPEN
1.30	RAY MARTIN (PGR)
3.00	AT MIDDAY
3.00	KIDS KONA
3.00	SESAME STREET (G)
4.00	KIDS KONA
4.00	FAT CAT (G)
4.30	NEW SCOOBY DOO (G)
5.00	MAGILLA GORILLA (G)
5.27	EMTV TOK SAVE
5.29	EMTV NEWS BREAK
5.30	HOME AND AWAY (G)
6.00	NATIONAL EMTV NEWS
6.30	A CURRENT AFFAIR (G)
7.00	NEIGHBOURS (G)
7.30	LOTTO DRAW (G)
7.32	FIZZ (G)
8.27	EM-TV TOK SAVE
8.30	MARRIED WITH CHILDREN (PGR)
9.00	LOVE AND WAR (PGR)

9.30	A COUNTRY PRACTICE (G)
10.57	MEDITATION WITH PASTOR WALO ARNI
11.00	STATION CLOSE
FRIDAY 3RD DECEMBER, 1993	
5.27	STATION OPEN
5.30	ITN NEWS (G)
6.00	TODAY SHOW (G)
8.00	SESAME STREET (G)
9.00	TBA
9.47	EMTV TOK SAVE
9.50	THIRD TEST SERIES CRICKET
12.00	TBA (G)
12.30	CRICKET (G)
4.00	KIDS KONA
4.00	FAT CAT (G)
4.30	NEW SCOOBY DOO (G)
5.00	MAGILLA GORILLA (G)
5.27	EMTV TOK SAVE
5.29	EMTV NEWS BREAK
5.30	HOME AND AWAY (G)
6.00	NATIONAL EMTV NEWS
6.30	A CURRENT AFFAIR (G)
7.00	NEIGHBOURS (G)
7.30	RESCUE 911 (G)
8.00	AUSTRALIA'S FUNNIEST HOME VIDEO (PGR)
8.30	FOCUS (G)

9.00	FRIDAY NIGHT MOVIE: "Bad Jim" (G)
10.58	EMTV TOK SAVE
11.00	CRICKET HIGHLIGHTS(G)
11.57	MEDITATION WITH PASTOR WALO ARNI
12.00	STATION CLOSE
SATURDAY 4TH DECEMBER,	
9.45	STATION OPEN
9.50	THIRD TEST SERIES CRICKET
12.00	GILLETTE (G)
5.00	BONANZA: "Riot" (G)
6.00	NATIONAL EMTV NEWS (G)
6.30	TBA
8.00	NCDC NEWS (G)
8.20	TOK SAVE
8.30	BURKE'S BACKYARD (G)
9.30	CRICKET HIGHLIGHTS
10.00	HAWAII 5-0 (PGR)
	"The Decent of the Torchers"
11.27	MEDITATION WITH PASTOR WALO ARNI
11.30	STATION CLOSE
SUNDAY 5TH DECEMBER, 1993	
6.57	STATION OPEN
7.00	BUSINESS SUNDAY (G)



8.00	SUNDAY (G)
9.50	THIRD TEST SERIES CRICKET
12.00	MUSIC & THE SPOKEN WORD (G)
12.30	CRICKET (G)
5.00	BONANZA (G)
6.00	NATIONAL EMTV NEWS
6.30	WONDERFUL WORLD OF DISNEY (G)
7.25	EMTV TOK SAVE
7.30	TBA (G)
8.30	SUNDAY NIGHT (PGR)
9.57	MOVIE: "The Fifth Monkey" CHIT CHAT WITH SIR PAULIAS MATANE
10.00	CRICKET HIGHLIGHTS(G)
10.57	MEDITATION WITH PASTOR WALO ARNI
11.00	STATION CLOSE

PNG TOP TWENTY

AS AT 27/11/93

NO.	SONG	ARTIST
1 (2)	Kir Ta Prove	Kokoratts
2 (1)	Askere	H. Maea
3 (6)	Swit Smile	Vuvu Vibration
4 (7)	Data Tut	Festalight
5 (3)	10 X Pekitona	Pongoros 93
6 (4)	A Mistake	Leonard
7 (5)	Pinky Ponky	Darkends
8 (8)	Lukluk Tamavatur	Barike
9 (16)	Chako Chako	Chaco Chaco
10 (11)	City Meri	Kanini Bros
11 (9)	Soldier Boy	Darkends
12 (10)	Bihain Taim B/V	C. Survivors
13 (13)	Sauga Mei	Sauga Band
14 (12)	Seaside	Jr. Kopex
15 (15)	No Compromise	M. Manimbi
16 (19)	Emi No Isi	Basil Greg
17 (18)	Bena	Hitsy Golu
18 (14)	Josephine	Leonard
19 (20)	Arua Pipi	Arovu Harisu
20 (17)	Swit Finche	Reks Band

• Ratings based on requests on Radio Kalang and not cassette sales.

ELA MOTORS - OL WIL BILONG NESEN

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.